

Ulutala o Lesona Ta'itasi

1. O le Sola'aga Fa'avavega	4
2. A'e i Luga o le Apefa'i ma le Vilivilita'i	9
3. Ia Tausolomua Ona Ava o le Tasi i le Tasi	14
4. O le Sini e Sili ona Maua	19
5. Ia Fa'amautinoa	25
6. Fa'amalosia i le Upu Moni Mo Le Taimi Lenei	30
7. Valo'aga Mo Lo Tatou Manuia	35
8. Olaga Mamā i Totonu o se Tupulaga Amio Leaga	40
9. Teufatuina o le Malamalama Fa'alelagi	45
10. Fa'amalosia o ō Tatou Mafaufau	51
11. Taimi Fa'aopoopo Mo Se Sini	56
12. O a Ituaiga Tagata?	61
13. Finafinau e O'o i le I'uga	66

O Lesona Fa'ale-Tusi Paia o le Sapati, o se polokalame su'esu'e lea o aso ta'itasi, o loo fa'avae atoa lava i le Tusi Paia ma le Agaga o Valoaga e aunoa ma ni manatu fa'aopoopo. O si'itaga ua fa'apupu'uina i le tulaga e mafai ai ina ia maua ai manatu manino ma le tu'usa'o. O puipui [] o loo fa'aaoga i nisi o fa'amatalaga ina ia mautinoa ai le manino, malamalamaaga ma'oti o le manatu o loo talanoaina, ma faigofie ai ona faitau. E matuā fautuaina lava le su'esu'eina atili o tusi o loo aumaia ai la latou Lesona.

Aiā o meatotino © 2024 e le Matagaluega o le A'oga o le Sapati a le Seventh Day Adventist Reform Movement General Conference, 5240 Hollins Road, Roanoke, Virginia 24019, USA.
www.sdarm.org

Lesona Tusi Paia o le Sapati (USPS 005- 118), Vol. 100, No. 3, Iulai–Setema 2024. Saunia ma fa'asalalauina e le Matagaluega a le A'oga o le Sapati a le Seventh Day Adventist Reform Movement General Conference, Lomia ma tufatufaina e le Reformation Herald Publishing Association, 5240 Hollins Road, Roanoke, Virginia 24019–5048, U.S.A.

Fa'aliliuina e P. Wily.

Upu Tomua

O ē sa'ilia ea le manumalo i lou olaga kerisiano? O lea la ua ē sau i le nofoaga sa'o:

I le tusi lona lua na tusia atu e Peteru ia i latou na latou maua "lea lava fa'atuatua tau tele" fa'atasi ma ia, ua fa'ailoa atu ai e le aposetolo le fuafuaga fa'alelagi mo le fausiaina a'e o le amio Kerisiano." – *The Acts of the Apostles*, p. 529.

O le mataupu muamua o le 2 Peteru, o loo tumu i fa'atonuga, ma o loo fa'ailoa mai ai le manatu autu o le manumalo. O le upu moni o loo matuā fa'amalosia ma'oti mai lava i le mafaufau e ala i le auala o loo a'oa'oina mai ai i lenei mataupu. Ia matuā sili atu ona tatou lagolagoina le su'esu'eina o nei upu, ma le fa'atinoina o nei poloa'iga." – *The SDA Bible Commentary* [E. G. White Comments], vol. 7, p. 942.

E matuā aoga lava le fausiaina a'e o amioga moni fa'akerisiano i lenei taimi o le tala'aga, lea o le a vave lava ona tatau ona tatou tula'i ai e aunoa ma se Puluvaaga o aioi mo i tatou i totonu o le nofoaga sili ona paia o le malumalu i le lagi! O nei la manatunatuga tāua lava i o tatou mafaufau, o tagata su'esu'e uma lava o le A'oga o le Sapati i le lalolagi atoa, o le a taula'i atu i *Lesona mai i Tusi a Peteru* (II).

E le'i i ai muamua lava se taimi na matuā sili atu ai ona tāua lo tatou fa'afitia o i tatou lava ma si'i a'e le satauro i aso ta'itasi, nai lo le taimi lenei. O le a le tele o le fa'afitia e le tagata o ia lava, o loo tatou naunau e fa'atino?" – *Testimonies for the Church*, vol. 9, p. 186.

"E tatau ona tatou tofusia i le natura fa'alelagi, ina ua tatou sosola ese mai i le amio leaga oi le lalolagi e ala i le tu'inaanau. . . .

"E leai se a'oa'oga i totonu o le Upu a le Atua e pei o se filifiliga e aunoa ma ni aiaiga – a i ai loa i totonu o le alofa tunoa, ua i ai lava fo'i i taimi uma lava i totonu o le alofa tunoa. I le mataupu lona lua o le Peteru 2, o loo fa'amanino ma fa'ama'oti mai ai le mataupu lea. . . .

O Upu o le Tusi Paia o loo fa'amanino mai ai e fa'apea, o i latou na iloa muamua le ala o le ola ma sa latou olioli i le upu moni, o loo ua lamatia i latou i lo latou pa'u'ū e ala i le liliu ese mai i le upu moni, ma ua leiloa i latou. O lea la, o loo mana'omia se liuaga maumausalī i aso ta'itasi i le Atua.

"O i latou uma lava e sa'ili e lagolagoina le mataupu lea o se filifiliga – a i ai loa i totonu o le alofa tunoa, ua i ai lava fo'i i taimi uma i totonu o le alofa tunoa, o loo latou faia lenei tulaga e tete'e atu ai i le fetalaiga manino, 'Ua fa'apea ona fetalai mai o Ieova.' . . . O i latou ua liua moni lava, ua tanumia fa'atasi i latou ma Keriso i le fa'atusa o Lona maliu, ma toe tutū a'e ai mai i le tu'ugamau suavai i le fa'atusa o Lona toe soifua mai nai le oti, ina ia savavali i le ola fa'afouina. O le usita'i fa'atuatua i le upu moni, e tatau ai ona latou fa'amautinoaina lo latou vala'auina ma lo latou filifilia." – *The SDA Bible Commentary* [E. G. White Comments], vol. 6, pp. 1114, 1115.

"O lo tatou va'ava'ai ma lo tatou fa'ata'ita'iina o le soifuaga o [Keriso], o le a toe fa'afouina ai i tatou i Lona fa'atusa. O le mamalu o le lagi o le a susulu i totonu o o tatou olaga, ma toe lafoia atu ai i luga o isi. I le nofoali'i o le alofa tunoa, e tatau ona tatou sa'ilia ai le fesoasoani tatou te mana'omia e mafai ai e i tatou ona ola fa'apena. O le fa'apaiaina fa'amaoni lenei, ma o le a se isi tulaga e sili atu ona maua e mafai ona fa'ananau atu i ai tagata o loo ola i tino e mafai ona oti, nai lo le feso'ota'iina atu ia Keriso e fa'apei ona pipi'i atu o le lālā i le vine?" – *Testimonies for the Church*, vol. 5, p. 306. Amene!

O le Matagaluega o le A'oga o le Sapati a le Koneferenisi Aoao

Taulaga Sapati Muamua mo se Fale Tapua'i, A'oga, ma se Ofisa i Liberia

O nisi o taimi e fa'aigoaina ai Liberia o se tasi o tuaoi mulimuli o Aferika, o se atunu'u mafanafana o vaomatua i le talafatai i sisifo o le konetineta o Aferika, e tuaoi atu ia Sierra Leone, Ivory Coast, Guinea, ma le Atlantic Ocean. I le lotolotoi o le faitau aofa'i o le sili atu ma le 5 miliona tagata, o le 85.3% latou te ta'utinoina le fa'atuatua Kerisiano (o le to'atele lava o i latou o Porotesano, e aofia ai Tagata lotu Aso Lona Fitu), o le 12.6% latou te ta'utinoina le tapua'iga Islam, 1.5% latou te lē ta'utinoina ni tapua'iga, ma le 0.6% latou te tausia tapua'iga fa'aleaganu'u.

O Liberia o se faigāmālō a tagata ua sili ona leva i totonu o Aferika, o loo taumafai pea e toe fausiaina a'e mai i le 14 tausaga o le taua sili ona leaga i le va o ona tagata (1989-2003) lea na fa'aumatiaina ai le fa'atulagaga fa'avae o lenei mālō, ma e fa'avasegaina o se tasi o atunuu e 10 e sili ona matitiva i le lalolagi. O fa'ato'aga na fa'aumatiaina, ma o le auivi fa'avae ma fale faigaluega na fa'atafunaina.

I le lotolotoi o le faigata, i le 2011, o le au uso i Liberia na tosina atu i mataupu fa'ale-Tusi Paia a le Seventh Day Adventist Reform Movement e ala atu i le upega tafā'ilagi a le Koneferenisi Aoao a le Fa'agaioiga Toe Fuata'i Aso Fitu O Le Toe Afio Mai, www.sdarm.org, ma o le galuega, na fa'avaeina iinei i le 2012. Talu mai lena tausaga, na fa'atupula'ia a'e ai mai i le aai laumua o Monrovia aga'i atu i le 3 o itumalo e 15 o Liberia.

E ui lava ina muta le fa'afitauli i le va o tagata, o ma'ila'ila o ona manu'a o loo mafai pea ona va'aia i le atunu'u atoa. O le fa'atulagaga atoa o lona tamaoa'iga ua malepe, ma e masani lava ona faigata ona maua se galuega iinei pe afai e lē ta'utinoina e se tagata lona fa'amaoni atu i se pātī fa'apolokiki. O mea ua tutupu o loo matuā fa'avaivaia ai lava, ae o loo aga'i pea i luma lo matou fa'atuatua.

O le fausiaina a'e o le galuega i Liberia, o loo i ai se mana'oga vave mo nofoaga autu ma se fale e tapua'i ai ma fa'aleleia ai a matou galuega fa'amisionare mo le togafitiga o ma'i. E mana'omia fo'i le faia o se a'oga maualalo mo a matou fanau o loo fetaia'i ma faigata ona e tatau ona latou misia su'ega ma vasega fa'aopopo o loo fa'atulagaina e faia i le Sapati.

I le 2019, na foa'i mai ai ma le alofa e se tuagane (ua maliu nei) se fanua e tu'uina atu mo le fausiaina o se a'oga, falema'i, ma se ofisa. O le amataina la o le fausiaina o se fale tapua'i ma nei galuega tatau, ua fa'amanuiaina ai i matou i se eka o le laueleele i Nyanforla (Collin Farm) i le itumalo i lower Bong County, ma se isi fasi eleele e tusa ma le ¼ eka i Monrovia.

I lenei la malamalama'aga, o lea ua matou ole atu ai ma le agalelei i o tatou uso ma tuafafine uma i le lalolagi ina ia fesoasoani mai ia i matou i le Taulaga Sapati Muamua ina ia mafai ai e i matou ona fa'ataunu'uina sini e mana'omia ina ia fausia a'e ai le galuega a le Atua i Liberia. Matou te ulua'i fa'afetai atu ia te outou!

O ō outou uso ma tuafafine mai i Liberia

O Le Sola'aga Fa'avavega

MAU TAULOTO: “Ona o lea ua ia folafolaina mai ai o mea e silisili ese ma le aoga, ina ia tofusia fa’atasi ai outou i le amio Atua, ina ua sosola ese outou i le amio leaga oi le lalolagi i le tu’inanau” (2 Peteru 1:4).

“Ma’imau e, pe ana iloa e i latou o loo matuā itiiti lava lo latou olaga fa’aleagaga, o le ola e fa’avavau e na o i latou lava e tofusia i le natura fa’ale-atua ma sosola ese mai i le amio leaga oi le lalolagi e ala i le tu’inanau, e mafai ona foa’iina mai i ai!” – *Testimonies for the Church*, vol. 9, p. 155.

Faitauga Fautuaina: *Testimonies for the Church*, vol. 5, pp. 737-746;
Thoughts From the Mount of Blessing, pp. 76-78.

Ulua’i Aso

Iuni 30

1. O SE TUSI E I AI SONA SINI

a. O ai na tusia atu i ai lenei tusi, ma aisea fo’i, ma e fa’apefea ona mafai ona faia atoatoa? 2 Peteru 1:1.

“Oka se autū silisiliese mo manatunatuga – o le amiotonu a le Atua ma lo tatou Fa’aola o Iesu Keriso. O le manatunatu ia Keriso ma Lana amiotonu e lē maua ai se avanoa mo le amiotonu a le tagata lava ia, mo le vi’ia e le tagata o ia lava. I lenei mataupu, e lē o i ai se muta’aga. O loo i ai le la’ala’a pea i luma i taimi uma lava i la’asaga ta’itasi uma o le iloa e fa’atatau ia Keriso.” – *The SDA Bible Commentary* [E. G. White Comments], vol. 7, p. 942.

b. A’o tatou sa’ilia le Atua ma le fa’amaoni, ma le finafinai i totonu o Lana Upu, o a tau e tafe taumasuasua mai i totonu o ō tatou lotu? 2 Peteru 1:2.

“Afai e taofi mau atu le tagata i le natura o le Atua, ma galue ai i le fuafuaga o le fa’aopoopoga, ma fa’aopoopo ai le alofa tunoa i le alofa tunoa i le fa’aatoatoaina o se amio fa’akerisiano, o le a galue le Atua i le fuafuaga o le fa’ateleina. Ua Ia fetalai mai i Lana upu: ‘Ia fa’ateleina ia te outou le alofa tunoa ma le filemu e ala i lo outou iloa e fa’atatau i le Atua, atoa ma lo tatou Ali’i o Iesu.’” – *Testimonies for the Church*, vol. 6, p. 148.

2. O LE FA'AMANUIAGA O LE ILOAINA O LE ATUA

a. O le a le mautinoaga paia e o'o mai ia i tatou ta'ito'atasi – ma tatou te taliaina fa'apitoa lava i taimi faigata? Ieremia 24:7; Iopu 22:21-23, 29.

“O lo tatou fa'amoemoe e tatau ona fa'amalosia i taimi uma lava e le iloaina, o Keriso o Ia o la tatou amiotonu. Ia fa'alagolago lo tatou fa'atuatua i lenei fa'avae, auā o le a tula'i mausali e fa'avavau. E aunoa ma le manatunatu i le pogisa o Satani ma mata'u ai i lona mana, e tatau ona tatou tatalaina o tatou loto e taliaina ai le malamalama mai ia Keriso ma ia fa'asusulu atu i le lalolagi, ma fa'ailoa atu e sili atu le malosi o Lona mana nai lo le malosi uma lava o Satani, ma o Lona aao tausi o le a lagolagoina ai i latou uma lava e talitonu fa'alagolago atu ia te Ia.” – *Testimonies for the Church*, vol. 5, p. 742.

b. A'o tatou iloa atili pea lava pea Iesu, o a i'uga e o'o mai? Hosea 13:4; Efeso 3:17-19.

“O manatu lē atoatoa lea o loo i le to'atele o tagata e fa'atatau i le uiga ma le tofiga o Keriso, ua fa'apumo'omo'oina ai lo latou iloa fa'aletapua'iga ma ua matuā fa'aleagaina ai lo latou olaga aga'iga'i i luma i le olaga fa'alelagi. O le tapua'iga a tagata ta'ito'atasi i le lotolotoi o i tatou i le avea o i tatou ma nu'u, ua matuā maualalo lava. O loo matuā tele le fa'afoliga, tele fa'atulagaga, tele tele le tapua'iga faia i le laulaufaiva; peita'i o se mea e sili atu ona loloto ma sili atu ona mausali e tatau ona aumaia i totonu o lo tatou olaga fa'aletapua'iga.” – *Ibid.*, p. 743.

“Fai mai le fetalaiga a Iesu: ‘E alofa mai lava le Tamā ia te outou.’ Afai e fa'atumau atu lo tatou fa'atuatua i le Atua, e ala atu ia Keriso, o le a fa'amaonia ‘e pei o se taula o le agaga, e mautinoa ma mausali, ma o le fa'atuatua fo'i lea e ulufale atu i totonu o le nofoaga o loo i tua atu o le ie puipui; o le nofoaga lea ua afio atu i ai Iesu, o Lē ua muamua atu mo i tatou.’ E moni o le a o'o mai mea e fa'anoanoa ai; ma puapuaga e tatau ona tatou iloa e o'o mai; peita'i e tatau ona tatou si'itia a'e mea uma lava, mea tetele ma laiti, i le Atua. Na te lē femēmēa'i i le tele o a tatou faitioga eseese, e lē fa'ato'ilaloina fo'i o Ia i le mamafa o a tatou avega. O Lana tausiga leoleo e o'o atu i aiga ta'itasi uma lava ma e si'omia ai tagata ta'itasi uma lava; e naunau alofa mai o Ia i a tatou pisinisi uma lava ma o tatou fa'anoanoaga. Na te maitauina loimata ta'itasi uma; na te lagonaina le lagona o ō tatou mafatiaga. O puapuaga ma tofotofoga uma lava e o'o mai ia i tatou iinei, o loo fa'atagaina, ina ia galuea'iina ai Ana sini o le alofa ia i tatou, ‘ina ia tatou tofusua ai i Lana amio paia’ ma fa'apena ona avea ai i tatou o ē tofusua i lena olioli atoatoa lea e maua i Lona fa'atasi mai.

“O le atua o le lalolagi lenei ua ia fa'atauasoina mafaufau o i latou e lē talitonu, ne'i susulu atu ia i latou le malamalama o le tala lelei matagofie a Keriso, le fa'atusa o le Atua.’ Peita'i o le Tusi Paia, i upu sili ona malolosi, ua ia tu'uina mai i o tatou luma le tāua o le mauaina o se iloa e fa'atatau i le Atua.” – *Ibid.*, p. 742.

3. SA'ILI MA MAUA

- a. **Fa'amatala le tulaga ua i ai le lalolagi i le taimi lenei. 1 Ioane 5:19. Ae ui i lea, o le a le tele o mea e patino i le ola ma le amioatua ua foa'i mai e le Atua i totonu o Lana Upu? 2 Peteru 1:3.**

“O le su'esu'ega a Satani i taimi uma lava le fa'atumulia o mafaufau o tagata i mea ia o le a taofia ai i latou mai i lo latou mauaina o le iloa e fa'atatau i le Atua. Na te sa'ili ina ia fa'atumau lo latou manatunatu i mea o le a fa'apogisaina ai le malamalama'aga ma fa'avaivaia ai le loto. O loo tatou i totonu nei o se lalolagi agasala ma le amio leaga, ma si'omia e a'afiaga e tauau ina tosina ma fa'avaivaia ai so'o o Keriso. Na fetalai mai le Fa'aola: 'O le a ma'alili fo'i loto o tagata e to'atele, ona o le a tupu tele le amio leaga.' E to'atele e taula'i la latou va'ai i le amio leaga mata'utia tele o loo i o latou itu uma, o le liliu ese mai i le Atua ma le vaivai i itu uma, mā, latou te talanoa e fa'atatau i nei mea se'ia o'o ina fa'atumulia o latou loto i le fa'anoanoa ma le masalosalo. Latou te fa'asilisiliina i o latou mafaufau le galuega poto a le fili tautafa'asese, ma latou manatunatu tumau ai i mea e fa'avaivaia ai, na tutupu i ō latou olaga, a'o le taimi lava fo'i lea ua foliga mai ai ua latou lē iloa le mana o le Tamā oi le lagi ma Lona alofa lē mafuatia. O nei i'uga uma ua o'o mai e fa'apei lava ona mana'o i ai Satani. O se mea sese lo tatou manatu e fa'atatau i le fili o le amiotonu e peisea'i e ofu i le mana matuā tele lava, ae e matuā itiiti lava lo tatou manatunatu e fa'atatau i le alofa o le Atua ma Lona malosi. E tatau ona tatou talanoa e fa'atatau i le malosi o Keriso. E matuā lē mafai lava e i tatou ona lavea'i i tatou lava mai i lima o Satani; peita'i ua filifilia e le Atua se ala tatou te sao mai ai. O le Alo o Lē Silisiliese e i ai Lona malosi e tauina ai le taua mo i tatou, ma 'e ala ia te Ia o Lē na alofa mai ia i tatou' e mafai ai ona tatou sao mai 'e sili atu nai lo tagata manumalo.'” – *Testimonies for the Church*, vol. 5, pp. 740, 741.

- b. **E fa'apefea ona feso'ota'i tu'usa'o atu le manumalo fa'aleagaga, i se sa'iliga finafinau o le iloa e sili atu ona tele e fa'atatau i le Atua? Fa'ata'oto 9:10; 15:14 (vaega muamua).**

“O se iloa e fa'atatau i le Atua o le fa'avae lea o a'oa'oga moni uma lava ma auaunaga moni uma lava. E na o le pau lava lea o le talipupuni saogalemu moni e tete'e atu ai i fa'aosoosoga. E na o le pau lava lea o le fa'avae e mafai ona faia ai i tatou ia tatou fa'apei o le Atua i le amio.

“O le iloa lenei e mana'omia e i latou uma lava o loo galulue mo le si'itiaina a'e o ō latou uso a tagata. O le liuaga o le amio, o le mamā o le olaga, agava'a i auaunaga, usita'i i tapula'a sa'o, e fa'alagolago uma i se iloa sa'o e fa'atatau i le Atua. O lenei iloa o le sauniuniga aogā tāua lea mo le olaga lenei, ma le olaga oi lumanai.” – *The Ministry of Healing*, p. 409.

4. FOLAFOLAGA SILISILI ESE MA LE TĀUA

a. O le a se mea atonu o loo tatou manatu fa'atauva'a i ai i se tulaga fa'anoanoa, i lo tatou olaga kerisiano? 2 Peteru 1:4.

“Afai tatou te manana’o tatou te ‘sola ese mai i lo tatou mauaina o se iloa ma’i, e tatau nei ona tatou amata i le finafinau e aunoa ma le fa’atuai, ina ia galuea’iina lo tatou fa’aolataga ma le mata’u ma le gatete. E matuā to’atele lava latou te lē tu’uina mai se fa’amaoniga ma’oti e iloa ai o loo latou fa’amaoni i a latou tautoga o le papatisoga. O lo latou vilivilita’i ua fa’agaseina e le uiga fa’afoliga, ma fa’anaunauga fa’alelalolagi, fa’alialiavale, ma le alofa o le tagata ia te ia lava. O nisi o taimi e osofia ai o latou lagona, peita’i latou te lē pa’u’ū i luga o le Papa, o Iesu Keriso. Latou te lē o mai i le Atua ma loto ua nutimomoia i le salamo ma le fa’aalia o agasala. O i latou e lagonaina le galuega o le liuaga moni i totonu o ō latou loto, o le a latou fa’aalia fua o le Agaga i o latou olaga.” – *Testimonies for the Church*, vol. 9, p. 155.

“A taula atu loa i tatou ma le mausali i totonu ia Keriso, ua i ai loa ia i tatou se mana e leai se tagata na te mafaia ona aveesea mai ia i tatou. Aisea? Auā ua tatou tofusia i le natura fa’alelagi, ina ua tatou sola ese mai i le amio leaga o loo i le lalolagi e ala i le tu’inanau, o i tatou ua tofusia i le natura o Lē na afio mai i le lalolagi lenei na fa’aofuina i le tino tagata, ina ia mafai ai ona ia tula’i ta’imua i le aigā tagata ma fausia a’e ai se amio e le’i i ai se ila poo se pona o le agasala.

“Aisea ua to’atele ai i tatou e matuā vaivai ma lē agava’a? O le tali ona tatou te va’ava’ai ifo ia i tatou lava, ma a’oa’o ō tatou lava uiga ma tatou manatunatu ai pe fa’apefea ona tatou faia se nofoaga mo i tatou lava, mo lo tatou tagata ma’oti, mo uiga ese fo’i e patino ia i tatou, e suitulaga ai i le su’esu’eina o Keriso ma Lana amio.” – *Ibid.*, vol. 9, p. 187.

b. O le a le suiga e faia i totonu ia i tatou pe a tatou pu’eina moni lava nei folafolaga? Roma 3:31; 8:14.

“I le avea o i tatou ma kerisiano, ua tatou ta’utino ai ua tatou iloa ma fa’ataunu’uina o tatou matafaioi, ma ia fa’ailoa atu i le lalolagi, e i ai la tatou so’otaga vavalalata lava ma le Atua. E fa’apena ona tatau ona fa’ailoaina atu Keriso e ala i upu ma galuega fa’ale-Atua a Ona so’o.

“E mana’omia e le Atua mai ia i tatou le usita’i atoatoa i Lana Tulafono – o le fa’aaliga lea o Lana amio. . . . O lenei Tulafono o le si’ufofoga lea o le Atua ua toe fa’alogoina, o loo fetalai mai ia i tatou fa’apea, Ia sili atu ona paia, ioe ia sili atu pea ona paia. Ia tatou fa’anaunau i le atoatoaga o le alofa tunoa o Keriso; ioe, ia umi – ona fia ‘ai ma fia inu – i le amiotonu. Fai mai le folafolaga, ‘O le a ma’o’ona outou.’ Ia fa’atumulia o outou loto i se fa’anaunauga tele lava mo lenei amiotonu, o le galuega a lenei amiotonu,

ua fa'ailoa mai e le Upu a le Atua, o le filemu lea, ma o lona a'afiaga o le **to'a filemu** ma le mautinoaga e fa'avavau.

“O lo tatou avanoa sili ona taua lo tatou tofusia i le natura fa'alelagi, ina ua tatou sosola ese mai i le amio leaga o loo i le lalolagi e ala i le tu'inanau.” – *Bible Training School*, February 1, 1904.

Aso Tofi

Iulai 4

5. VAVAESEINA I SE TULAGA OFOFOGIA

a. Fa'amatala le finagalo o le Atua mo fanau ta'itasi uma lava a le aiga tagata. **Ioane 17:17; Salamo 119:151.**

“E mana'omia e le Atua mai ia i tatou le liua atu i Lona fa'atusa. O le fa'apa'iaina o le malamalama lea o ave pupula o Lona mamalu e lafoia mai i Ona tagata. Peita'i, o le auala e mafai ai ona tatou lafoia atu lenei pupula, e tatau ona tatou galulue fa'atasi ma le Atua. O le loto ma le mafaufau e tatau ona fufulueseina mai ai mea uma lava e ta'ita'ia atu ai i le sese. O le Upu a le Atua e tatau ona faitauina ma su'esu'eina, fa'atasi ma se naunauta'iga finafinau lava ina ia maua mai ai le mana fa'aleagaga. O le areto o le lagi e tatau ona 'aina ma fa'amalūina e le puta, ina ia mafai ai ona avea ma vaega o le ola. E fa'apena ona tatou maua le ola e fa'avavau. Ona taliina loa lea o le tatalo a le Fa'aola, 'Ia E fa'apaiaina i latou i Lau upu moni; o Lau Upu o le upu moni lea.

“E lē mafai e agelu ona suitulaga ia i tatou; peita'i latou te tula'i sauni e galulue fa'atasi ma i tatou i le tosinaina atu o tagata ia Keriso; ma o loo latou aioi mai ia i tatou ina ia tatou galulue fa'atasi ma i latou.” – *Bible Training School*, February 1, 1904.

Ua fa'ailoa manino mai lava e le Atua Na te finagalo ia i tatou ina ia tatou atoatoa; talu ai la ona Na te mana'omia lenei atoatoaga, o lea ua Ia faia ai le auala ina ia mafai ai ona tatou tofusia i le natura fa'ale-atua. E na o le pau lava lea o le auala e mafai ai ona fa'amanuiaina i tatou i a tatou taumafaiga mo le ola e fa'avavau. O le mana e foa'iina mai e Keriso.” – *Ibid*.

b. O le a le vala'au a le Atua ia i tatou i le taimi tonu lava lenei? **2 Korinito 6:15-18; 7:1.**

“O le Atua-foafoa o le iunivesa ua Ia fetalai mai ia te oe e pei o se Tamā alofa. Afai e te vavae ese mai i le lalolagi i ou lagona, ma ē tumau sa'oloto mai i ona uiga leaga, ma sola ese ai mai i le amio leaga o loo i le lalolagi e ala i le tu'inanau, o le a avea le Atua ma ou Tamā, o le a Ia fa'atamafaiina atu oe i totonu o Lona aiga, ma o le a avea oe ma Ona sulii. O le a Ia foa'i atu ia te oe le malō i lalo o lagi uma, e suitulaga i le lalolagi, mo se olaga o le usita'i. O le a Ia foa'i atu ia te oe se mamalu tele e fa'avavau ma se olaga e tumau e fa'avavau.” – *Testimonies for the Church*, vol. 2, p. 44.

FESILI TOE FA'AMANATU

1. O fea e sau ai le fa'atuatua sili atu ona tele?
2. O le a se mea atonu ua ou lē fa'atāuaina atoatoa e fa'atatau i le alofa o le Atua mo a'u?
3. O fa'apefea ona tosina ese a'u e “la'au e iloa ai le lelei ma le leaga” o le taimi lenei?
4. O le a le mea o le a tupu pe afai o le a mausali lo'u taula i totonu ia Keriso e lē'i fa'apea lava ona mausali muamua?
5. E tusa ai ma lenei lesona, e fa'apefea ona mafai ona fa'aatoatoaina la'u amio lē atoatoa?

Lesona 2

Sapati, Iulai 13, 2024

A'e i Luga o le Apefa'i ma le Vilivilita'i

MAU TAULOTO: “O le mea lava lea ia outou matuā fa'amalosi ai lava, ina ia fa'aopoopoina le amio lelei i lo outou fa'atuatua, ia fa'aopoopo fo'i le potō i le amio lelei, ia fa'aopoopo fo'i le lē gaoiā i le potō, ma ia fa'aopoopo le onosa'i i le lē gaoiā, o le amio atua fo'i i le onosa'i” (2 Peteru 1:5, 6).

“Ua fa'aailoa mai e Peteru ia i tatou le apefa'i o le fa'apaiaina moni, o lona fa'avae o loo tula'i i luga o le fogaeleele, a'o lona tumutumu e o'o atu i le nofoali'i o le Atua-lē-mafuatia. E lē mafai i la tatou taumafaiga e tasi ona tatou ausia ai le tumutumu o lenei apefa'i. E tatau ona tatou a'e a'e i lea la'asaga i lea la'asaga. O le tauiviga lenei lea e lamatia ai i tatou i le niniva, ma lagona matapogia ma tatou pa'uū, se'ivagana ua taula'i atu o tatou mata i luga, ma va'ava'ai a'e ia Iesu, o Lē na amatalia ma o Ia fo'i na te fa'amutalia lo tatou fa'atuatua.” – *The Review and Herald*, December 1, 1885.

Faitauga Fautuaina: *The Ministry of Healing*, pp. 497-502.

Ulua'i Aso

Iulai 7

1. O SE UIGA TAUA FA'AKERISIANO

- a. O le a se la'asaga e soso'o mai pe a tatou fausia ma le vilivilita'i lo tatou fa'atuatua? 2 Peteru 1:5 (vaega muamua).

“A uma ona tatou maua le fa'atuatua o le tala lelei, o la tatou galuega muamua lava o le sa'ili lea ina ia fa'aopoopo tapula'a lelei ma le mamā, ma fa'apena ona fufuluina ai le

mafaufau ma le loto mo le taliaina o le iloa moni.” – *Testimonies for the Church*, vol. 1, p. 552.

“O se tauiviga faifai pea ina ia mataala i taimi uma lava, ina ia tete’e atu i le ti’apolo; ae e aoga le mauaina e le tagata o le manumalo e tasi ia te ia lava ma malosi o le pouliuli ina ua uma ona ia maua o le isi manumalo. . . .

“A aunoa ma le amio mamā, atoatoa, e leai se tasi e mafai ona si’itia a’e i so’o se tulaga maualuga fa’aaloaloga. Peita’i o finafinauga lelei ma le fiafia i le amiotonu, e lē o ni uiga ia na tu’ufa’asolo mai i o tatou tupu’aga. O le amio e lē mafai ona fa’atauina; e tatau ona fausiaina e ala i taumafaiga mausali ina ia tete’e atu i fa’aosoosoga. O le fausiaina o se amio sa’o o se galuega lea o le olaga atoa lava, ma o le amio lea e tupu a’e mai i manatunatuga e tumu i tatalo e tu’ufa’atasia ma se sini matagofie tele lava. O le amio sili ona lelei e ia te oe, e tatau ona maua ona o le i’uga o au lava taumafaiga. O uo e mafai ona latou fa’alototeleina oe, peita’i e lē mafai ona latou faia le galuega mo oe. O lou mana’ona’o, mapuea, moe miti, o le a lē mafai ona fa’asilisiliina pe fa’aleleia ai fo’i oe. E tatau ona ē a’e i luga. Ia fusi a’e sulugatiti o lou mafaufau, ma ē alu i le galuega fa’atasi ai ma tomā malolosi uma lava o lou loto.” – *Fundamentals of Christian Education*, p. 87.

Aso Gafua

Iulai 8

2. O LE ILOA E MANA’OMIA MO LE FA’AOLATAGA

a. Fa’amatala le ituaiga iloa ua vala’auina i tatou ina ia tatou ausia i la tatou savaliga a’e i luga o le apefa’i a Peteru. 2 Peteru 1:5 (vaega mulimuli); Ioane 17:3.

“Ua fa’aailoa mai e le aposetolo i ē talitonu, le apefa’i o le atoaga fa’akerisiano, o la’asaga ta’itasi uma lava o le apefa’i lenei, o loo fa’atusa mai ai la’asaga faifai pea i le iloa e fa’atatau i le Atua, ma o le a’e i luga o lenei apefa’i, e leai se taimi e tūtū ai i le la’asaga e tasi. . . .

“O le taliaina e le tagata talitonu o le fa’atuatua o le tala lelei, o le galuega e soso’o ai a le tagata talitonu, o le fa’aopoopo lea o le amio lelei i lana amio, ma fa’apena ona fufuluina ai le loto ma saunia ai le mafaufau mo le taliaina o le iloa e fa’atatau i le Atua. O lenei iloa, o le fa’avae lea o a’oa’oga moni uma lava ma auaunaga moni uma lava. E na o le pau lava lea o le talitā saogalemu e tete’e atu ai i fa’aosoosoga; ma e na o le pau lava fo’i lea o le iloa e mafai ona faia ai le tagata ia fa’apei o le Atua, i le amio. E ala i le iloa e fa’atatau i le Atua ma Lona Alo o Iesu Keriso, e foa’iina mai ai i le tagata talitonu ‘mea uma lava e patino i le ola ma le amio fa’aleatua.’ E leai se meaalofa lelei e taofia mai i lē e naunau moni lava i lona fia maua o le amiotonu a le Atua.” – *The Review and Herald*, September 19, 1912.

“E tatau ona tatou a’oa’o mai ia Keriso. E tatau ona tatou iloa poo ai o Ia ia i latou ua Ia toe fa’atauina mai. E tatau ona tatou iloa, e ala i le talitonu ia te Ia, o lo tatou avanoa sili ona taua lo tatou tofusia i Lona natura fa’alelagi, ma fa’apena ona tatou sola ese ai mai i le amio leaga oi le lalolagi e ala i le tu’inanau. Ona fufuluina loa lea o i tatou mai i agasala uma, o uiga sese uma o le amio. Tatou te lē mana’omia ina ia taofia se uiga agasala e tasi. . . .

“A’o tatou tofusia i le natura fa’aleatua, o uiga leaga na tatou fananau mai ma i tatou, ma amioga leaga na fausia e i tatou lava, ua vavaeeseina mai i le amio, ma ua faia ai i tatou o se mana ola mo le lelei. O lo tatou su’esu’e i taimi uma e fa’atatau i le Faia’oga Atua, o lo tatou tofusia i aso ta’itasi i Lona natura, tatou te galulue fa’atasi ai ma le Atua i le fa’ato’ilaloina o fa’aosoosoga a Satani. E galue le Atua, ae e galue fo’i le tagata, ina ia tasi le tagata ma Keriso e fa’apei ona tasi Keriso ma le Atua.” – *The SDA Bible Commentary* [E. G. White Comments], vol. 7, p. 943.

b. Ta’u mai se isi ituaiga iloa e aoga mo le tuputupu a’e fa’akerisiano. Salamo 77:6; 2 Korinito 13:5.

“O le auala e maua ai le fesoasoani mai ia Keriso, e tatau ona tatou iloa lo tatou mana’oga. E tatau ona ia i tatou se iloa moni lava e fa’atatau ia i tatou lava. E na o le tagata lava na te iloa o ia o le tagata agasala, lea e mafai e Keriso ona lavea’i. Se’iloga lava ua tatou iloa le leai atoatoa o so tatou fesoasoani ma tatou lafoa’ia ai lo tatou talitonu ifo ia i tatou lava, o le a tatou taofimau atu loa i le mana o le Atua.” – *Testimonies for the Church*, vol. 8, p. 316.

Aso Lua

Iulai 9

3. PULEA E LE TAGATA O IA LAVA, AE LĒ O LE LĒ MAFAI ONA PULEA

a. O le a le mataupu e manatunatu i ai faia’oga o le tala lelei e musuia e le Agaga Paia? Galuega 24:24, 25; Filipi 4:5.

“Na ou tautala atu i tagata e tusa ma le itula atoa ma le ‘afa itula e fa’atatau i le apefa’i o le fa’apaiaina a Peteru, e valu ona la’asaga. Na ou tautala e fa’atatau i le ola fuafua lelei ma le tāua o le a’oa’oina e matua o le fa’afitia e le tagata o ia lava, i a latou fanau, ma le pulea e le tagata o ia lava, ma puipuia ai le mana’o o le ‘ai ma le tofo mai i le tu’inanauga ma fa’aleagaina ai le malosi fa’alemafaufau, amio ma le fa’aletino.

“O lesona e fa’atatau i le pulea e le tagata o ia lava ma le fa’afitia e le tagata o ia lava, e tatau ona maua e ala i a’oa’oga, i le olaga tamaitiiti ma le olaga talavou. O le mana’o i le ‘ai e tatau ona taofia ma a’oa’oina, ma o le galuega leni o matafaioi ua tu’uina mai i matua. O talavou i augātupulaga ua tuana’i, ua avea ma fa’ailoga i tagata.

“Ana fa’apea na faia e matua lo latou tiute i le saunia o le laulau i meaai e lagolagoina ai le ola maloloina o le tino, ma lafoa’ia ai meaai e fa’ama’ia ma fa’aosofia ai tu’inanau leaga, ma latou a’oa’oina ai i le taimi lava lea, le puleaina e le tagata o ia lava i a latou fanau, ma a’oa’oina ai a latou amio ina ia fausia a’e malosi o amioga lelei fa’aleagaga, semanu tatou te lē mana’omia ina ia tau taofiofi le leona o le olaga so’ona fai lē fuafua lelei. A uma ona fausiaina masaniga o le tu’inanauga lē fai fa’atatau lelei, ma tupu a’e fa’atasi ma i latou ma fa’amalosia ai i lo latou malosi, e matuā faigata lava la mo i latou e lē’i koleniina fa’alelei i o latou olaga talavou, ina ia talepe a latou masaniga sese ma a’oa’o ai ina ia taofia i latou lava ma o latou tu’inanauga lē fa’alenatura o le ‘ai. E matuā faigata lava ona a’oa’oina tagata fa’apea ma fautuaina i latou ia latou iloa le tāua o

le fai fa'atatau lelei fa'akerisiano, pe a latou o'o atu i le avea ma tagata matua. O lesona o le fai fa'atatau lelei, e tatau ona amatalia i le pepe i totonu o lona moega." – *The Review and Herald*, May 11, 1876.

b. O le a le la'asaga e so'so'o mai i le apefa'i – ma aisea fo'i? 2 Peteru 1:6 (vaega muamua).

“E lē'i tu'uina mai e le Atua i le tagata se fa'atagaga na te solia ai tulafono o lona tagata ola. Peita'i o le tagata, e ala i lona gau'i atu i fa'aosoosoga a Satani ina ia tu'inanau sa'oloto i le lē fai fuafua lelei, ua aumaia ai tomam sili atu ona maualuga ia gau'i atu i tu'inanauga fa'amanu o le 'ai ma lagona leaga, ma a pule loa nei tu'inanauga fa'amanu, o le tagata lea sa foafoaina e maualalo teisi ifo nai lo agelu, fa'atasi ai ma ona tomam e mafai ona atia'eina i le tulaga sili ona maualuga, ua gau'i atu loa i le pule'aga a Satani. Ma e faigofie ona maua e Satani i latou o loo nofo pologa i le 'ai. E ala i le lē fai fa'atatau lelei i le mana'oga o le 'ai, e fa'asatauroina ai e nisi le 'afa, a'o isi latou te fa'asatauroina le lua o vae tolu, o ō latou malosi fa'aletino, mafaufau, ma le fa'aleagaga. O i latou e manana'o i mafaufau manino latou te iloa ai faufauga a Satani, e tatau ona latou taofia o latou mana'oga fa'aletino o le 'ai i lalo o le pule'aga a manatunatuga potoma le malosi fai filifiliga o le mafaufau. O le gaoiga sa'o ma le finafinau o malosi e sili atu ona maualuga o le mafaufau, e aoga mo le fa'aatoatoaina o le amio fa'akerisiano.” – *The Health Reformer*, March 1, 1878.

Aso Lulu

Iulai 10

4. O LE ONOSA'I E LĒ MAFAI ONA MAUA E AUNOA MA LE PULEAINA MA LE FA'AFITIA E LE TAGATA O IA LAVA

a. E fa'apefea ona ta'ita'ia atu e le fai fa'atatau lelei, i le isi uiga tāua o loo soso'o mai o le apefa'i? 2 Peteru 1:6 (vaega ogatotonu); Luka 21:19.

“So'o se masaniga lava poo se fa'atinoga fo'i o le a fa'avaivaia ai neura ma malosi o le mafaufau poo le malosi fa'aletino fo'i, e fa'alēaogaina ai fo'i mo le fa'atinoina o le alofa tunoa lea e soso'o mai i le fai fa'atatau lelei – o le onosa'i lea. . . .

“O se tagata e lē pulea e ia, ia lava, ma lē fa'afitia e ia, ia lava, na te fa'aaogaina mea e osofia ai tu'inanauga – o le pia, uaina, vai inu malosi, ti ma le kofe, fuala'au oona malolosi e lē lagona ai le tiga, tapa'a, poo se tasi lava o nei mea e matuā fa'amanu'alia ai le ola maloloina – e lē mafai ona avea o ia ma tagata onosa'i. O le pulea la ma le fa'afitia e i tatou o i tatou lava, o se la'asaga lea o le apefa'i e tatau ona matuā mausalī ai o tatou vae, a'o le'i mafai ona tatou fa'aopoopoina le alofa tunoa lea, o le onosa'i. I meaai, ofu, galuega, i itula fa'atulafonoina, i fa'amalositino maloloina, e tatau ai ona fa'atulafonoina i tatou e le iloa, lea o lo tatou tiute le mauaina, ina ia mafai ai ona tatou tu'uina i tatou, e ala i taumafaiga finafinau lava, i so'otaga sa'o i le ola ma le soifua maloloina.” – *Our High Calling*, p. 69.

b. E fa’apefea ona fesoasoani le puleaina ma le fa’afitia o le tagata o ia lava, i le fausiaina a’e o le onosa’i – ma aisea e matuā tāua ai nei uiga e lua i aso mulimuli o le tala’aga o le lalolagi? Fa’aaliga 14:12.

“O le fa’aleagaina o le puta i le so’ona fa’amalieina o le tu’inanau i meaai lē lelei, o le amataga taumasuasua lea o le tele o tofotofoga i le ekalesia. O i latou e a’ai ma galulue lē fai fa’atatau lelei i se uiga valea, latou te tautala fo’i ma gaiou i se uiga valea. O se tagata e lē fai fa’atatau lelei, e lē mafai ona avea o ia ma tagata onosa’i. E lē fa’apea e te inu i ‘ava malolosi ina ia ē lē pulea ma lē fa’afitia ai e oe, oe lava. O le agasala o le lē pulea lelei ma le lē fa’afitia e le tagata o ia lava i le ‘ai, ma le ‘ai so’o, ma le telē tele o le meaai e aina, ma le aina o meaai lololo lē maloloina, e fa’aumatiaina ai gaiouga maloloina a totoga o loo lomiina meaai, e a’afia ai le fai’ai, ma fa’aleagaina ai filifiliga lelei, ma taofia ai manatunatuga ma gaiouga potou, to’a lelei, ma le maloloina. Ma o le mafuaaga leni o fua e tele o tofotofoga i totonu o le ekalesia. O lea la, o le auala e mafai ai e tagata o le Atua ona i ai i se olaga e taliaina e Ia, e mafai ai ona latou vi’ia o Ia i o latou tino ma o latou agaga o Ana meatotino ia, e tatau ona latou fa’afitia ma le naunauta’i ma le vilivilita’i le so’ona fa’amalieina tu’inanau o lo latou mana’o i le ‘ai, ma fa’atino loa le temeperenise poo le fai fuafua lelei i mea uma lava. Ona mafai loa lea ona latou malamalama i le upu moni i lona matagofie ma lona manino, ma fa’atinoina ai i o latou olaga, ma o se olaga fa’autauta, potou, faamaoni, tatou te lē tu’uina atu ai i fili o lo tatou fa’atuatua se avanoa, latou te faitiaina ai le galuega o le upu moni.” – *Testimonies for the Church*, vol. 1, pp. 618, 619.

Aso Tofi

Iulai 11

5. O LE P’UGA MATAGOFIE O LE ONOSA’I

a. O le a le mea e tatau ona fausiaina a’e i totonu ia i tatou e ala i le fa’atinoina o le onosa’i? 2 Peteru 1:6 (vaega mulimuli).

“O le lē onosa’i e aumaia ai fefinaua’iga ma tu’ua’iga ma le fa’anoanoa; peita’i o le onosa’i na te liligiina mai le vaila’au o le filemu ma le alofa i mea uma lava e tutupu o le olaga i le aiga. A tatou fa’atinoina le alofa tunoa o le onosa’i i isi, o le a latou lafoia mai fo’i lo tatou uiga, ma o le a tatou fa’aputu fa’atasi ma Keriso. O le onosa’i, o le a sa’ili mo le loto gatasi i totonu o le ekalesia, i totonu o le aiga, ma tagata lautele. O leni alofa tunoa e tatau ona su’iina i totonu o o tatou olaga. O tagata ta’itasi uma lava, e tatau ona latou la’asia leni sitepu o le aga’i i luga, ma fa’aopoopo ai le alofa tunoa o le onosa’i i le fa’atuatua, amio lelei, ma le pulea fa’afitia e le tagata o ia lava.

“ ‘Ia fa’aopoopo i le onosa’i, le amioatua.’ O le amioatua o le fua lea o le amio kerisiano. Afai tatou te tumau i le Vine, o le a tatou fuaina mai fua o le Agaga. O le ola o le Vine o le a ia fa’aalia ia lava e ala atu i lālā. E tatau ona ia’i tatou se so’otaga vavalalata ma le māfana ma le lagi, pe afai o ia’i tatou le alofa tunoa o le amioatua. O Iesu e tatau ona avea ma mālō fa’aalologia i totonu o o tatou aiga, o se tasi o o tatou aiga, pe afai tatou te lafoiaina atu lona fa’atusa ma fa’ailoa atu o i tatou o atali’i ma afafine o Lē

Silisiliese. O le tapua'iga o se mea matagofie tele lea i totonu o le aiga. Afai o loo fa'atasi Keriso ma i tatou, o le a tatou lagona fo'i o i tatou o tagata o le aiga o Keriso i le lagi. O le a tatou iloa o loo va'ava'ai mai agelu ia i tatou, ma o o tatou uiga o le a agalelei ma onosa'i. O le a tatou sauni mo le ulufale atu i lotoā o le lagi, e ala i le fausiaina a'e o le fa'aaloalo ma le amioatua. O a tatou talanoaga o le a paia, ma o o tatou manatu o le a i ai lea i mea fa'alelagi.

“Na savavali Enoka ma le Atua. Na ia fa'amamaluina le Atua i mea uma lava o le olaga. I totonu o lona aiga ma lana galuega, na ia fesili ai fa'apea, ‘O le a taliaina ea lenei mea e Ieova?’ Ma o lona manatuaina o le Atua, ma lona mulimuli i Lana fautuaga, na liua ai lana amio, ma avea ai loa o ia ma tagata amioatua, o ona ala na fiafia mai i ai le Atua.”
– *The Review and Herald*, February 21, 1888.

Aso Faraile

Iulai 12

FESILI TOE FA'AMANATU

1. **Aisea ou te mana'omia ai ina ia ou fausia a'e uiga lelei fa'akerisiano e galue ma gaua'i?**
2. **E fa'apefea ona mafai ona ou sa'ili ina ia ou iloa atili le Atua – ma aisea e aoga tele ai lenei tulaga i le taimi lenei?**
3. **O a vaega o le olaga ou te mana'omia ina ia fa'atinoina ai le temeperenise fai fuafua lelei sili atu?**
4. **Aisea e matuā tāua tele ai le onosa'i i totonu o se lalolagi ua matuā fa'atupulaia ai le uiga sauā ma le fa'amisa?**
5. **O fea ma e fa'apefea fo'i ona fa'aalia le amioatua, e fa'apei ona fa'ailoa mai e Enoka?**

Lesona 3

Sapati, Iulai 20, 2024

Ia Tausolomua Ona Ava o le Tasi i le Tasi

MAU TAULOTO: “Ia fefa'apalepalea'i i le fealofani o uso; ia tausolomua ona ava o le tasi i le tasi” (Roma 12:10)

“Ia fausia a'e se uiga e manatu lelei ai e fa'atatau i isi e sili a'e nai lo oe. Ia itiiti ifo lou fa'alagolago ia te oe lava, ia itiiti ifo lou talitonu ia te oe lava; ia teufatuina le onosa'i, fa'apalepale, ma le alofa fa'aleuso.” – *Testimonies for the Church*, vol. 4, p. 133.

Faitauga Fautuaina: *Testimonies for the Church*, vol. 5, pp. 167-177.

Ulua'i Aso

Iulai 14

1. AGALELEI

a. O le a se mea e tatau ona tafe atu o le i’uga fa’alenatura lea o se mafutaga mafana moni ma le Atua? 2 Peteru 1:7 (vaega muamua); Mareko 12:28-31.

“Ia si’itia i luga le tapula’a, ia si’itia i luga, ia maualuga ma ia sili atu ona maualuga. Ia fa’asino atu tagata i le mataupu lona lua sefulu o Esoto, lea o loo tusia ai iina le tulafono a le Atua. O ulua’i poloa’iga e fa o poloa’iga e sefulu, o loo fa’amatala mai ai lo tatou tiute i lo tatou Atua-foafoa. O le tagata e lē fa’amaoni i lona Atua, e lē mafai ona ia fa’amaoni i lona tuaoi. O lē e alofa silisili i le Atua, o le a ia alofa i lona tuaoi e fa’apei o ia lava. O le fa’amaualuga na te si’itia a’e o ia i le fa’alialiavale, ma ta’ita’ia ai le mea faigaluega fa’aletagata ina ia faia o ia ma atua. O le tala lelei a Keriso e fa’apaiaina ai le agaga, ma tulieseai ai le alofa o le tagata ia te ia lava.” – *Testimonies for the Church*, vol. 9, pp. 211, 212. [Author’s emphasis.]

“E leai se tasi e mafai ona alofa ia Keriso ae lē alofa i Lana fanau. A tatou fa’atasi atu loa ia Keriso, ua ia i tatou loa le mafaufau o Keriso. O le olaga mamā ma le alofa ua susulu atu i le amio, o le agamalu ma le upu moni ua puleaina ai le olaga. O uiga tonu lava o foliga, ua suia. O Keriso lea ua afio tumau i totonu o le loto, ua Ia tu’uina maia se mana e liua ai, ma o foliga i fafo, e molimau i le filemu ma le olioli o loo pule aoao i totonu. Tatou te feinu i le alofa o Keriso, e fa’apei ona maua mai e le lālā le meaa mai i le vine. Afai ua fa’atasia atu i tatou i totonu ia Keriso, afai o le filo i lea filo ua fa’atasia atu ai i tatou i le Vine ola, o le a tatou tu’uina atu le fa’amaoniga o lea mea moni e ala i lo tatou fuaina mai o fuifui vine matagofie o fua ola. Afai ua fa’atasia atu i tatou i le Malamalama, o le a avea fo’i i tatou ma mea faigaluega o le malamalama, ma i a tatou upu ma galuega, o le a tatou lafoia atu ai le malamalama i le lalolagi.” – *Selected Messages*, bk. 1, p. 337.

Aso Gafua

Iulai 15

2. AGALELEI MAI I LE LOTO

a. E fa’apefea ona feso’ota’i vāvālalata atu lava le agalelei fa’aleuso i le fa’atuatua moni i le Atua – ma se molimau sa’o mo Keriso? 1 Ioane 4:20, 21; Iakopo 3:17.

“Ua apoapoa’iina i tatou ina ia fa’aopoopo le amioatua, le agalelei fa’aleuso. Oka lo tatou mana’omia tele ia tatou la’asiaina lenei sitepu, ina ia fa’aopoopo lenei uiga i a tatou amio! I totonu o le tele o ō tatou aiga, o loo fa’aalia ai se uiga faigatā, finau, fai taua. O upu faitio ma gaioiga lē agalelei e inosia e le Atua. O fa’atonuga fia pule ma uiga fa’amaualuga fia pule e lē taliaina e le Atua. O le mafua’aga o le tele o eseesega o lo o i ai i le va o le au uso, ona ua latou lē fa’aopoopoina le agalelei fa’aleuso. E tatau ona i ai ia i tatou lena alofa mo isi, lea sa iā Keriso mo i tatou. O le tagata e fuaina e le Ali’i o le lagi i lona tau moni. Afai e lē agalelei o ia i totonu o lona aiga i le lalolagi lenei, e lē agava’a fo’i o ia mo le aiga i le lagi. Afai na te mana’o e fai lava lona lava loto, tusa lava po’o ai e tiga ai, o le a ia lē loto malie fo’i i le lagi, se’ivagana ua ia pule ai iina. O le alofa o Keriso e tatau ona puleaina ai o tatou loto, ma o le filemu o le Atua o le a afio tumau i totonu o ō tatou aiga. Sa’ili le Atua ma se loto nutimomoia ma le salamō, ma o le a fa’aliousuavaiina

oe i le alofa mutimutivale aga'i i lou au uso." – *The Review and Herald*, February 21, 1888.

b. Ta'u mai se sitepu fa'avae i le fausiaina a'e o le agalelei fa'ale-uso. Mataio 6:12, 14, 15; Efeso 4:32.

“Tatou te ole atu ina ‘ia fuaina mai e le Atua Lona alofa tunoa mo i tatou, e tusa ma le alofa tunoa tatou te foa'iina atu i isi. Ua fa'ailoa mai e Keriso, o le tulafono lea o le a foa'iina mai ai e le Atua ia i tatou Lona alofa tunoa. [Mataio 6:14, 15.] Oka se matagofie o aiaiga! peita'i e matuā itiiti lava le malamalama o loo i ai nei, po'o le taliaina fo'i o nei aiaiga. O le tasi o agasala sili ona ta'atele, ma o le agasala lea e faia ma ona i'uga e sili ona fa'aumatiaina ai, o le fa'atagaina lea o se uiga lē fa'amagalo. E matuā to'atele lava tagata o le a teufatuina le ita poo le tauimasui fo'i, ae mulimuli ane ona latou ifo lea i luma o le Atua ma ole atu ina ia fa'amagaloina i latou a'o latou fa'amagalo atu fo'i. E mautinoa lava, e lē mafai ona latou maua se iloa moni o le tāua o lenei tatalo, ana latou iloa, semanu latou te fefefe e tautalagia i lenei tatalo i o latou laugutu. O loo tatou fa'alagolago i le alofa tunoa fa'amagalo o le Atua i aso ta'itasi ma itula ta'itasi; e fa'apefea la ona mafai ona tatou teufatuina le ita tele ma le loto leaga aga'i i o tatou uso a tagata agasala! Afai, i feso'ota'iga uma lava a kerisiano i aso ta'itasi, o le a latou tauaveina ma fa'atinoina ai tapula'a o lenei tatalo, oka se suiga matagofie o le a faia i totonu o le ekalesia ma le lalolagi! O le molimau sili lea ona mafai ona fa'atalitonuina ai, e mafai ona tu'uina atu i le moni o le tapua'iga fa'ale-Tusi Paia.” – *Testimonies for the Church*, vol. 5, pp. 170, 171.

Aso Lua

Iulai 16

3. FA'ATO'ILALOINA O MEA E FA'ALAVELAVE I LE AGALELEI FA'ALEUSO

a. Fa'amatala le lautele ma le loloto o le agalelei fa'aleuso moni. Roma 12:9, 10; Filipi 2:3.

“E mana'o Paulo ina ia tatou iloa le eseesea i le va o le alofa mamā, lē fa'apito, lea e osofia e le Agaga o Keriso, ma le uiga fa'atagā alofa leai se uiga, taufa'asese lea o loo tumu ai le lalolagi. O lenei alofa pepelo fa'afoliga, ua ta'ita'iseseina ai le tele o tagata. O le a soloiesea ai le eseesea i le va o le sa'o ma le sese, e ala i le loto gatasi fa'atasi ma le tagata solitulafono, e aunoa ma le fa'ailoaina atu ma le fa'amaoni ia te ia o ona sese. O se alofa fa'apea, e lē puna a'e lava mai i fefa'auoa'iga moni. O le agaga o loo osofia ai, e na o le loto fa'aletino lava e nofo ai. A'o agalelei i taimi uma le kerisiano, mutimutivale, ma fa'amagalo, e lē mafai ona ia lagona se loto gatasi ma le agasala. O le a ia inoino i le agasala ma pipi'i atu i mea lelei, i le lafoa'ia ai o feso'ota'iga po'o faigā uo fo'i ma i latou e lē amio atua. O le Agaga o Keriso o le a ta'ita'ia ai i tatou ina ia tatou inoino i le agasala, a'o loo tatou naunau ai e faia so'o se taulaga lava e fa'afitia ai i tatou, ina ia lavea'iina le tagata agasala.” – *Testimonies for the Church*, vol. 5, p. 171.

b. O le a se mea e masani ona fa'aleagaina ai le agalelei fa'aleuso – ma e fa'apefea ona mafai ona lavea'iina i tatou mai i se mailei fa'apea? Luka 6:45; Eperu 12:15.

“O upu uigā ua lafoina atu, ma faitioga ma'ama'ai o le tasi i le isi, peita'i o le taimi lava lea e tasi, o i latou tonu lava ia o loo lafoina atu nei fa'aupuga uigā ma faitioga, o lo o tauaso i o latou lava vaivaiga.” – Ibid., vol. 4, p. 222.

“O le tautala i upu taufa'aleaga, o se mala fa'aluaina lea, e sili atu le mamafa o lona pa'u mai i lē e tautalagia ia upu tau fa'aleaga nai lo lē o loo fa'alogi i ai. O lē na te fa'asalalauina fatu o fevaevaea'iga ma fefinaua'iga, na te seleseleina i totonu o lona lava agaga fua e oti ai. E matuā pagatia lava le tagata na te fela'ula'ua'i solo tala, le tagata e manatunatu ma fa'atupu fa'amatalaga leaga e fa'atatau i mea leaga na te masalosalo o loo faia e isi! . . .

“O le agasala o le faia o tala taufa'aleaga, e amata i le teufatuina o manatu leaga. O le pepelo fa'aoleole taufa'asese fa'alata, e aofia ai le amio lē mamā i ona foliga uma lava. O se manatu lē mamā e fa'atagaina, o se fa'anaunauga lē paia ua teufatuina, ma ua fa'a'ele'eleaina ai loa le loto, o lona fa'amaoni ua fa'aleagaina. . . . Afai tatou te lē manana'o tatou te faia le agasala, e tatau ona tatou inoino i ona amataga tonu lava. O lagona ma fa'anaunauga ta'itasi uma lava, e tatau ona taofia ia usita'i atu i le manatunatuga poto ma le malosi fai filifiliga o le mafaufau. O manatu lē paia ta'itasi uma lava e tatau ona te'ena i le taimi lava e o'o mai ai. So'o o Keriso, o atu i o outou afeafe. Ia outou tatalo ai i le fa'atuatua ma o outou loto atoa lava. O loo va'ava'ai mai Satani ina ia maileia o outou vae. E tatau ona outou maua le fesoasoani mai i lugā pe afai tou te manana'o tou te sao ese mai i ana mailei.” – Ibid., vol. 5, pp. 176, 177.

Aso Lulu

Iulai 17

4. FA'AMAONIGA MAUTINOA O LE AVEA MA SO'O

a. A'o ma'alili le alofa o le to'atele, o le a le tapula'a fa'ale-Tusi Paia e masani lava ona galo ia i tatou? Tito 3:2. O le a le mea o le a tupu pe afai tatou te amanaiaina lea tapula'a? Ioane 13:35.

“Ia fa'ataga 'lē o loo tu'ua'ia le au uso' na te ulufale atu i totonu o le loto o se tasi o nei tane [i latou e tutusa o latou fa'atuatuga], ma puleaina ai le mafaufau ma manatunatuga, ma foafoaina ai loa manatu fuā loto leaga, ma ua teufatuina loa le masalosalo ma le anovale; ma o lē na manatu o loo saogalemu o ia i le alofa ma le uiga fa'auo o lona uso, ua ia iloa ua lē talitonuina o ia, ma o ana sini ua fa'amasinoseseina. O le uso pepelo ua galo ia te ia ona lava vaivaiga fa'aletagata, ua galo ia te ia lona matafaioi ia aua na te manatu pe tautala e fa'atatau i se mea leaga, ne'i ia lē vi'ia le Atua ma ia fa'amanu'alia ai Keriso, i peresona o Lana au paia, ma o uiga leaga ta'itasi uma e mafai ona manatu i ai pe va'aia fa'alemaufau fo'i, ua faia aga'i i ai fa'amatalaga e aunoa ma le alofa, ma o le amio a se tuagane ua manatu i ai e pogisa ma fesiligia.

“Ua fa'alataina matafaioi paia. O mea sa tautalagia i le fa'atuatuga fa'aleuso, ua toe fa'amatalaina ma ua fa'auigaseseina; ma o upu ta'itasi, o gaoiga ta'itasi, tusa lava

po'o le a le fa'amaoni ma le lelei o manatu na tautalagia ai, ua va'ili'iliina e le faitioga lē alofa fuā loto leaga a i latou sa manatu i ai e amiotonu tele, ma fa'aaloaloga tele o lea latou te lē fa'aaogāseseina ai, i se tulaga sili ona itiiti, so'otaga fa'auo poo le talitonuga fo'i fa'ale-uso. O loto ua punitia ese mai i le alofa tunoa, ma le fa'amasinoga, ma le alofa o le Atua; ma ua fa'aalia mai ai le uiga lē alofa, 'ata'ata fa'atauemu, fa'a'amuamu fa'aulaula lea e lafoia mai e Satani i lē ua ia maileia.

“O le Fa'aola o le lalolagi na fa'apena ona tauemuina o Ia, ma ua lamatia fo'i i tatou i le a'afiaga o le agaga sauā lava lea e tasi. Ua o'o mai le taimi e lē o toe saogalemu ai ona toe tu'u lou fa'atuatuga i se uo po o se uso.

“E fa'apei o aso o Keriso, o sipai sa mulimuli i Ona ala uma, ma ua fa'apena fo'i ona i ai sipai i o tatou ala i le taimi lenei. Afai e mafai ona fa'aaoga e Satani i latou e ta'utino mai o i latou o tagata talitonu, e galulue e aveia ma tagata e tu'ua'iina le au uso, ua ia matuā fiafia lava la; auā o i latou o loo faia lenei tulaga, o loo latou auauna moni lava ia te ia e fa'apei ona faia e Iuta ina ua ia fa'alataina Keriso, e ui lava atonu o loo latou faia ma le lē iloa.” – *The Review and Herald*, June 3, 1884.

“Afai o manino se agasala i se uso, aua ne'i mānavaina atu i se isi lava tagata, peita'i o le alofa mo le agaga o le uso, fa'atasi ai ma se loto e tumu i le alofa mutimutivale, fa'atasi ai ma le tele o le alofa tunoa, ia e ta'u atu ai ia te ia le sese, ona tu'ua lea o le mataupu ia te ia ma le Ali'i. Ua uma ona ē faia lou tiute. E lē tatau ona ē faia se fa'asalaga.

“Ua faia o se uiga māmā lava le fa'agutuina o se tuagane, ma faitiaina o ia, ma taofia ai o ia i lalo o le fa'asalaga. O loo i ai se naunauta'iga mo le Atua, peita'i e lē tusa ma le iloa. Afai o le a fa'atulaga lelei e tagata ta'itasi uma lona lava loto, a feiloa'i fa'atasi le au uso, o la latou molimau o le a sauni ma o le a aumaia mai i se loto tumu atoatoa, ma o tagata e lē talitonu i le upu moni o loo si'omia mai, o le a latou lagonaina. O le fa'aaliga a le Agaga o le Atua o le a ta'uina atu i o latou loto o outou o fanau a le Atua.” – *Testimonies for the Church*, vol. 1, p. 165.

Aso Tofi

Iulai 18

5. I LE ALA ATOA LAVA E O'O I LE I'UGA

a. O le a le olega ua faia mai i le ekalesia se'ia o'o i le i'uga o le taimi? Eperu 13:1.

“O se alofa ma le agalelei lea e fa'ato'a maua pe afai e ioeina o tatou ala e a tatou uo e fa'apea e sa'o, e leai sona aoga moni, auā o se tulaga fa'alēnatura lea i le loto lē fa'afouina. O i latou e ta'utino mai o i latou o fanau a le Atua ma o loo savavali i le malamalama, e lē tatau ona latou lē fiafia pe feita fo'i pe a kolosiina lo latou ala e se tagata.

“E te fiafia i le upu moni ma e te naunau mo lona tauaveina i luma. O le a tu'uina oe i mea eseese e tutupu ina ia tofotofoina ai oe. Atonu o le a ē fausiaina a'e se amio moni fa'akerisiano pe afai o le a ē gaua'iina atu oe i le koleniga. O ou naunauta'iga e sili ona tāua, ua lamatia. O le mea e sili ona ē mana'omia, o le fa'apaiaina moni lea ma se agaga o le fa'afitia e le tagata o ia lava. Atonu tatou te maua se iloa e fa'atatau i le upu moni, ma

tatou faitauina ona mea lilo sili ona natiaina, ma tu'uina atu o tatou tino ina ia susunuina mo le upu moni; peita'i, afai e lē o i ai ia i tatou le alofa ma le agalelei mutimutivale, ua na o i tatou lava o ni apa memea ta'alili ma se sumepalo tagitagi. . . .

“E matuā itiiti lava lou iloa e fa'atatau i tofotofoga i loto o tagata mafatia o ē o loo saisaitia i filifili o le pouliuli ma e lē o i ai ni a latou filifiliga mausali ma malosi o le amio. Finafinau ina ia ē malamalama i vaivaiga o isi. Fesoasoani i ē o loo mana'omia le fesoasoani, fa'asatauro e oe, oe lava, ma ia fa'atagaina Iesu na te pulea lou loto, ina ia mafai ai ona ē fa'ataunu'uina tapula'a o le upu moni i lou olaga i aso ta'itasi. O le a avea loa oe, e lē'i fa'apea lava muamua, o se fa'amanuiaga i le ekalesia ma i latou uma lava e te feso'ota'i i ai.” – *Testimonies for the Church*, vol. 4, pp. 133, 134.

“Afai o le a avea o tatou uso ma o tatou tuafafine o ni misionare mo le Atua, ma asiasi atu i ē mama'i ma puapuagatia, ma galulue ai ma le onosa'i ma le agalelei mo ē o loo sese – i se fa'amatalaga pu'upu'u, afai o le a latou fa'aa'oa'o ia Iesu – o le a i ai le manuia i le ekalesia i ona tuaoi uma lava.” – *Ibid.*, vol. 5, p. 176.

Aso Faraile

Iulai 19

FESILI TOE FA'AMANATU

1. **Fa'amatala po'o le a se mea e mafai ona va'aia e isi i le amio a lē e alofa i le Atua.**
2. **E fa'apefea ona mafai ona ou fausiaina a'e se lagona sili atu ona malosi o le agalelei fa'ale-uso i totonu o lo'u loto?**
3. **I le lotolotoi o i latou ou te iloa, o ai e tatau ona ou fa'ailoa atu i ai le agalelei sili atu ona loloto?**
4. **E fa'apefea ona mafai ona ou fa'aigoaina le agasala i lona igoa sa'o ma ou alo ese ai mai i se uiga tu'ua'i?**
5. **I o'u manatunatuga, aisea e tauau ai ina ou so'ona tu'ua'ia nisi atonu e vaivai?**

Lesona 4

Sapati, Iulai 27, 2024

O Le Sini e Sili Ona Maua-luga

MAU TAULOTO: “Ae e sili ai i nei mea uma, ia outou oofu i le alofa, o le fusi lea e atoatoa ona lelei ai” (Kolose 3:14).

“A fa'apotopoto tagata talitonu fa'amaoni, o a latou talanoaga, o le a lē faia e fa'atatau i vaivaiga o isi pe muimui po'o le faitio fo'i; ae o le alofa, le fusi o le atoatoaga, o le a si'omia ai i latou.” – *Testimonies for the Church*, vol. 1, p. 509.

Faitauga Fautuaina: *Testimonies for the Church*, vol. 5, pp. 154-157, 547-549.

1. MAUALUGA MA SILI ATU NAI LO LAGONA FA'ALENATURA

- a. **Aisea ua ta'u mai ai le alofa ina ua mavae le agalelei fa'aleuso? 2 Peteru 1:7 (vaega mulimuli); Roma 5:7, 8; Iakopo 3:17.**

“E tatau ona tatou alolofa i tagata ona o Keriso. E faigofie i le loto fa'alenatura ona alofa i ni nai tagata to'aitiiti e sili lona fiafia i ai, ma alofa fa'apito ai i nei tagata fa'apittoa to'aitiiti; peita'i ua fa'atonu mai Keriso ia i tatou ina ia tatou alolofa le tasi i le isi e fa'apei ona Ia alofa mai ia i tatou.” – *Testimonies to Ministers*, p. 156.

- b. **O le a le mea o loo feso'ota'i atu e Iesu i le atoatoaga? Mataio 5:43-48; Luka 6:36; Kolose 3:14.**

“Na ofo tagata i le mamā ma le mamalu o le amio a lo tatou Fa'aola, a'o Lona alofa lē fa'apito ma Lona agalelei agamalu, na manumaloina mai o latou loto. O Ia o le fa'aaliga atoa o le lelei atoatoa.” – *Gospel Workers*, p. 73. [1892 edition.]

“Aua le teufatuina se lagona fia pule fa'amaualuga, ma ē manatu ai e sili atu oe nai lo isi. 'Ia fa'aeteete lē o loo manatu o loo ia tū ne'i pa'ū.' O le filemu ma le malologa o le a o'o mai ia te oe a'o ē aumaia lou loto i le gaua'i atu i le finagalo o Keriso. O le a pule loa le alofa o Keriso i totonu o le loto.” – *Messages to Young People*, p. 73.

2. O LE AMIO FA'ALELAGI UA FOA'IINA MAI

- a. **Fa'amatala le loloto o le uiga o se kerisiano moni e fa'atatau i isi. Salamo 101:2; Filipi 2:1-4.**

“O le ita, osofia gofie o le a fa'afilemuina ma fa'ato'ilaloina e le suau'u o le alofa tunoa o Keriso. O le lagonaina o agasala ua fa'amagaloina, o le a aumaia ai lena filemu e silisili nai lo malamalama'aga uma. O le a i ai le taumafaiga finafinau lava ina ia manumalo mai i mea uma lava e tete'e i le atoatoaga fa'akerisiano. O fe'eseesea'iga o le a mou ese atu. O lē na sa'ili'ili masei muamua ia i latou i ona itu uma, o le a ia iloa, o sese e matuā sili atu ona tetele o loo i ai lea i lana lava amio.” – *Messages to Young People*, p. 73.

- b. **O le a le auala e tasi lava e mafai ai ona tumau le ituaiga uiga lea o loo fa'amatalaina i luga, i totonu o loto o i tatou ta'ito'atasi? Filipi 2:5-8; 1 Korinito 2:16.**

“O le alofa o le tagata ia te ia lava lea e fa'aumatiaina ai lo tatou filemu. A'o ola atoa le tagata tuai, o lea tatou te tula'i ai ma sauni i taimi uma lava e puipuia a'u mai i le

fa'alumaina ma upu faifai mai; peita'i a tatou feoti loa, ma ua natia lo tatou ola fa'atasi ma Keriso i totonu i le Atua, o le a lē tigā o tatou loto ona o uiga fa'atalalē mai po o le lē amanaia mai fo'i o i tatou e tagata. O le a tatou tutuli i upu faifai mai ma o le a tatou tauaso i fa'atauemuga ma upu fa'alumaluma mai. . . .

“O le filemu o Keriso, o se filemu lea i taimi uma lava ma e tumau. E lē fa'alagolago i so'o se mea lava e tupu i le olaga, po'o le tele o oa fa'alelalolagi poo le tele fo'i o uo fa'alelalolagi. O Keriso o le vai puna lea o vai ola, ma o le fiafia e aumaia mai ia te Ia, e lē mafai ona muta.

“O le agamalu o Keriso, e fa'aalia i totonu o le aiga, o le a fa'afiafiaina ai tagata o le aiga; e lē fa'aosofia ai ni finauga, e lē toe tautalagia mai ai se tali ita, peita'i e fa'afilemuina ai le ita tele ma fa'asalalau atu ai se uiga agamalu e lagonaina e i latou uma lava oi totonu o lona li'o fiafia. So'o se nofoaga lava e teufatuina ai le agamalu o Keriso, e faia ai lava aiga oi le fogaeleele o se vaega o le aiga tele e tasi i lugā.

“O le a matuā sili atu mo i tatou lo tatou puapuaga i lalo o tu'ua'iga sese, nai lo lo tatou faia ia i tatou lava o le sauāga i lo tatou tau'i ma sui atu i o tatou fili. O le agaga o le ita ma le tau'i ma sui na ulua'i amata ia Satani, ma e na o le leaga lava e mafai ona aumaia ai i luga o lē na te teufatuina. O le loto maulalo, lena agamalu, o le fua lea o le tumau i totonu ia Keriso, o le mea lilo moni lea o le fa'amanuiaga. ‘O le a Ia fa'amatagofieina ē e agamalu i le fa'aolataga.’” – *Thoughts From the Mount of Blessing*, pp. 16, 17.

Aso Lua

Iulai 23

3. ALOFA: ALOFA MONI FA'AFEAGAI MA LE ALOFA SESE

a. Fa'amatala le alofa moni ua sauni le Atua e foa'i mai ia i latou uma o ē naunau e taofimau moni lava – ma teufatuina loloto lava lea alofa moni. Mataio 5:6; 1 Korinito 13:4-8.

“O le auala mo le ekalesia e manuia ai, e tataua ona i ai se taumafaiga su'esu'eina e ona tagatā ekalesia, ina ia latou teufatuina le la'au tāua lava o le alofa. Ia faia auala uma ina ia mafai ai ona tupu lauolaola i totonu o le loto. O kerisiano moni ta'itasi uma lava o le a ia fausiaina a'e i totonu o lona olaga uiga o lenei alofa fa'alelagi; o le a ia fa'aalia se uiga o le fa'apalepale, o le loto foa'i, ma se sa'olotoga mai i le anovale ma le fuā loto leaga. O lenei amio ua fausiaina a'e i upu ma gaioga, o le a lē tuliese tagata, o le a lē fa'afaigatā fo'i ona talanoa i ai tagata, lē tali leleia tagata, ma lē ano i naunauta'iga o isi. O le tagata na te teuteuina le la'au tāua o le alofa, o le a ia fa'afitia o ia e ia lava, ma o le a ia lē lafoa'ia lona puleaina o ia e ia lava, e tusa lava pe a fa'aosoina mai lona ita e se isi tagata. O le a ia lē tu'ua'iina atu mafua'aga sese ma faufauga leaga i sini a isi tagata, peita'i o le a matuā loloto lona fa'anoanoa ona o le agasala pe a iloa i so'o se tasi lava o so'o o Keriso.

“E lē mitamitavale le alofa. O se uiga agamalu; e lē osofia ai lava se tagata ina ia gugutu ma fa'alialiavale, ina ia fa'afefeteina o ia lava. O le alofa mo le Atua ma o tatou uso a tagata, o le a lē fa'aalia i gaioga fa'ata'alise fa'atautala po o le ta'ita'iina ai fo'i o i tatou ina ia tatou fia pule, sa'ili'ili masei, poo le fia fai fa'atonuga atu ai fo'i i isi. O le

alofa e lē fa’afefeteina. O le loto o loo pule aoao ai le alofa, o le a ta’ita’iina atu i se uiga agamalu, fa’aaloalo, mutimutivale o le amio aga’i atu i isi, tusa lava pe fetau ma o tatou manatu pe leai fo’i, pe latou te fa’aaloalo mai ia i tatou pe leai fo’i. O le alofa o se tapula’a gaioi lea; e fa’atumauina ai i taimi uma le lelei o isi i o tatou luma, ma fa’apena ona taofia ai i tatou mai i gaioiga lē lelei ne’i tatou to’ilalo i la tatou sini i le manumaloina mai o agaga ia Keriso. O le alofa na te lē sa’ilia ana lava mea. O le a ia lē fautuaina tagata ina ia latou sa’ilia lo latou lava filemu ma le so’ona fa’amalieina o i latou lava. O le fa’aaloalo lea tatou te tu’uina ia te *a’u* lea e masani lava ona fa’aleagaina ai le tuputupu a’e o le alofa.” – *Testimonies for the Church*, vol. 5, pp. 123, 124.

b. O fa’apefea ona lapata’ia i tatou e fa’atatau i le alofa sese? Iakopo 2:19; Iuta 11-13.

“O Elder B-----t na foliga mai o ia o se tane paia. E tele ana upu na tautalagia e fa’atatau i le alofa. O lona talanoa e fa’atatau i le fa’atuatua na ia fai mai ai, ‘Na pau lava le mea e tatau ona tatou faia o le talitonu lea, so’o se mea lava la tatou te ole atu ai i le Atua, o le a foa’iina mai.’ Na tali atu Bro. White, ‘O fa’amanuiaga o folafolaga e foa’iina mai i aiaiga. Ioane 15:7: Afai tou te tumau i totonu ia te A’u ma tumau fo’i A’u upu i totonu ia te outou, so’o se mea tou te ole atu ai, o le a foa’iina mai ia te outou. O lou manatu e fa’atatau i le fa’atuatua, e gaoga’i’i e fa’apei o se paelo teu falaoamata e leai ni ona ufiufi i ona itu e lua. Ma e tusa ai la ma le alofa moni, o ia o se peresona ma’ale’ale lava, na te lē la’a atu lava i fafo atu o le ala o le upu moni fa’ale-Tusi Paia.’” – *Spiritual Gifts*, vol. 2, pp. 46, 47.

Aso Lulu

Iulai 24

4. O SE MATAUPU TAUA TELE

a. O le a le tāua mo i tatou ina ia tatou taumasuasua i alofa tunoa fa’akerisiano uma lava o loo tusia mai o ni la’asaga ia i le apefa’i a Peteru? 2 Peteru 1:8.

“Ia taumasuasua ma ia i ai alofa tunoa fa’akerisiano i totonu ia te outou. Avatu i lou Fa’aola ou lagona silisili ma sili ona paia. Ia tu’uina atu le usita’i atoatoa i Lona finagalo. O le a Ia lē talia se mea e itiiti ifo nai lo lenei. Aua ne’i liliueseina oe mai i lou fa’amaoni mausali i tauemuga ma upu faifai a i latou ua tu’uina atu o latou mafaufau i le fa’amauualuga fa’alialiavale. Mulimuli i lou Fa’aola i le lotolotoi o ripoti leaga ma ripoti lelei; ia ē manatu o le olioli atoa, ma o se mamalu paia, lou tauaveina o le satauro o Keriso. E alofa Iesu ia te oe. Na Ia maliu mo oe. Se’ivagana ua ē sa’ili e te auauna ia te Ia ma ou lagona alofa lē vaeluaina, o le a ē lē manumalo i le fa’aatoatoaina o le fa’apaiaina i le mata’u ia te Ia, ma o le a una’iina oe ina ia ē fa’alogo mulimuli atu lava i upu mata’utia fa’apea, *O ese atu ia.*” – *Testimonies for the Church*, vol. 2, p. 237.

b. I le lalolagi popole o le taimi lenei, o le a se mea o loo masani ona tatou lē amana’ia? Pese a Solomona 2:15.

“O loo ē pagatia i popolega, avega, ma tiute fa’ata’alise; peita’i o le sili atu o le tele o le popole i luga ia te oe, ma o le sili atu o le mamafa o avega e tatau ona ē tauaveina, o le sili atu fo’i lena o le telē o lou mana’omia o le fesoasoani fa’alelagi. O Iesu o le a avega ma ou fesoasoani. E te mana’omia i taimi uma lava, le malamalama o le ola e fa’amalamalamaina ai lou lava ala, ona lafoia atu loa lea o ona ave fa’aleatua i luga o isi. O le galuega a le Atua, o se atoaga atoatoa ona lelei lea, auā e atoatoa ona lelei i ona vaega uma lava. O le va’ava’ai toto’a mae’ae’a fa’aeteete i mea ia e fa’aigoaina e le lalolagi o mea iti, lea e faia ai le matagofie tele ma le fa’amanuiaina o le olaga. O galuega iti o le alofa, o upu itiiti o le agalelei, o gaioiga iti o le fa’afitia e le tagata o ia lava, o se fa’aleleia atili ma le poto o avanoa laiti, o le fausiaina a’e ma le finafinai o taleni itiiti, e ta’uta’ua ai tagata i le silafaga a le Atua. Afai e faia ma le fa’amaoni na mea iti, afai e i ai nei alofa tunoa i totonu ia te oe, ma taumasuasua, o le a fa’aatoatoaina ai oe i galuega lelei uma.

“E lē lava lou mana’o e te foa’i se vaega tele mai i au tupe i le galuega a le Atua. Ua Ia valaa’u mo se tuuina atu atoatoa o ou malosi uma lava. O lo outou taofia mai o outou lava, o le mea sese lea o lou olaga. Atonu e te manatu e faigata tele ia te oe le fa’atumauina o se so’otaga vavalalata ma le Atua, peitai o lau galuega o le a fa’asefuluina lona faigata pe afai e te lē faia lenei tulaga. . . .

“Ua vala’au le Atua mo le tu’uina atu fa’apaiaina atoatoa o oe atoa lava, ma, so’o se mea lava e itiiti ifo nai lo lenei, o le a Ia lē talia. O le sili atu o le faigata o lou tulaga, o le sili atu foi lena o lou mana’omia o Iesu.” – Ibid., vol. 4, pp. 543, 544.

Aso Tofi

Iulai 25

5. MATA’UTIA LE LEAGA O LE FA’AGALO = TAUASO

a. Afai e lē o i ai ia i tatou so’o se tasi lava o alofa tunoa fa’akerisiano, o le a le mea ua tupu? 2 Peteru 1:9; Fa’aaliga 2:4.

“O le tagata e lē a’e i luga o le apefa’i o le savaliga ma fa’aopoopo ai le alofa tunoa i le alofa tunoa, ‘e tauaso o ia, ma e lē mafai ona va’ai mamao ese atu,’ na te lē iloa, o lona lē la’asia o nei la’asaga fa’amanuiaina i le aga’i a’e i luga o le apefa’i i sitepu ta’itasi, i le tuputupu a’e i le alofa tunoa ma le iloa e fa’atatau i lo tatou Ali’i o Iesu Keriso, na te lē o tu’uina o ia i se tulaga e mafai ona sulugia ai o ia e le malamalama o le Atua o loo i luga o le apefa’i. Talu ai ona na te lē o fa’aopoopoina le alofa tunoa i le alofa tunoa, ua ia fa’agaloina ai mana’oga o le Atua i luga ia te ia, ma sa tatau ona ia maua le fa’amagaloga o agasala e ala i le usita’i i mana’oga o le Atua. O loo i ai o ia i le tulaga o se tagata agasala i luma o le Atua. Afai o lo o ia te ia alofa tunoa o Keriso, o le a ia fa’atinoina ma fa’ateleina nei alofa tunoa, peita’i afai na te lē fuaina mai fua i galuega lelei mo le vi’iga o le Atua, ona tumau ai lava lea o ia i se tulaga tauaso ma le lē malamalama, fa’amalieina tu’inanau o ona lava mana’oga, ma le agasala. E ‘lē mafai ona ia va’ai mamao ese atu.’ O ona mata o loo taula’i atu i luga o le fogaeleele, ae lē o le Atua i luga o le apefa’i.

“O lenei vasega, atonu e i ai o latou fa’amanuiaga fa’alelalolagi peita’i, e leai so latou va’ai fa’aleagaga i le avanoa sili ona taua ma fa’amanuiaga o le ola i totonu o le malamalama lea e susulu mai i le Atua i luga o le apefa’i. Latou te lē iloa mea e mo lo

latou filemu. E lē mafai ona latou va'ai atu i tua i se va'ai manino fa'aleagaga, auā latou te lē va'ai e ala atu i le malamalama o le lagi. Na latou olioli muamua i le alofa o le Atua; sa latou salamo mai i a latou agasala ma tu'uina mai i latou ina ia avea ma auauna a Iesu Keriso, peita'i ua latou fa'agaloina atoa lava tautoga na latou faia i le Atua i lo latou papatisoga – o tiute paia uma lava na latou tauaveina ina ia latou sa'ili ai mo le mamalu, vi'iga, ma le tino ola e fa'avavau.” – *Manuscript Releases*, vol. 19, pp. 350, 351.

Aso Faraile

Iulai 26

FESILI TOE FA'AMANATU

1. **Aisea, ma, o a ituaiga mea e tutupu e tula'i mai, o loo lamatia ai a'u i le alofa fa'apito lē tonu?**
2. **O a ituaiga aiaiga e tauau ina to'ilalo ai lo'u uiga foa'i?**
3. **E fa'apefea ona mafai ona tatou iloa le eseesea i le va o le alofa moni mai i le alofa pepelo/sese?**
4. **O a uiga alofa iti o lo'o o'u fa'atalalē i ai?**
5. **Aisea o loo o'u lē atoatoa ai pea i le alofa – ma aisea e tāua tele ai lenei tulaga?**

SAPATI, AOKUSO 3, 2024

Taulaga Sapati Muamua mo le Matagaluega o A'oa'oga a le Koneferenisi Aoao

O le a'oa'oga, e fa'apei o le fa'apaiaina, o le galuega lea o le olaga atoa, o se vaega tāua tele lea o le olaga fa'aletagata. O lenei Sapati matou te ole atu ai mo lau lagolago i le fa'alauteleina o le o'oo'oga o lenei vaega sili ona tāua o le ekalesia.

E tatau ona tatou a'oa'o ina ia avea i tatou ma misionare amata mai lava i ulua'i tausaga o ō tatou olaga. “O so'o moni ta'itasi uma lava, e fanau mai i totonu o le malo o le Atua e avea o se misionare” (*The Desire of Ages*, p. 195). “Ia ē matuā a'oa'o so'o ai i lau fanau, ma ia ē tautalatala a'i, pe a ē nofo i lou fale, pe a ē savali fo'i i le ala, pe a ē ta'oto, pe a ē tula'i fo'i” (Teuteronome 6:7). Ma a fa'amausaliina loa le manumalo, ma ua lē toe i ai se agasala ma ni tagata agasala, o le galuega o le a'oa'oga o le a fa'aauau pea.

O le taimi lenei e lē'i fa'apea lava ona faia muamua, o la tatou ekalesia e tatau ona sauni e tu'uina atu tusitusiga e mafai ona fa'aaoga e matua e fa'amausaliina ai fa'avae faia fa'alelei fa'alea'oa'oga mo a latou fanau, o talavou e mafai ona tutupu a'e i se iloa e fa'atatau i le finagalo o le Atua, ma o tagata matutua e mafai ona fa'aauau ona fa'atamaoigaina ai i latou.

Ae o se mea e fa'anoanoa ai, o le tele o A'oga ua latou liliu ese mai i le a'oa'oina o a'oa'oga fa'avae, ae ua aga'i atu i le avea ma nofoaga tutotonu e a'oa'o ai le fa'alalalolagi. O le iloaina e matua o le tele o le a'afiaga ua faia e a'oa'oga i a latou fanau, o le tele o i latou ua latou tu'uina mai mana'oga mo tusi a'oga e fesoasoani ai i le a'oa'oina o a latou fanau mo le viiga ma le mamalu o le Atua.

O lea la, o le Matagaluega o A’oa’oga a le Koneferenisi Aoao o loo ia galuea’iina se Fa’asologa atoa o mataupu uma o a’oa’oga mo lenei sini. O lo latou galulue fa’atasi ma a tatou faia’oga ma iuni eseese ma koneferenisi i laueleele eseese, o le galuega o le sauniuniga o lenei polokalame o loo faia nei.

Ae ui i lea o le galuega e telē atu nai lo tupe o loo i ai nei. Matou te mana’omia la outou foa’i ma le loto i lenei taulaga ina ia saunia tusi a’oga, ma fa’aliliuina, ma ia fa’ataugofie ai. O lau lagolago e mafai ai ona matou saunia tusi a’oga sili ona lelei ina ia “agava’a ai mo olaga aogā i le olaga lenei ma le auaunaga i le Atua i le olaga atoa e fa’avavau”, le au su’esu’e e fa’aaogaina nei tusi i totonu o a tatou a’oga, ma a tatou a’oga i totonu o aiga.” – *Counsels to Parents, Teachers, and Students*, p. 495.

Matou te malamalama o lenei galuega e telē, peita’i e matuā aogā lava. O lau lagolago mai o le a matou saunia ai tusi a’oga e fa’a’a’upegaina ai i latou e sili ona laiti i le lotolotoi o i tatou, ina ia latou tu’uina atu ma le fa’amanuiaina le feau o le tala lelei i le lalolagi atoa.

Fa’afetai atu ma ia fa’amanuia tele le Atua i meaalofa ma i latou e foa’iina.

O le Matagaluega o A’oga a le Koneferenisi Aoao

Lesona 5

Sapati, Aokuso 3, 2024

IA FA’AMAUTINOA

MAU TAULOTO: “O lenei, le au uso e, ia atili ai ona faamalolosi outou ia fa’amauina lo outou valaauina ma lo outou filifilia, auā pe a outou faia ia mea tou te le i’u vale ai lava” (2 Peteru 1:10).

“O i latou ua liua moni lava ua tatanu fa’atasi i latou ma Keriso i le fa’atusa o Lona maliu, ma ua toe fa’atuina a’e ai mai i le tu’ugamau suavai i le fa’atusa o Lona toe soifua mai nai le oti, ina ia savavali i le ola fou. O lo latou usita’i fa’amaoni i le upu moni e tatau ai ona latou fa’amautinoaina lo latou vala’auina ma lo latou filifilia.” – *The SDA Bible Commentary* [E. G. White Comments], vol. 6, p. 1115.

Faitauga Fautuaina: *Testimonies for the Church*, vol. 9, pp. 186-188, 191-194

Ulua’i Aso

Iulai 28

1. O SE VALA’AU MO LE VILIVILITA’I

- a. O le a le mea e tatau ona sili lona tāua i o tatou olaga kerisiano? 2 Peteru 1:10. Aisea e mana’omia ai i lenei tulaga se satauro i o tatou olaga? Mataio 10:38.

“Ua filifilia e le Atua se uiga silisili ona lelei o le amio; ma o tagata ta’itasi uma lava o le a ausia le tapula’a o Lona mana’oga e ala i le alofa tunoa o Keriso, o le a ia matuā maua se ulufale atu i totonu o le malō o le mamalu. O i latou uma lava o le a ausia lenei tapula’a o le amio, o le a tatau ona ia fa’aaogaina mea ua foa’i mai e le Atua mo lenei sini. Afai e te mana’o e fai mo oe le malologa o loo totoe mo le fanau a le Atua, e tatau ona avea oe o se tagata e galulue fa’atasi ma Ia. Ua filifilia oe ina ia ē amoina le amo a Keriso – ina ia ē tauaveina Lana avega, ina ia ē si’itiaina Lona satauro. E tatau ona ē vilivilita’i ‘ina ia fa’amautinoaina lou vala’auina ma lou filifilia.’ Su’esu’e le Tusi Paia, ma o le a ē iloa ai, e leai se atalii poo se afafine o Atamu ua filifilia ina ia lavea’iina i totonu o le lē usitai i le tulafono a le Atua. Ua fa’alēaoga e le lalolagi le tulafono a le Atua; peita’i o kerisiano ua filifilia i le fa’apaiaina e ala i le usita’i i le upu moni. Ua filifilia i latou ina ia latou tauaveina le satauro, pe afai latou te manana’o latou te paleina le pale.” – *Fundamentals of Christian Education*, p. 126.

“O lē e inoino i le satauro na te inoino fo’i i le tau i ua folafolaina mai i ē e fa’atuatua fa’amaoni.” – *Sons and Daughters of God*, p. 248.

Aso Gafua

Iulai 29

2. TAUIVI MA LE ATUA

- a. **A’o tatou sa’ili ina ia fa’ato’ilalo vaivaiga o a tatou amio – ma fa’apena ona fa’amautinoa ai lo tatou vala’auina ma lo tatou filifilia – o le a se fa’ata’ita’iga ua foa’iina mai ia i tatou i totonu ia Iesu i le avea o Ia ma Atali’i o le tagata a’o i ai o Ia i luga o le fogaeleele? Eperu 5:7, 8.**

“A’o to’a lelei le aai i le filemu, ma na toe fo’i atu le au so’o i o latou aiga mo le malologa, ae e lē’i moe ai Iesu. O ana aioiga fa’alelagi na alu a’e i le taimi lea i Lona Tamā mai i le Mauga o Olive ina ia tausia ona so’o mai i a’afiaga leaga o le a latou fetaia’i i aso ta’itasi i le lalolagi, ma ia fa’amalosia ma saunia Lona lava agaga mo tiute ma tofotofoga o le aso o le a soso’o mai. O le po atoa lava, a’o momoe ona so’o, sa tatalo ai lo latou Faia’oga fa’alelagi. O le sau ma le aisa o le po na pa’ū mai i luga o Lona ao Ia a’o punou i le tatalo. O Lana fa’ata’ita’iga ua tu’ua mai mo Ona so’o.

“O le Tupu o le lagi, a’o Ia galue i Lana auunaga, sa masani lava ona tatalo finafinau. E lē’i masani ona ia asiasi atu i le mauga o Olive, auā na iloa e Ona so’o o Lona nofoaga lea na sili ona Ia fiafia e afio ese atu i ai, ma sa masani lava ona latou mulimuli atu ai ia te Ia. Na Ia filifilia le ta’aligoligoa o le po, o le a leai ai nisi e fa’alavelave mai. Na mafai e Iesu ona fa’amalōlō i ē mama’i ma toe fa’atutū mai tagata nai le oti. O Ia lava sa avea ma puna o fa’amanuiaga ma le malosi. Na Ia fa’atonu atu i matagi, ma na latou usita’i mai ia te Ia. E lē’i fa’aleagaina o Ia i le amio leaga, o Ia na te lē’i iloa le agasala; peita’i na Ia tatalo, ma na masani lava ona Ia tatalo ma le tagi tele ma loimata. Na Ia tatalo mo Ona so’o ma Ia lava fo’i, ma fa’apena ona Ia silafia ai Ia lava i o tatou mana’oga, o ō tatou vaivaiga, ma o tatou sese, lea e ta’atele lava i le aiga tagata. O Ia o Sē na matuā malosi i le aioi, e lē’i i ai ia te Ia tu’inauga o lo tatou natura pa’ū fa’aletagata, peita’i na si’omia o Ia i vaivaiga fa’apea, na fa’aosoosoina o Ia i vaega uma lava e fa’apei ona

fa'aosoosoina ai i tatou. Na onosa'ia e Iesu le tigā lea sa mana'omia ai le fesoasoani ma le lagolago mai i Lona Tamā.

“O Keriso o Ia o lo tatou Fa'aa'oa'o.” – *Testimonies for the Church*, vol. 2, pp. 508, 509.

b. Fa'amatala le i'uga o lenei ituaiga olaga tatalo mamana. Galuega 4:13.

“O le olaga o Iesu o se olaga lea o le talitonu fa'alagolago i taimi uma lava, na fa'atumauina e talanoaga i taimi uma lava; ma o Lana auunaga mo le lagi ma le lalolagi e lē'i i ai se mea na to'ilalo pe sese ai.

“I le avea o ia ma tagata na Ia aioi fa'atauana ai i le nofoali'i o le Atua, se'ia o'ona fa'atumulia lona tino tagata i se mana fa'alelagi lea na feso'ota'ia ai le aiga tagata ma le Atua. O Lona mauaina o le ola mai i le Atua, na Ia foa'iina mai ai le ola i tagata.” – *Education*, pp. 80, 81.

Aso Lua

Iulai 30

3. VILIVILITA'I I LE FA'ATUATUA

a. O le a le mea e tupu i so'o se taimi lava tatou te lē fa'atumauina ai le finafinau i taimi uma i le fa'amautinoaina o lo tatou vala'auina ma lo tatou filifilia? Esekielu 33:13. Aumai se fa'ata'ita'iga.

“Ua fa'ailoa mai e le Atua Lona to'asa ia Tavita ona o le tele o ana avā, e ala i Lona auina atu ia te ia o fa'asalaga, ma Ia fa'atagaina ai mea leaga e tula'i a'e mai i lona lava aiga e tete'e ai ia te ia. O le malaia mata'utia na fa'ataga e le Atua e o'o mai i luga o Tavita, o lē, na fa'aigoaina muamua o se tagata e tutusa lona loto ma le loto o le Atua ona o lona fa'amaoni, o le fa'amaoniga lea i augatupulaga e mulimuli mai e iloa ai, o le a lē ta'uamionuina lava e le Atua so'o se tasi lava i le solia o Ana poloaiga; ae o le a ma'utinoava lava Lona fa'asalaina o le tagata agasala, tusa lava poo le a lona amiotonu ma le alofagia o ia e le Atua i le taimi ua mavae a'o latou mulimuli atu ia te Ia i le loto mamā. A liliu ese loa le tagata amiotonu mai i lana amiotonu ma ia faia le amioleaga, o la latou amiotonu i le taimi ua mavae, o le a lē lavea'iina ai i latou mai i le to'asa o le Atua amiotonu ma le paia.” – *The Spirit of Prophecy*, vol. 1, p. 379.

“E i ai le upu moni e tatau ona taliaina pe a lavea'iina tagata. O le tausaiaina o poloa'iga a le Atua, o le ola e fa'avavau lea i lē na te taliaina. Peita'i o loo fa'amanino mai e le Tusi Paia e fa'apea, o i latou sa latou iloa muamua le ala o le ola ma latou olioli ai i le upu moni, o loo lamatia i latou i lo latou pa'u'ū i lo latou fulitua i le Atua, ma leiloa ai i latou. O lea la, o loo i ai le mana'oga o se liuaga ma'oti i le Atua i aso ta'itasi.

“O i latou uma lava o loo sa'ili ina ia fa'atumauina le mataupu o le filifiliga (election), a i ai loa i totonu o le alofa tunoa, ua i ai lava fo'i i taimi uma i totonu o le alofa tunoa, o loo latou faia lenei a'oa'oga sese e tete'e atu ai i le upu manino, ‘Ua fa'apea ona fetalai mai Ieova.’” – *The SDA Bible Commentary* [E. G. White Comments], vol. 6, pp. 1114, 1115.

b. I se eseeseega la, fa'amatala lo tatou uiga e tatau ona i ai – ma aisea e tatau ai ona tatou manatua upu moni sili ona tāua. Esekielu 18:21; 1 Korinito 15:1, 2 (vaega muamua).

“E to'atele tagata latou te manatu o se 'alofaga e lava lelei mo mea sese sili ona leaga latou te faia, lo latou fai mai ua galo ia i latou. Peita'i, e lē o i ai ea ia i latou, e fa'apei o isi fo'i, tomai fa'alemafaufau? Afai e leai, e tatau la ona latou koleniina o latou mafaufau ina ia latou manatua. O se agasala le galo, o se agasala le fa'atalalē. Afai e te fausiaina se masaniga o le fa'atalalē, e mafai fo'i ona ē fa'atalalē i le fa'aolataga o lou lava agaga ma i'u mulimuli ai loa ina ē iloa, e te lē o sauni mo le malō o le Atua.” – *Christ's Object Lesson*, pp. 358, 359.

“Teu lau Tusi Paia ia te oe lava. A ē maua le avanoa, faitau lau Tusi Paia; ia fa'amau upu i totonu o lou mafaufau. E o'o lava i lou savali i le auala, e mafai ona ē faitauina se vaega ma manatunatu i ai, ma fa'apena ona tusia ai i totonu o le mafaufau.” – *Steps to Christ*, p. 90.

Aso Lulu

Iulai 31

4. FILIFILIA E A TATOU FILIFILIGA

a. Afai tatou te usita'i i aiaiga ia e fa'amautinoaina ai i luga lo tatou vala'auina ma lo tatou filifilia, o le a le i'uga? 2 Peteru 1:10 (vaega mulimuli), 11.

“O le tapula'a sili ona maualuga a le Atua mo Lana fanau, e sili atu lona maualuga nai lo le maualuga e mafai ona o'o i ai manatu o le tagata. 'O lea ia atoatoa ai ona lelei o la outou amio, e pei o lo outou Tamā oi le lagi e atoatoa ona lelei o Ia.' O lenei fa'atonuga o se folafolaga lea. O le fuafuaga o le fa'aolataga e aofia ai le lavea'iina atoa lava o i tatou mai i le malosi o Satani. E vavae ese e Keriso i taimi uma lava le tagata ua salamo loto momomo mai i le agasala. Na Ia afio mai e fa'aumatia galuega a le ti'apolo, ma ua uma ona Ia faia le auala ina ia mafai ai ona foa'iina mai le Agaga Paia i tagata ta'itasi uma lava e salamō, ina ia tausia o ia ia aua ne'i toe agasala.

“O le meafaigaluega a le ti'apolo taufa'asooso e lē tatau lava ona toe fa'aigoaina o se 'alofaga mo se gaioiga sese e tasi. E manumalo lava Satani pe a ia fa'alogu i ē o loo ta'utino mai o i latou o so'o o Keriso, o latou faia 'alofaga mo le pi'opi'o o a latou amio. O 'alofaga nei e ta'ita'ia atu ai i le agasala. E leai se 'alofaga o i ai mo le faia o le agasala. O se uiga paia, o se olaga e fa'apei o Keriso, e mafai ona maua e fanau salamo, talitonu, ta'itasi uma lava a le Atua.” – *The Desire of Ages*, p. 311.

b. O fa'apefea ona fa'ailoaina mai le filifiliga o le alofa tunoa e ala atu i le malosi o la tatou filifiliga lea o loo fa'ailoaina mai i olaga o Iakopo ma Esau? 1 Peteru 1:2 (vaega muamua); Roma 9:10-14; 11:4, 5.

“O Esau ma Iakopo sa a’oa’oina i la’ua i le iloa e fa’atatau i le Atua, ma o i la’ua uma e to’a lua na sa’oloto e savavali i Ana poloa’iga ma la maua ai Lona finagalo fiafia mai; peita’i la te lē’i filifili uma la te faia lenei fa’atonuga. O le au uso tama e to’a lua na savavali i ala eseese, ma o ō la ala na fa’aauau ona valavala mamao ese lava.

“E lē’i i ai se filifiliga sauā a le Atua na mafua ai ona te’ena Esau mai i fa’amanuiaga o le fa’aolataga. O meaalofa o Lona alofa tunoa e ala mai ia Keriso e foa’i fua mai i tagata uma. E leai se filifiliga peita’i e na o le filifiliga a le tagata lava ia, lea e mafai ona fano ai so’o se tasi. Ua tu’uina mai e le Atua i totonu o Lana Upu aiaiga o le a filifilia ai tagata ta’itasi mo le ola e fa’avavau – o le usita’i lea i Ana poloa’iga, e ala i le fa’atuatua ia Keriso. Ua filifilia mai e le Atua se amio e loto gatasi ma Lana tulafono, ma so’o se tasi o le a ausia le tapula’a o Lona mana’oga, o le a fa’atagaina e ulufale atu i totonu o le malō o le manuia. . . . ‘Amuia i latou e faia Ana poloa’iga, ina ia taga ia i latou le la’au o le ola, ma ia latou ulu atu i le aai i ona faitoto’a.’ Fa’aaliga 22:14. E fa’atatau i le fa’aolataga mulimuli o le tagata, e na o le pau lava lea o le filifiliga o loo fa’ailoa mai i totonu o le upu a le Atua.” – *Patriarchs and Prophets*, pp. 207, 208.

Aso Tofi

Aokuso 1

5. PIPI’I ATU I LĒ E MANUMALO

- a. **O fa’apefea ona fa’amatala mai e le aposetolo o Paulo lana savaliga aga’i i luga? Filipi 3:12-14.**
- b. **Aisea tatou te iloa ai e mafai ona manumalo i totonu ia Keriso? Filipi 1:6; Iuta 24; 1 Korinito 1:30.**

“E lavea’iina i tatou e ala i lo tatou fe’a’ei a’e i sitepu ta’itasi uma o le apefa’i, ma va’ava’ai ia Keriso, ma pipi’i atu ia Keriso, ma la’a atu i sitepu ta’itasi i le maualuga o Keriso, ina ia faia o Ia ma poto ma amiotonu ma le fa’apaiaina ma le fa’aolataga mo i tatou. O le fa’atuatua, amio lelei, iloa, fai fuafua lelei e ala i le pulea ma le fa’afitia ele tagata o ia lava, onosa’i, amioatua, agalelei fa’aleuso, ma le alofa, o sitepu ia o le apefa’i. . .

“E lē o se mea faigofie le mauaina o le oa tau tele o le ola e fa’avavau. E leai se tasi e mafai ona ia faia lenei tulaga ma tafea fa’atasi atu ai ma le galu o le lalolagi. E tatau ona ia alu ese mai nai le lalolagi ma vavae ese mai ma aua ne’i ia pa’i atu i mea leaga. E leai se tasi e mafai ona gaioui e fa’apei o se tagata fa’alelalolagi e aunoa ma le aveina ifo o ia i lalo e le galu o le lalolagi. E leai fo’i se tasi o le a faia so’o se la’asaga aga’i i luga e aunoa ma taumafaiga finafinau lava. O le tagata o le a mana’o e manumalo e tatau ona ia pipi’i mau atu ia Keriso. E lē tatau ona ia toe tepa i tua, ae ia taula’i ona mata i taimi uma i luga, ma maua ai lea alofa tunoa i lea alofa tunoa. O le vilivilita’i ta’ito’atasi o le tau lea o le saogalemu. O Satani o loo ia ta’alo i le ta’aloga o le olaga mo lou agaga. Aua e te liliu atu i lana itu i se inisi e tasi, ne’i ia manumalo mai ia te oe.

“Afa lava tatou te o’o atu i le lagi, o le a tatou o’o atu i ai ona o lo tatou fa’apipi’ina atu o ō tatou agaga ia Keriso, ma fa’alagolago atu ia te Ia, ma matuā vavae ese atoatoa lava mai i le lalolagi, o ona amioga valea ma ana fa’atosinaga e fa’aseseina ai. E tatau lava ona tatou galulue fa’atasi fa’aleagaga ma agelu fa’alelagi.” – *Testimonies for the Church*, vol. 6, pp. 147, 148.

Aso Faraile

Aukuso 2

FESILI TOE FA’AMANATU

1. O le a le aogā o le maliu o Iesu i lo’u olaga?
2. Aisea e tāua tele ai le malosi o lo’u olaga tatalo i lo’u fa’aolataga?
3. O le a le mafua’aga o le pa’ū o se tagata i fetaia’iga ma fa’aososoga?
4. Fa’amatala pe aisea na talia ai Iakopo agasala e le Atua, ae na te’ena Esau.
5. Tauloto nisi o folafolaga e teu loto i le mafaufau pe a finafianu ina ia manumalo.

Lesona 6

Sapati, Aukuso 10, 2024

FA’AMALOSIA I LE UPU MONI MO LE TAIMI LENEI

MAU TAULOTO: “O le mea lea ou te lē fa’atamala ai e saga fa’amanatu atu pea ia te outou i na mea, e ui lava ina ua iloa e outou, ma ia fa’atumauiina i le upu moni mo le taimi lenei” (2 Peteru 1:12).

“E leai so tatou masalosaloga, e lē’i i ai fo’i so matou masalosaloga i le tele o tausaga ua mavae i le iloa, o mataupu o loo tatou talitonu i ai i le taimi lenei, o upu moni ia mo le taimi lenei, ma ua tatou latalata atu i le fa’amasinoga. O loo tatou sauni e feiloa’i ma Ia lē o loo fa’afeao mai e le ‘au o agelu paia, o le a fa’aali mai i ao o le lagi ina ia foa’i mai i ē fa’amaoni ma amiotonu le tau mulimuli o le tino ola e fa’avavau.” – *Testimonies for the Church*, vol. 2, p. 355.

Faitauga Fautuaina: *Early Writings*, pp. 61-71.

Ulua’i Aso

Aukuso 4

1. OLA A’E I’INEI I LE TAIMI LENEI
 - a. O le a le mea na fa’amamafa atu e le aposetolo o Peteru i le au talitonu? 2 Peteru 1:12-15.

“Sa i ai le upu moni i aso o Luther - o se upu moni sa fa’apitoa lona tāua i lenei taimi; o loo i ai se upu moni mo le ekalesia i le taimi lenei. O Lē na te faia mea uma lava e

tusa ai ma le fautuaga a Lona finagalo, ua finagalo malie o Ia ina ia tu'uina tagata i lalo o mea eseese e tutupu ma fa'atonu atu ia i latou tiute e patino fa'apitoa lava i taimi ua latou ola ai, ma aiaiga ua tu'uina i ai i latou. Afai o le a latou fa'atāuaina le malamalama ua tu'uina atu ia i latou, o va'aiga sili atu ona lautele o upu moni o le a tatalaina atu ia i latou.” – *The Great Controversy*, pp. 143, 144.

- b. Fa'amatala pe fa'apefea ona tatau ona tatou tutupu a'e i lo tatou malamalama'aga e fa'atatau i le malamalama mai i le Lagi. Eperu 5:12-14; 6:1-3.**

“O la'asaga ta'itasi uma lava o le fa'atuatua ma le usita'i e aumaia ai le loto i le so'otaga sili atu ona vavalalata ma le Malamalama o le lalolagi, 'e leai lava se pouliuli o ia te Ia.’” – *Ibid.*, p. 476.

Aso Gafua

Aukuso 5

2. MATAFAIOI

- a. Aisea ma e fa'apefea ona tatou mana'omia ina ia suia a tatou amioga pe a tatou mauaina malamalama e sili atu na auina mai i le lagi? Iakopo 4:17; Fa'ataoto 4:18; Mataio 6:23.**

“E mana'omia e le Atua mai i Ona tagata e tusa ai ma le alofa tunoa ma le upu moni ua foa'iina mai ia i latou. O Ona mana'oga tonu uma lava e tatau ona fa'amalieina atoatoa. O tagata o matāfaioi e tatau ona savavali i le malamalama o loo susulu atu i o latou luga. Afai latou te lē faia lenei tulaga, ona avea loa lea o lo latou malamalama ma pouliuli, ma o lo latou pouliuli e tutusa lelei lava lona tele e fa'apei ona tele o le malamalama sa ia te i latou. O le malamalama fa'atupula'ia ua susulu mai i luga o le fanau a le Atua; peita'i e to'atele ua fa'atalalē i lo latou mulimuli i le malamalama, ma o le mafua'aga lenei ua latou i ai i se tulaga vaivai tele lava fa'aleagaga.

“E lē o le leai o se iloa lea ua fano ai nei le fanau a le Atua. O le a lē fa'asalaina i latou ona o lo latou lē iloa o le ala, le upu moni, ma le ola. O le malamalama lea ua o'o mai i lo latou malamalama'aga, le malamalama lea ua susulu i le loto, peita'i ua te'ena po ua musu ai, o le a fa'asalaina i latou. O i latou e lē'i mauaina lava le malamalama ina ia te'ena, o le a lē fa'asalaina i latou. O le a se isi mea na ono mafai ona faia mo le tovine a le Atua nai lo le galuega ua uma ona faia? O le malamalama, le malamalama sili ona tāua, ua susulu mai i luga o tagata o le Atua; peita'i o le a lē lavea'iina ai i latou se'ivagana ua latou ioe ina ia lavea'iina i latou e le malamalama lea, ma ola atoatoa e tusa ai ma lea malamalama, ma fa'asusulu atu le malamalama lea i isi o loo i le pogisa. Ua vala'au le Atua i Ona tagata ina ia gaiioi. O le galuega ta'ito'atasi a le tagata o loo mana'omia, o le fa'aalia ma le lafoa'iina o agasala ma toe fo'i atu ia Ieova, E leai se isi e mafai ona ia faia lenei galuega mo se isi tagata. O le iloa fa'aletapua'iga ua matuā fa'atupula'ia lava, ma o lenei iloa ua fa'atupula'ia ai fo'i ma matafaioi. O le malamalama tele lava o loo susulu mai i luga o le ekalesia, ma o le malamalama lea, e fa'asalaina ai i latou auā latou te

mumusu e savavali i le malamalama lea. Ana fa’apea latou te tauaso, semanu e leai sa latou agasala. Peita’i ua latou va’ai i le malamalama ma ua latou fa’alogo i le tele o upu moni, peita’i latou te lē o popoto ma paia. O le to’atele o i latou, ua tele tausaga latou te lē o aga’i ai i luma i le iloa ma le fa’apaiaina moni. O i latou o tagata avilu fa’aleagaga. E aunoa ma lo latou aga’i i luma i le atoaga, o loo latou aga’i i tua i le pouliuli ma le nofo pologa o Aikupito. O ō latou mafaufau e lē o manatunatu i le amioatua ma le fa’apaiaina moni.

“O le a ala mai ea le Isaraelu moni o le Atua? O le a sa’ili ea i latou uma o loo ta’utinoina le amio atua ina ia tu’u ese mea sese uma, ma fa’aali i le Atua agasala lilo uma, ma puapuagatia le loto i Ona luma? O le a latou va’ili’iliina ea ma o latou loto maulalo tele lava, mafua’aga o gaioiga ta’itasi uma, ma ia latou iloa ai o loo faitauina e fofoga o le Atua mea uma, ma auiliiliina ai mea uma o loo natia? Ia matuā mae’ae’a lava le galuega, ia matuā atoatoa le tu’uina atu fa’apaiaina o i latou i le Atua. Ua Ia vala’au mo le tu’uina atoatoa atu o mea uma lava ua ia i tatou ma i tatou atoa uma lava. O faifeau ma tagatā ekalesia latou te mana’omia se liuaga fou, o se liuaga o le mafaufau, a le faia lenei liuaga, e lē o i tatou o ni a’afiaga lelei o le ola e o’o ai i le ola, a’o le oti e o’o ai i le oti.” – *Testimonies for the Church*, vol. 2, pp. 123, 124.

Aso Lua

Aukuso 6

3. UPU MONI MO LE TAIMI LENEI

a. **Aumai fa’ata’ita’iga o mataupu e tatau ona taula’i i ai su’esu’ega, lea e lē tatau ona tosina ese mai ai o tatou mafaufau. Tanielu 7:9, 10; 8:14; Salamo 119:33-35.**

“E matuā tele upu moni tāua o loo i totonu o le Upu a le Atua, peita’i o le ‘*upu moni mo le taimi lenei*’ lea e mana’omia e le lafu i le taimi lenei. Ua ou va’ai i le lamatia o avefeau i lo latou tamomo’e ese atu mai i vaega tāua o le upu moni mo le taimi lenei, ia latou manatunatu ai i mataupu e lē o fuafuaina ina ia tu’ufa’atasia ai le lafu ma fa’apaiaina ai le loto. O le a faia iinei e Satani mea uma lava e mafai ona ia faia ina ia fa’aleagaina ai le galuega.

“Peita’i o mataupu e fa’apei o le malumalu, i le feso’ota’i atu i le 2300 aso, o poloa’iga a le Atua ma le fa’atuatua o Iesu, ua fuafuaina atoatoa e fa’amatala ai le fa’agaioiga o le Toe Afio Mai O Iesu i le taimi ua mavae, ma fa’ailoa mai ai lo tatou tulaga i le taimi lenei, ma fa’amausaliina ai le fa’atuatua o ē e masalosalo, ma fa’amautinoaina ai le lumana’i matagofie. O nei mataupu, ua masani lava ona ou va’ai i ai, o mataupu autu nei e tatau ona manatunatu i ai avefeau.” – *Early Writings*, p. 63. [Author’s emphasis.]

b. **O le tusa ma le 180 tausaga (e lē mamao atu i tua i le tala’aga atoa o le lalolagi), o le a se vaega o loo aveva pea ma vaega sili ona tāua o le upu moni mo le taimi lenei? Fa’aaliga 14:6-13.**

“O le folafolaina o feau a le agelu muamua, lona lua, ma le lona tolu, o loo fa’ailoa mai e le upu a le Atua. Aua ne’i aveesea se iota po’o sina fasi mata’itusi. E leai se pule fa’aletagata e i ai sana aiā e sili atu na te suia ai le tulaga o nei feau nai lo le suitulaga o le Feagaiga Fou i le Feagaiga Tuai. O le Feagaiga Tuai o le tala lelei lea i fa’atusa. O le Feagaiga Fou o le tino lea. O le tasi e tāua e fa’apei lava o le isi. O le Feagaiga Tuai o loo fa’ailoa mai ai lesona mai i laufofoga o Keriso, ma o nei lesona e lē’i leiloa ese lava lo latou malosi i so’o se vaega tāua lava. O le feau muamua ma le lona lua na tu’uina mai i le 1843 ma le 1844, ma o loo tatou i ai nei i lalo o le taimi o le folafolaga o le feau lona tolu; peita’i o feau uma e tolu, e tatau ona folafolaina pea. E matuā aogā lava i le taimi lenei e fa’apei ona aogā i le taimi ua mavae, le toe folafolaina atu ia i latou o loo sa’ili mo le upu moni. E ala atu i tusitusiga ma leo, e tatau ai ona tatou fa’aleoina atu le folafolaga, ma fa’ailoa atu ai lo latou fa’asologa, ma le fa’amatalaina o le taimi ma mea o lo o fa’atatau i ai valo’aga lea e aumaia ai i tatou i le feau a le agelu lona tolu. E lē mafai ona i ai se feau lona tolu e aunoa ma le feau muamua ma le lona lua. O nei feau e tatau ona tatou tu’uina atu i le lalolagi i tusitusiga ma a’oa’oga, ma fa’ailoa atu ai i le laina o tala’aga fa’avaloga, mea ua tutupu, ma mea o le a tutupu.” – *Counsels to Writers and Editors*, pp. 26, 27.

Aso Lulu

Aukuso 7

4. FA’ANAUNAU INA IA TUPUTUPU A’E

- a. **Fa’amatala le uiga e mafai ai e i tatou ona taliaina le upu moni mo le taimi lenei a’o fofolaina mai, tusa lava pe te’ena e isi. Ieremia 29:13; Mataio 18:3; Ioane 7:17.**

“A avea loa oe e fa’apei o se tamaitiiti, e naunau e ta’ita’iina, ma a fa’apaiaina loa lou malamalama’aga, ma ua ē gaua’iina atu lou loto ma ou uiga fa’aitu’au, o le a fa’asusuluina atu se malamalama i totonu o lou loto e fa’apei ona fa’amalamalamaina ai upu o le Tusi Paia, ma fa’ailoa atu ai ia te oe le upu moni mo le taimi lenei i lona loto gatasi matagofie. O le a foliga mai o se filifili auro, o lea so’otaga e pipi’i atu i lea so’otaga i se atoaga atoatoa lona matagofie.” – *Testimonies for the Church*, vol. 3, p. 448.

- b. **E fa’apefea ona masani lava ona fa’avaivaia le a’afiaga o le upu moni mo le taimi lenei ona o le fa’atalalē – ma o le a le fofō? Isaia 56:9, 10; 1 Korinito 14:8; Fa’aaliga 3:17-19.**

“O loo lamatia i tatou i lo tatou tu’uina atu o le feau a le agelu lona tolu i se uiga matuā lē manino lava o lea ua lē fafaguina ai tagata. E matuā tele isi mea ua aumaia i totonu, o lea ua gūgū ma leai ai se leo o le feau tonu lava lea e tatau ona folafolaina atu ma le mana.” – *Ibid.*, vol. 6, p. 60.

“O loo tatou ola mautinoa lava i aso mulimuli o le tala’aga o le lalolagi lenei. Tatou te mana’omia ina ia fa’aalu le tele o le taimi i o tatou manuia fa’aleagaga, pe afai tatou te manana’o tatou te iloa le tuputupu a’e fa’aleagaga lea e aogā i le tupulaga lenei. E tatau

ona tatou faia toe fuata'iga ma'oti. Na fetalai mai le Si'ufofoga: O tane leoleo e mana'omia ina ia ala mai, ma ili atu le pu i lona leo ma'oti. Ua o'o mai le taeao; ae ua o'o mai fo'i ma le po. Ala mai i luga, O'u tagata leoleo. O leo ia e tatau ona fa'alogoina i le taimi lenei o folafolaina atu le upu moni, o loo gūgū. O tagata o loo fano i a latou agasala, a'o faifeau ma foma'i ma faia'oga o loo momoe. Fafagu mai i luga tane leoleo!" – *The Pacific Union Recorder*, February 20, 1908.

“Ua fa'aailoa mai e le Molimau Moni, a ē manatu o loo ē i ai moni lava i se tulaga lelei o le fa'atamāoaigaina, o loo ē mana'omia la mea uma lava. E lē lava mo faifeau lo latou a'oa'oina atu o mataupu fa'ale-mafaufau; e tatau fo'i ona latou a'oa'oina atu mataupu ia e fa'atinoina. Latou te mana'omia ina ia latou su'esu'eina lesona fa'atinoina ia sa a'oa'o e Keriso i Ona so'o, ma ia latou fa'ata'ita'iina ma'oti lava nei lesona i o latou lava loto ma tagata fo'i. Talu ai ona ua fetalai mai e Keriso lenei **molimau a'oa'i**, o le a tatou manatu ea e leai Sona alofa mutimutivale i Ona tagata? Oi, e leai! O Lē na maliu ina ia toe fa'atauina mai ai le tagata mai i le oti, Na te alofa i se alofa fa'ale-atua, ma o i latou Na te alofa i ai, Na te a'oa'iina.” – *Testimonies for the Church*, vol. 3, pp. 257, 258.

Aso Tofi

Aukuso 8

5. O LE LAUELEELE UA FA'AMALAMALAMAINA I LE PUPULA

a. **Fa'amatala pe fa'apefea ona fa'alateleina ma fa'ata'aliseina atu le upu moni mo le taimi lenei, a'o le'i toe afio mai Iesu i le lalolagi lenei. Fa'aaliga 18:1-5.**

“[Fa'aaliga 18:1, 2, 4.] O le mau lenei o loo fa'asino atu i luma i le taimi o le a toe fa'aluaina ai le folafolaina atu o le pa'u o Papelonia, e fa'apei ona faia e le agelu lona lua o le Fa'aaliga 14 (fuaiupu e 8), fa'atasi ai ma le toe fa'aailoaina o mea leaga uma ua ulufale i totonu o fa'alapotopotoga eseese o lo o fausia ai Papelonia, talu mai ona ulua'i folafolaina lena feau, i le tau vevela o le 1844.” – *The Great Controversy*, p. 603.

b. **O le a le ituaiga amio e tatau ona tatou amio a'i i lo tatou iloaina o manatu o le to'atele o tagata o le lalolagi e fa'atatau i le feau o le upu moni mo le taimi lenei e fa'apea, e lē fetau mo le taimi lenei? 1 Korinito 2:12-16.**

“I o tatou lava olaga ta'ito'atasi, e tatau ona a'oa'oina i tatou e le Atua. A tatou sa'ilia o Ia ma se loto fa'amaoni, o le a tatou fa'aalia atu ia te Ia mea leaga o a tatou amio; ma ua Ia folafola mai Na te talia i latou uma lava e o mai ia te Ia i le fa'alagolago atu ia te Ia ma le loto maulalo. O lē e gaua'i i mana'oga o le Atua, o le a fa'atasi tumau mai Keriso ia te ia, ma o lenei fefa'auoa'iga o le a avea ia te ia o se mea matuā tāua lava. O lona taofi mau atu i le poto fa'ale-atua, o le a ia sola ese ai mai i amioga leaga o loo i le lalolagi e ala i le tu'inanau.” – *Testimonies to Ministers*, p. 483.

“A ē sau ia Keriso o le a ē lē gugutu mimita fa'apea, ‘O a'u e paia.’ Ia nā o le Atua lava, ia na o Ia lava e to'atasi Na te fetalai atu upu ia e fa'atatau ia te oe, auā e te lē iloa lou lava loto. O lenei gugutu mimita o se fa'amaoniga mautinoa lea e iloa ai, e te lē iloa upu o le Tusi Paia ma le mana o le Atua. Ia na o le Atua lava Na te tusia i totonu o Ana

tusi, pe afai Na te finagalo i ai, e fa’apea, o oe o se atali’i poo se afafine usita’i, o loo ē tausia Ana tulafono i se loto fiafia, ma o fa’amaumauga o le a fa’aaliaina lenei usita’i i luma o agelu ma tagata i le aso o le tau.” – *The Signs of the Times*, December 22, 1887.

Aso Faraile

Aukuso 9

FESILI TOE FA’AMANATU

1. O fa’apefea ona ese mai le upu moni mo le taimi lenei mai i taimi ua mavae atu?
2. Aisea e avea ai ma o’u matafaioi i le Atua lo’u ola i le upu moni mo le taimi lenei?
3. Aisea e tatau ai ona ou mautinoa lo’u fa’asoaina atu o le upu moni i isi?
4. E fa’apefea ona a’afia lo’u tuputupu a’e fa’aleagaga ona o lo’u manatu e fa’atatau i le malamalama sili atu?
5. O le a la’u gaioiga finafinau e tatau ona i ai i le fetaia’i ma tagata tete’e mai?

Lesona 7

Sapati, Aukuso 17, 2024

Valo’aga mo Lo Tatou Manuia

MAU TAULOTO: “O loo ia te i tatou fo’i le upu o le valo’aga e sili lona mausali, e lelei ona outou naunau i ai, e pei o se lamepa e mumū i le mea pogisa, se’ia tafa mai ata, se’ia alu a’e fo’i le fetū ao i o outou loto” (2 Peteru 1:19).

“I lo tatou taliaina o le feau a le agelu lona tolu, ua tatou lē taliaina ai ni tala fatu, a ua tatou taliaina le ‘upu mautinoa o valoaga.’ O loo tatou ola nei i le pupula atoatoa o le malamalama o upu moni o le Tusi Paia.” – *Testimonies for the Church*, vol. 4, p. 592.

Faitauga Fautuaina: *Selected Messages*, bk. 1, pp. 15-23.

Ulua’i Aso

Aukuso 11

1. FA’ATUATUA, AE E LĒ O TALA FATU

- a. Aisea na mafai ai ona fa’amausali e Peteru lona talitonuga i le natura atua o Iesu Keriso? Mataio 17:1-7.

“I luga o le mauga, o le malō o le mamalu oi lumana’i na fa’aatina mai i sona tulaga itiiti – o Keriso le Tupu, o Mose o ia o se fa’atusa o le au paia ua toe fa’atuina mai nai le oti, a’o Elia na ia fa’atusalia maia le au paia e aveolaina a’e i le lagi.

“O le au so’o e lē o malamalama i lea va’aiga; peita’i ua latou olioli ona o le Faia’oga onosa’i, Lē e agamalu ma loto maulalo, o Lē na fealua’i solo atu ma toe fo’i mai

o se tagata ese e leai sona fesoasoani, ua vi'ia ma fa'amamaluina o Ia e i latou ua fa'amanuiaina e le lagi." – *The Desire of Ages*, p. 422.

“O le po atoa lava na fa'aaluina i le mauga; ma a'o oso a'e le la, ona afio ifo lea o Iesu ma ona so'o i le laueleele laugatasi. O le fa'atumulia o le au so'o i manatunatuga, na latou matuā ofo ai lava ma le migao ma gūgū. E o'o lava ia Peteru e lē'i i ai se upu na ia tautala mai ai.” – *Ibid.*, p. 426.

b. O le a se mea na mafai ona fa'ailoa mautinoa atu e Peteru – ma e fa'apefea ona tatau ona tatou fa'ailoa atu, e ala i le fa'atuatua, lana fa'ata'ita'iga loto tele? 2 Peteru 1:16-18.

“E leai se pepelo oi le upu moni. Afai tatou te mulimuli i tala fatu e fafauina ma le pepelo, ua tatou au fa'atasi loa ma le 'au tau a le fili e tete'e ai i le Atua ma Keriso. . . .

“O so'o se ituaiga mea leaga lava, o loo fa'atali mo se avanoa e osofa'i ai i tatou. O upu fa'avi'ivi'i, o fa'atosinaga i oa ma tofiga ina ia talia faiga leaga, o mailei fa'atosina, o folafolaga o le si'itiaina i tofiga mamalu, o le a sili ona fa'aaogaina ma le finafinau i taimi uma.

“O a mea o loo faia e auuuna a le Atua ina ia si'itia ai le pa pupuni o le 'Ua fa'apea ona fetalai mai o Ieova' e tete'e atu ai i lenei agasala leaga?” – *Selected Messages*, bk. 1, p. 194.

Aso Gafua

Aukuso 12

2. O LE A'AFIAGA O VALO'AGA

a. A ta'atele le nunumi, o le a se mea e mafai ona tatou fa'afetai ai, e fa'apei ona fa'ailoa mai i le auala na aumaia ai e Keriso le fa'amoemoe i so'o sa fa'anoanoa i le ala aga'i atu i Emau? Luka 24:15-21, 27, 32; 2 Peteru 1:19.

“O loto o so'o [i le ala aga'i i Emau] na fafaguina a'e. O le fa'atuatua sa toe osofia a'e. Sa toe 'fanauina i la'ua i totonu o se fa'amoemoe ola' a'o le'i fa'aalia e Iesu Ia lava ia i la'ua. O Lana sini o le fa'apupulaina lea o ō la malamalama'aga ma ia fa'amausali atu lo la fa'atuatua i luga o le 'upu mautinoa o valo'aga.' Na Ia finagalo i le upu moni ina ia mau'a i totonu o ō la mafaufau, e lē gata ona sa lagolagoina e Lana lava molimau, ae ona o le fa'amaoniga lē mafa'afesiligia fo'i na fa'ailoa mai e fa'atusa ma sauniga fai ata o le tulafono fa'afa'atusa, ma valoaga o le Feagaiga Tuai. Na mana'omia mo so'o o Keriso ina ia i ai so latou fa'atuatua potu, e lē mo na o i latou lava, ae ina ia mafai ai fo'i ona latou tauaveina atu le iloa e fa'atatau ia Keriso i le lalolagi. Ma o le la'asaga muamua lava la o le fa'ailoaina atu o lenei iloa, na fa'asino e Iesu le au so'o ia 'Mose ma le au perofeta uma.' Na fa'apena le molimau na tu'uina mai e le Fa'aola na toe soifua mai i le aogā ma le tāua o Tusi o le Feagaiga Tuai.” – *The Great Controversy*, p. 349.

“O le fuafuaga a le [Atua], o i latou ua tofusia i lenei fa'aolataga tele e ala atu ia Iesu Keriso, e tatau ona avea ma Ana misionare. . . .O tagata e tatau ona lapata'ia ina ia sauni mo le fa'asalaga o le a o'o mai. Ia i latou sa nā o tala fatu fafauina ma le pepelo na

latou fa’alogologo i ai, o le a tu’uina atu i ai e le Atua se avanoa latou te fa’alogo ai i le upu mautinoa o valo’aga, e lelei ona latou naunau i ai e pei o se lamepa e mumū i le mea pogisa. O le a Ia fa’ailoa mai le upu mautinoa o le upu moni i le malamalama’aga o i latou uma o le a gaua’i i ai; o tagata uma o le a fa’atusatusaina le upu moni ma tala fatu fafauina ma le pepelo ua tu’uina atu ia i latou, e tane o loo fai mai e malamalama i le upu a le Atua ma ua latou agava’a e a’oa’o atu i ē o loo i le pogisa.” – *Testimonies for the Church*, vol. 2, pp. 631, 632.

b. Ta’u mai se lapata’iga a Paulo ia Timoteo lea e matuā fetau lelei i le taimi lenei. 1 Timoteo 6:20, 21.

“O le agaga tonu lava o le ifo i tupua fa’apaupau ua matuā ta’atele lava i le taimi lenei, e ui lava ina i lalo o le a’afiaga o su’esu’ega ma a’oa’oga, ua ia fa’afoliga mai i foliga e sili atu ona a’oa’oina ma tosina gofie i ai. O aso ta’itasi e fa’aopoopoina ai fa’amaoniga fa’anoanoa e iloa ai, o le fa’atuatua i le upu mautinoa o valoaga, ua matuā fa’ata’alise lona fa’aitiitia, ma ua suitulaga ai talitonuga fa’ataulaitu ma faiga fa’ataulaitu fa’asatani lea ua taofi fa’atagataotauaina ai mafaufau o tagata.” – *Ibid.*, vol. 5, p. 192.

Aso Lua

Aukuso 13

3. O SE TAULA I O TATOU AGAGA

a. E fa’apefea ona tatou iloa valoaga moni e avea o se taula, o se poutū fa’avae i le fa’atuatua fa’akerisiano? Amosa 3:7; 2 Peteru 1:20, 21.

“O le to’atele, e matuā sili atu le to’atele o tagata, o loo latou fesiligia le moni ma le fa’amaoni o le Tusi Paia. O mafauauga fa’aletagata ma manatunatuga o le loto fa’aletagata, ua latou lamatiaina le fa’aaliga a le Upu a le Atua, ma o upu ia e tatau ona taliaina o upu na fa’aalia mai, ua si’omia i se ao o mea lilo. E leai se mea o tula’i a’e i laina manino ma le ma’oti, i luga o le papa mausalī. O le tasi lenei o fa’ailoga ma’oti o aso mulimuli.” – *Selected Messages*, bk. 1, p. 15.

“O loo i ai tane e finafinau ina ia ta’ua i latou o ni tagata na ulua’i amatalia ni a’oa’oga, o loo manatu i latou e sili a’e lo latou poto nai lo upu ua tusia; o lea la, o lo latou poto o le valea lea. Latou te maua ni talitonuga ofoofogia oi le lumana’i, o ni manatu ia o loo fa’aalia ai latou te matuā mamao lava i tua i le malamalama’aga e fa’atatau i le finagalo o le Atua ma Ana fuafuaga. I lo latou sa’ili e fa’amanino pe talatalaina fo’i mea lilo sa natia mai i le vavau mai i tagata, ua fa’apei ai i latou o se tagata o loo a’au vilivilita’i solo i totonu o le lopala, ua lē mafai ona ia fa’asa’olotoina o ia lava, peita’i o loo ia fa’atonu atu i isi tagata i le auala e mafai ai ona latou sao ese mai i le sami lopala o lo o latou i ai. O se fa’atusa fetau lelei lenei o tane ia ua latou fa’atuina i latou lava ina ia fa’asa’oina mea sese o le Tusi Paia. E leai se tagata e mafai ona ia fa’aleleia atili le Tusi Paia e ala i lona fa’ailoa mai, i ona lava manatu, o le uiga tonu o le manatu na finagalo le Atua Na te fetalai mai, poo upu fo’i ua fetalai mai e Ieova.

“O nisi e va’ava’ai mai ia i tatou ma le faitio ma fa’apea mai, ‘Tou te lē manatu ea atonu sa i ai ni mea sese ia i latou sa kopiina po’o i latou fo’i sa fa’aliliuina molimau?’ O nei manatu uma atonu e moni, ma o le mafaufau e matuā pumo’omo’o lava o lea o le a fa’atuai ai ma tautevateva i lenei manatu, o le a matuā sauni lava e tautevateva i mea lilo o le Upu na osofia mai e le Agaga Paia, auā o ō latou mafaufau vaivai e lē mafai ona malamalama i fuafuaga a le Atua.” – Ibid., p. 16.

“E fetalai mai le Atua i tagata i gagana lē atoatoa, ina ia malamalama ai i Ana upu, lagona ia ua fa’aleagaina, ma le va’ai nenefu fa’alelalolagi a tagata fa’alelalolagi. Ua fa’apena ona fa’ailoaina mai le alofa o le Atua. Na te talia tagata pa’u’ū i le tulaga o loo latou i ai. O le Tusi Paia, o lona atoatoa lelei i lona faigofie o loo i ai nei, e lē o tali mai i manatu silisiliese o le Atua; auā o manatu lē mafuatia e lē mafai ona tu’uina atoatoa i totonu o tagata lē atoatoa o loo tauaveina manatu. E aunoa ma le so’ona fa’atelēina o fa’amatalaga a le Tusi Paia, e pei o le manatu o le to’atele o tagata, o manatu malolosi e talepeina i lalo, i luma o le matagofie o le manatu, e ui lava ina filifilia e le tagata tusitusi le gagana e sili ona tāua e fa’ailoa mai ai upu moni o le a’oa’oga e sili atu ona maualuga.” – Ibid., p. 22.

“A taumafai loa tagata e faitio i le Upu a le Atua, ua latou solia eleele paia, ma e sili ai ona latou matata’u ma gatete ma natia lo latou poto e avea o se valea. E lē’i filifilia e le Atua se tagata na te fa’amasino i Lana Upu, ma filifilia ai nisi upu e fa’apea na osofia mai e le Agaga o le Atua, ma latou filifilia ai nisi vaega ma fai ai e lē’i osofiaina e le Agaga Paia, ma fa’alēaogaina ai fo’i nisi vaega e fa’apea e lē’i fa’ailoaina mai e Lona Agaga Paia.” – Ibid., p. 23.

Aso Lulu

Aukuso 14

4. O LE TAUSIGA FOA’I A LE ATUA MO LANA FANAU

- a. Fa’amatala se tulaga mata’utia o loo ta’atele i le taimi lenei – ma le auala e tatau ai ona tatou fetaia’i. 2 Peteru 2:1-3; 1 Timoteo 4:1, 2; Teuteronomie 6:24, 25.**

“E le’i i ai lava se taimi o le a puapuagatia ai le upu moni mai i lona fa’auigaseseina, ta’ufa’atauva’aina, ma ta’useseseina e ala i finauga fouvale a tagata, nai lo aso mulimuli nei. Ua aumaia e tane i latou i totonu fa’atasi ai ma a latou a’oa’oga lē talitonu eseeese e tele lava, ia ua latou fa’ailoa mai o tulafono mo tagata. O tagata ua fa’amalieina i ni mea fou uiga ese, ma, latou te lē o popoto i lo latou tomai latou te iloa ai le uiga o manatu atonu e fa’amatagofie mai e tagata e fai ma mea lelei. Peita’i o le fa’aigoaina o lenei fa’asesēega e avea ma a’oa’oga matuā lelei tele ma fa’apipi’i atu ai i poloa’iga a le Atua, e lē faia ai ma upu moni. . . .

“E tatau ona tatou fa’alogo i le si’ufofoga o le Atua mai i Lana Upu fa’aalia, le upu mautinoa lea o valoaga. O i latou o le a fa’asilisiliina i latou lava ma sa’ili ai e faia se mea ofoofogia, e sili atu lo latou o mai i se mafaufau poto.” – *The SDA Bible Commentary* [E. G. White Comments], vol. 6, pp. 1064, 1065.

“O le tulafono a le Atua o le fa’avae lea o toe fuata’iga mausali uma. E tatau ona tatou tu’uina atu i le lalolagi i upu manino ma le ma’oti, le mana’oga o le usita’i i lenei tulafono. O le usita’i i le tulafono a le Atua o le fa’amalosi’aga silisili lava lea i galuega, olaga fuafua faifa’atatau lelei, fa’amaoni, ma feutaga’iga fa’amaoni i le va o le tagata ma le tagata. . . .

“O i latou e gaua’i ma le vilivilita’i i le si’ufofoga o Ieova ma tausi ma le fiafia i Ana poloa’iga, o le a latou i ai i le lotolotoi o le fuainumera o i latou e va’ai i le Atua.” – *Testimonies for the Church*, vol. 8, p. 199.

b. O a fa’ata’ita’iga fa’aleTusi Paia o loo aumaia e Peteru e fa’ailoa mai ai le mana’oga – ma le mautinoaga – o le lavea’iga alofa a le Atua mo i latou e alolofa ma matata’u ia te Ia? 2 Peteru 2:4-8.

“O tagata o le Atua, o loo lamatia i le malosi taufa’asese ma le sauā lē malolo o le fili o le pouliuli, ma o loo tauivi ma malosi uma lava o le ti’apolo, ua fa’amautinoaina mai ia i latou le leoleoga lē muta a agelu fa’alelagi. E lē tu’uina mai fo’i lena mautinoaga e aunoa ma se mana’oga. Afai ua tu’uina mai e le Atua i Lana fanau le folafolaga o le alofa tunoa ma le puipuiga, ua tu’uina mai ona o loo i ai meafaigaluega malolosi a le ti’apolo e tatau ona fa’afetaia’ia – o meafaigaluega to’atele, finafinau, ma lē malolo i taimi uma, o lo latou ita ma lo latou malosi, e leai se tagata e mafai ona ia lē iloaina pe lē amana’iaina ma le saogalemu.” – *The Great Controversy*, p. 513.

Aso Tofi

Aukuso 15

5. TEUFATUINA O LO TATOU FA’AOLA

a. O le a le lavea’iga sili ona tāua ua ofo mai e le Atua ia i tatou? 2 Peteru 2:9 (vaega muamua); 1 Korinito 10:13; Salamo 50:15.

“O le a tausi e le Atua i latou uma lava e savavali i le ala o le usita’i; peita’i o le liliu ese mai i le usita’i, o le fealua’i lea ma le lē fefe i eleele o Satani. O iina tatou te mautinoa tatou te pa’u’ū ai. Ua fa’atonu mai le Fa’aola ia i tatou, ‘Ia outou mataala ma tatalo, ne’i tou ulufale atu i le fa’aosoosoga.’ Mareko 14:38. O manatunatuga ma tatalo o le a taofia ai i tatou mai i lo tatou fa’ata’alise atu e aunoa ma fa’atonuga i le ala o le lamatiaga, ma fa’apena ai ona tatau ona lavea’iina i tatou mai i le tele o to’ilalo.

“Ae e lē tatau ona tatou fa’avaivai pe a osofa’ia i tatou e fa’aosoosoga. O le tele o taimi, a tu’uina i tatou i se tulaga e faigata, tatou te masalosalo ai poo le Agaga o le Atua lea o loo ta’ita’iina i tatou. Peita’i o le ta’ita’iga a le Agaga lea na aumaia Iesu i le vao matua ina ia fa’aosoosoina ai e Satani. A aumaia e le Atua i tatou i tofotofoga, e i ai Lana sini e tatau ona fa’ataunu’uina mo lo tatou lelei. E lē’i fa’afoliga le manatu o Iesu i folafolaga a le Atua e ala i Lona alu atu i fa’aosoosoga e aunoa ma le fa’atonuina o Ia. Na te lē’i fa’avaivai fo’i i le leai o se fa’amoemoe ina ua o’o mai le fa’aosoosoga i luga ia te Ia. E lē tatau fo’i ona tatou manatu fa’apea.” – *The Desire of Ages*, pp. 126-129

“O le fa’asoosoga e lē o le agasala lea. O Iesu e paia ma mamā; ae na fa’asoosoina o Ia i mea uma lava e fa’apei ona fa’asoosoina ai i tatou, peita’i na fa’asoosoina o Ia i se malosi ma se mana lea o le a lē vala’auina lava le tagata ina ‘ia ia onosa’ia. I Lona tete’e fa’amanuina atu ua Ia tu’ua ai mo i tatou se fa’ata’ita’iga matagofie, ina ia tatou mulimuli ai i Ona la’asaga. Afai tatou te fa’alagolago ia i tatou lava pe fa’amalieina fo’i i tatou i la tatou lava amiotonu, o le a tu’ua i tatou ina ia tatou pa’u’ū i lalo o le malosi o fa’asoosoga; peita’i afai tatou te va’ava’ai ia Iesu ma talitonu ia te Ia, ua tatou aumaia ai ia i tatou se mana ua na fa’ato’ilaloina le fili i luga o le laueleele o le taua, ma o fa’asoosoga ta’itasi uma lava, o le a Ia faia ai se auala e lavea’i ai. A sau Satani e pei o se lolo, e tatau ona tatou fa’afetaia’ia ana fa’asoosoga i le pelu a le Agaga, ma o Iesu o le a avea ma o tatou fesoasoani ma o le a Ia si’itia mo i tatou se tapula’a e tete’e atu ai ia te ia. O le tamā o le pepelo e galulu ma gatete pe a lafoina atu le upu moni a le Atua, i le mana mata’utia lava.” – *Testimonies for the Church*, vol. 5, p. 426.

Aso Faraile

Aukuso 16

FESILI TOE FA’AMANATU

1. E fa’apefea ona fesoasoani mai ia te a’u le malamalama i valoaga fa’ale-Tusi Paia i aso oi lumana’i?
2. Aisea na fa’asoa atu ai e Iesu valo’aga i le ‘au so’o i le ala aga’i atu i Emau?
3. O a auala o loo sa’ili Satani na te fa’avaivaia ai lo tatou talitonuga i le Tusi Paia?
4. Aisea e tāua tele ai le pipi’i mausali atu i upu e fa’ailoa mai e le Agaga Paia?
5. A osofa’ia i tatou e fa’asoosoga, o le a le gaoiga e tatau ona tatou manatua tatou te faia?

Lesona 8

Sapati, Aukuso 24, 2024

Olaga Mamā i Totonu o se Tupulaga Amio Leaga

MAU TAULOTO: “Ua mamā mea uma i ē ua loto mamā, a’o ē loto eleelea ma le lē talitonu, e lē mamā ia te i latou se mea e tasi, a ua eleelea o latou mafaufau atoa ma o latou loto fuatia ifo.” (Tito 1:15).

“O le fa’autauta, filemu, lē so’ona gaoiā, lē taliaina o uiga fa’asāina o le taula’i mai o mafaufau o tagata, ae ia fa’atumauina se amio mamā maualuga lava ma le mamalu e tatau, e tele le leaga e mafai ona alofia ai.” – *The Adventist Home*, p. 331.

Faitauga Fautuaina: *Testimonies for the Church*, vol. 5, pp. 137-148, 191-199.

Ulua’i Aso

Aukuso 18

1. MATAALA I O TATOU UIGA

- a. **Na fa’apefea ona fa’asala e le Atua le tuafafine o Mose ona o le anovale loto leaga – ma e fa’apefea ona avea lenei tulaga o se lapata’iga mo le taimi fo’i lenei? Numera 12:1, 2, 6-10; Iakopo 4:11; 2 Peteru 2:9 (vaega lona lua), 10.**

“Ana fa’apea e lē a’oa’iina atoatoa le loto leaga ma le loto lē fa’amalieina o Miriama, semanu e i’u i le leaga tele lava. O le ‘anovale fuā loto leaga o le tasi lea o uiga e sili ona fa’apei o uiga o Satani e mafai ona i ai i totonu o le loto fa’aletagata, ma o le tasi lenei o uiga e sili ona leaga i ona a’afiaga. Fai mai le tagata poto, ‘O le lotoa o le sauaga lea; o le ita o le fa’alumaina lea; a’o ai sē e mafai ona tula’i atu i luma o le fuā?’ Fa’ataoto 27:4. O le anovale fuā loto leaga lea na ulua’i mafua ai le fete’ena’iga i le lagi, ma o le fa’amalieina tu’inanau o lenei uiga ua faia ai mea leaga lē mafaitaulia i le lotolotoi o tagata. ‘Auā o le mea e i ai le matau’a ma le misa, o loo i ai fo’i le nunumi ma galuega leaga uma.’ Iakopo 3:16.

“E lē tataua ona manatu o se mea māmā le tautala taufa’aleaga e fa’atatau i isi poo le faia fo’i o i tatou o ni fa’amasino i mafua’aga o a latou fuafuaga ma gaioiga. ‘O lē e fai upu leaga i lona uso, ma fa’amasino i lona uso, ua fai upu leaga o ia i le tulafono, ma fa’amasino i le tulafono: peita’i afai ua ē fa’amasino i le tulafono, e lē o oe o se tagata e faia le tulafono, a’o lē e fa’amasino i ai.’ Iakopo 4:11. E tasi lava le fa’amasino. . . . ma so’o se tasi lava na te tauaveina i luga ia te ia le fa’amasinoina ma le fa’asalaina o ona uso a tagata, ua ia avefa’amalosia i luga ia te ia le tiute ma le aiā e patino i le Atua-foafoa.

“O loo a’oa’o fa’apitoa mai lava e le Tusi Paia ia i tatou ina ia tatou fa’aeteete i lo tatou aumaia o tu’ua’iga i se manatu māmā e fa’atatau ia i latou ua vala’auina e le Atua e galulue e avea ma Ona sui.” – *Patriarchs and Prophets*, pp. 385, 386.

Aso Gafua

Aukuso 19

2. TALITONUGA FA’AMAUALUGA LĒ FA’AVAEINA

- a. **E fa’apefea ona lapata’i le Atua i le tagata fa’amaualuga e tautalatala fa’amaualuga i lo latou tu’inanau – aemaise ai lava pe afai latou te taumafai e tololoto mai i totonu i le lotolotoi o Ona tagata? 2 Peteru 2:11-13.**

“A pulea se tagata e le malosia fa’atosina o Satani, ua galo loa le Atua, ma o le tagata lea ua fa’atumulia i fuafuaga leaga, ua vi’ia. O amioga ma fa’atinoga lilo o tu’inanauga maualalo lē mafai ona taofia o le tino, ua fa’atinoina e nei tagata fa’aseseina e avea ma amioga lelei. O le ituaiga lenei o faiga fa’ataulaitu. O le fesili a le aposetolo i le au talitonu i Kalatia e matuā aoga lava ona fesiligia: ‘Kalatia valea e, o ai ea na ia fa’aseseina outou, ina ia lē usiusita’i outou i le upu moni, lea ua fa’ailoa manino i luma o ō outou mata o Iesu Keriso ua fa’asatauroina i le lotolotoi o outou?’ O loo i ai lava se malosia taufa’asese i taimi uma i a’oa’oga sese ma tu’inanauga leaga o le tino. O le mafaufau ua matuā fa’aseseina o lea ua lē mafai ai ona manatunatu i mafaufauga poto, ma o se fa’aseseega o loo ta’ita’ieseina ai pea le mafaufau mai i le olaga māmā. O le va’ai fa’aleagaga ua

nenefu, ma o tagata e o'o mai i le taimi lea e lē'i fa'aleagaina a latou amio mamā, ua i'u ina nunumi o latou mafaufau i lalo o le uiga taufa'asese lē fa'amaoni o tagata faigaluega a Satani ia o loo fai mai o i latou o avefeau o le malamalama. O le fa'aseseega lenei lea e tu'uina atu ai i nei avefeau le malosi. Afai latou te o mai fa'aaliali ma le lē fefe ma faia fa'aaliali a latou fa'aseseega, o le a te'ena i latou e aunoa ma le fa'atali mo se sekone e tasi; peita'i latou te galulue muamua ina ia latou maua mai loto o tagata ma fa'amausali le talitonuga o tagata i totonu ia i latou e fa'apea, o i latou o tagata paia o le Atua o loo fa'asatauroina e i latou i latou lava. I le avefa o i latou ma Ana avefeau fa'apitoa, ona latou amata ai loa lea o la latou galuega faia ma le potu o le tosoeseina o tagata mai i le ala o le fa'amaoni e ala i lo latou taumafai e fa'alēaoga le tulafono a le Atua." – *Testimonies for the Church*, vol. 5, pp. 142, 143.

b. O le a le mea e tatau ona tatou taula'i i ai pe afai tatou te fetaia'i ma fa'afanoga fa'apea? Isaia 51:7, 8; Tito 1:15.

"I lenei tupulaga o le amio leaga o loo savalivali solo ai lo tatou fili le ti'apolo, e pei o se leona tagi, e sa'ili nisi na te fa'aumatiaina, ua ou iloa e tatau ona si'itia a'e lo'u leo i lapata'iga. 'Ia outou mataala ma tatalo, ne'i tou ulufale atu i le fa'aosoosoga.' E to'atele o loo i ai taleni popoto lava o loo latou tu'uina atu ma le amio leaga i le auunaga a Satani. O le a le lapata'iga e mafai ona ou tu'uina atu i ni tagata ua ta'utino mai ua latou o ese mai nai le lalolagi ma ua latou tu'ua ana galuega o le pouliuli? . . . O le to'atele o i latou e teufatuina manatunatuga lē mamā, o mafauauga lē paia, o fa'anaunaga lē fa'apaiaina, ma tu'inanauga maulalo. E inoino le Atua i fua e fuaina mai e se la'au fa'apea. O agelu e mamā ma paia, latou te va'ava'ai mai i olaga o tagata fa'apea ma le inoino, a'o Satani e fiafia. Oka, ma'imau e, pe ana manatunatu tane ma fafine i le mea e maua e ala i le solia o le tulafono a le Atua! O le solitulafono o se fa'alumaina lea i le Atua ma o se malaia lea i le tagata, i lalo o so'o se mea lava e tupu ma mea uma lava e tutupu. E tatau ona tatou manatu i ai fa'apena, tusa lava po'o le a le matagofie mai o lona ufiufi, ae po'o ai fo'i so'o se tagata na te faia le solitulafono." – *Ibid.*, p. 146.

Aso Lua

Aukuso 20

3. FA'AMASINOINA MO LE MALAMALAMA SILI ATU

a. O fa'apefea ona fa'amatalaina e le Tusi Paia le i'uga o i latou e sa'ili e fa'aumati tagata o le Atua? 2 Peteru 2:14; 2 Timoteo 3:5-9.

"O le fa'anoanoa ma le olaga pa'ū maulalo e mulimuli atu i le fa'asologa o amioga leaga maulalo o le tino, e lē mafai ona fuatiaina. O le lalolagi ua fa'aleagaina i lalo o tagata o loo nonofo ai. Ua toetiiti lava a latou fa'atumulia le tumu o la latou amio leaga; peita'i o le agasala lea o le a aumaia ai le fa'asalaga sili ona mamafa, o le fa'atinoina lea o le amio leaga i lalo o le ufiufi o le amioatua. O le Fa'aola o le lalolagi Na te lē'i te'ena lava le salamō moni, tusa lava po'o le a le telē o le agasala; peita'i Na te lafo mai upu

malolosi o a’oa’iga i Faresaio ma tagata pepelo. O loo sili atu si fa’amoemoe o lo o i ai mo le tagata agasala fa’aaliali nai lo le vasega lenei.

“ ‘O le mafua’aga lenei [o le lē fiafia lē alofa i le upu moni] o le a auina mai ai e le Atua ia i latou fa’aseseēga malolosi, ina ia latou talitonu ai i se pepelo: ina ia fa’asalaina uma ai i latou e lē’i talitonu i le upu moni, ae na fiafia i le amiolētonu.’ O lenei tane ma i latou na ia fa’aseseina, e lē alolofa e lē fiafia fo’i i le upu moni ae e fiafia i le amiolētonu. Ma o le a se fa’aseseega e sili atu ona malosi e mafai ona o’o mai i luga ia i latou, nai lo le fa’aseseega fa’apea, e leai se mea e to’asa ai le Atua i uiga o tu’inanauga maulalo o le tino ma le mulilua? O loo tele lapata’iga o loo i totonu o le Tusi Paia e fa’ata’au i nei agasala.” – *Testimonies for the Church*, vol. 5, pp. 144, 145.

“I le avea o a’u ma sui faigaluega a Keriso, Ou te aioi atu ia te outou o loo ta’utinoina le upu moni mo le taimi lenei, ina ia outou inoino vave lava i so’o se tagata i le taimi lava e fa’alatalata mai ai i uiga lē mamā, ma ia outou lafoa’ia le mafuta fa’atasi ma i latou e manāvaina mai ni manatunatuga lē mamā. Ia outou inoino i nei agasala-e-fa’aleagaina-ai, i le inoino sili lona malosi. . . .

“A’o fa’atupula’ia pea i totonu o le lalolagi i latou o loo fa’atinoina nei agasala leaga ma o le a latou aumai fa’amalosia i latou i totonu o a tatou ekalesia, ou te lapata’i atu ia te outou ina ia aua ne’i outou fa’atagaina i latou. Ia outou liliu ese mai i le tagata fa’atosina. E ui lava ina ia ta’utino mai o loo ia mulimuli ia Keriso, o ia lava o Satani i le tino tagata.” – *Ibid.*, p. 146.

b. Ta’u mai se lamatiaga fa’apitoa mo i latou e ta’utino mai o loo ia i latou le malamalama sili atu ona tele. Roma 2:21-23.

“O le feau sili ona tāua ua fa’apea ona tu’uina mai i tagata, ua tu’uina mai lea i lenei tino o tagata, ma e mafai ona latou maua se a’afiaga malosi lava pe afai o le a fa’apaiaina ai i latou i le feau lea. Latou te ta’utino mai o loo latou tula’i i luga o le fa’avae maualuga o le upu moni e fa’avavau, ma latou tausia ai poloa’iga uma a le Atua; o lea la, afai latou te tu’inanau i le fa’amalieina o le agasala, afai latou te faia le faita’aga ma le mulilua, e fa’asefuluina le sili atu o le telē ma le leaga o la latou agasala nai lo agasala a vasega ua ou ta’uina atu, o ē e lē o ioeina o loo tumau i luga ia i latou le tulafono a le Atua.” – *Ibid.*, vol. 2, pp. 450, 451.

Aso Lulu

Aukuso 21

4. UA O’O MAI LE TAIMI E LAFOA’I AI A TATOU AGASALA FA’APELEPELEINA!

a. O ai e fa’atusalia i ai i tatou pe afai tatou te tu’inanau pea ma le loto ma’a’a i so’o se masaniga agasala – ma aisea fo’i? 2 Peteru 2:15, 16; Numera 22:9, 12, 21, 27, 28; 31:16.

“O se lapata’iga mata’utia lenei mo tagata o le Atua i le aso lenei, aua ne’i fa’atagaina se uiga lē kerisiano e nofo i totonu o ō latou loto. O se agasala o loo fafagaina

e i'u ina avea ma masaniga; ma, a fa'amalosia e ala i le fa'atinoina so'o, e lē umi ae ia tu'uina mai loa se a'afiaga pule, ma aumaia ai ia gaua'i mai i ai malosi uma e sili atu ona lelei. O Palaamo na ia fiafia i le tau'i o le amiolētonu. O le agasala o le mana'o, lea e fa'aigoaina fa'atasi e le Atua ma le ifo i tupua, na te lē'i te'ena ma fa'ato'ilaloina. O Satani na ia maua le puleaga atoa lava o ia e ala i lenei sese e tasi, lea na pa'ū maualalo ai lana amio." – *The SDA Bible Commentary* [E. G. White Comments], vol. 1, p. 1116.

b. O le a se lamatiaga mo i latou e ta'utino mai o loo ia i latou le malamalama sili atu ona tele? Roma 2:21-23.

“O le tagata gugutu o loo i ai le agaga o temoni, na te fai mai ua ia te ia le sa'olotoga tele lava, ma o gagana molemole ma le so'ona fa'atelēina na te sa'ili ai e fa'atosina ma fa'asese tagata lē fa'autauta ina ia latou filifilia le ala va tele o fiafiaga ma tu'inanauga agasala, ae lē o le ala vaiti ma le ala sa'o. O i latou o loo i ai agaga o temoni, latou te fa'aigoaina mana'oga o le tulafono a le Atua o le nofo pologa, ma latou te fai mai o i latou e usita'i i ai, o loo latou ola i se olaga o le mata'u nofo pologa. O upu molemole ma le matagofie latou te vivi'i fa'alialiavale ai i lo latou sa'olotoga, ma sa'ili ai e ufiufi a latou a'oa'oga sese mata'utia i ofu o le amiotonu. Latou te faia soligatulafono sili ona leaga ia manatu i ai e fa'apea o ni fa'amanuiaga ia i le aiga tagata.

“Latou te tatalaina atu i luma o le tagata agasala se faitoto'a lautele e mulimuli ai i fa'aosoosoga a le loto fa'aletino, ma solia ai le tulafono a le Atua, aemaise ai lava le poloa'iga lona fitu. O i latou e tautala i nei upu tetele o le fa'alialiavale loto vi'i, ma manumalo ai i lo latou sa'olotoga i totonu o le agasala, latou te folafolaina atu i ē o loo latou fa'aseseina, le olioliga o le sa'olotoga i se ala o le tete'e i le finagalo fa'aalia o le Atua. O nei tagata fa'aseseina o loo latou i ai fo'i i latou i le nofo pologa sili ona leaga ia Satani ma o loo pulea e lona malosi, ae o loo latou folafolaina atu le sa'olotoga ia i latou o le a lē fefefe e mulimuli i le ala lava lea o le agasala lea ua latou filifilia.

“O upu o le Tusi Paia ua fa'ataunu'uina moni ai lava iinei, o tauaso o loo ta'ita'iina tauaso. auā o lē na te fa'ato'ilaloina se tagata, o ia fo'i na te fa'apologaina le tagata. O nei tagata fa'aseseina o loo latou i ai i lalo o le nofo pologa sili ona fa'amalaiaina i manaoga o temoni. Ua latou fa'atasia atu i latou i malosi o le pouliuli ma ua leai so latou malosi e tete'e atu ai i manaoga o temoni.” – *The Review and Herald*, April 15, 1875.

Aso Tofi

Aukuso 22

5. FA'AMANUIAINA I A'OA'IGA

a. Fa'amatala le filifiliga ua ia i tatou. 2 Peteru 2:19; Roma 6:16, 19; Fa'ataoto 10:17.

“O [Ioane] na masani lava ona lapata'ia ma fautuaina e le Fa'aola; ma o nei a'oa'iga na ia taliaina. A'o fa'aalia atu le amio a Iesu ia te ia, na va'aia ai e Ioane ona lava vaivaiga, ma na fa'amaualaloina ai o ia e le fa'aaliga. O aso ta'itasi, o le eseese ma lona lava uiga sauā, na ia va'aia ai le alofa ma le fa'apalepale o Iesu, ma na ia fa'alogi i Ana

lesona o le loto maulalo ma le onosa'i. O aso ta'itasi na tosina atu ai lona loto ia Keriso, se'ia o'o ina ia lē toe iloa ia lava ona o lona alofa mo lona Matai. O le mana ma le agalelei, o le mamalu ma le agamalu, o le malosi ma le onosa'i, lea na ia va'aia i le soifuaga o le Alo o le Atua i aso ta'itasi, na fa'atumulia ai lona loto i le alofa naunau. Na ia lafoa'iina atu lona ita loto leaga, finafinau i le fia sili, i le mana liua o Keriso, ma o le alofa fa'alelagi na galuea'iina ai i totonu ia te ia se liuaga o le amio.

“O le eseeseega iloga i le fa'apaiaina na galuea'iina i le olaga o Ioane, o le olaga lea o lona uso a so'o, o Iuta. . . . O le tele lava o taimi, a'o ia fa'alogo atu i upu a le Fa'aola, na o'o mai ai ia te ia le talitonuga, peita'i na te lē'i mana'o e fa'amaulalo lona loto pe fa'aali fo'i ana agasala. O lona te'ena o le a'afiaga fa'aleatua, na ia fa'alumaina ai le Matai lea na ia ta'utino mai e alofa i ai. O Ioane na ia fai taua ma le finafinau e tete'e atu i ona sese; peita'i o Iuta na ia lē amanaiaina le malosi fai filifiliga o lona mafaufau ma ia gaua'i atu ai i le fa'aosoosoga. . . .

“O Ioane ma Iuta o fa'atusa ia o i latou e ta'utino mai o i latou o so'o o Keriso. O so'o nei e to'a lua, sa ia i la'ua uma avanoa e su'esu'e ma mulimuli ai i le Fa'aa'oa'o fa'ale-atua. O i la'ua uma sa mafuta vavalalata lava ma Iesu ma sa la maua le avanoa sili ona tāua la te fa'alogo ai i Ana a'oa'oga. O i la'ua ta'itasi sa i ai amioga sese leaga lava o a la amio; ma o i la'ua ta'ito'atasi na mafai ona la maua le alofa tunoa o le Atua lea e liua ai le amio. . . . O le tasi, o lona oti i aso ta'itasi ia te ia lava ma le fa'ato'ilaloina ai o le agasala, na fa'apaiaina ai e ala i le upu moni; a'o le isi, o lona te'ena o le mana e liua ai, o le alofa tunoa ma lona tu'inaanau i fa'anaunauga fa'apito, na aumaia ai i le nofo pologa ia Satani.” – *The Acts of the Apostles*, pp. 557, 558.

Aso Faraile

Aukuso 23

FESILI TOE FA'AMANATU

1. Na fa'aapefea ona ono mafai ona sao mai Miriama i le fa'alumaina o le lepela?
2. E fa'aapefea ona fa'atatau lelei lava e le lalolagi o le taimi lenei, lapata'iga a Peteru mo i tatou i le taimi nei?
3. I totonu o se lalolagi pa'ū maulalo i le amio leaga, o a auala o le a ma'oti fa'apitoa ai lava tagata o le Atua?
4. O le a le auala e tasi lava e mafai ai ona ou sao mai ai i le i'uga o Palaamo?
5. Fa'amatala le eseeseega i uiga, i le va o Ioane agasala ma Iuta agasala.

Lesona 9

Sapati, Aukuso 31, 2024

TEUFATUINA O LE MALAMALAMA FA'ALE LAGI

“MAU TAULOTO: “O lenei, o lē ua iloa e fai le mea lelei, ae lē faia, o le agasala lea ia te ia” (Iakopo 4:17).

“Fai mai le agelu: ‘Afai e o’o mai le malamalama, ma o lena malamalama ua tu’ueseina po ua te’ena fo’i, ona o’o mai ai lea o le fa’asalaga ma le to’asa o le Atua; peita’i a’o le’i o’o mai le malamalama, e lē o i ai se agasala, auā e lē o i ai se malamalama mo i latou e te’ena.’” – *Testimonies for the Church*, vol. 1, p. 116.

Faitauga Fautuaina: *Testimonies for the Church*, vol. 2, pp. 695-711.

Ulua’i Aso

Aukuso 25

1. FA’AFITAU LI I UIGA

a. O fa’apefea ona fa’amatala e Peteru le i’uga o faia’oga pepelo? 2 Peteru 2:20.

“O faia’oga pepelo, e tula’i mai i totonu o le ekalesia ma ua manatu le to’atele o lo latou au uso i totonu o le fa’atuatuaga, o i latou o ni faia’oga fa’amaoni, ua fa’atusalia i latou e le aposetolo i ‘vai eli e lē o i ai ni vai, o ao ua lelea i le afā; ua tu’ua mo i latou le puao o le pouliuli e fa’avavau.’ Na ia fa’ailoa mai, ‘E sili atu le leaga o lo latou i’uga nai lo lo latou amataga.’” – *The Acts of the Apotles*, p. 535.

b. O a upu e fa’avavau e fesoasoani ia i tatou ina ia tatou fa’atumauiina se talitonuga mausali ma faia filifiliga potu pe a va’ai maualalo mai isi ia i tatou pe latou te tofotofoina fo’i lo tatou onosa’i? Failauga 7:8.

“E toa’tele tagata e manana’o e fa’avi’ivi’iina i latou, ma, o loo latou mata’itu ma le fuā mo uiga fa’alēano poo le lē amanaiaina fo’i o i latou. O loo i ai se agaga faigata lē fa’amagalo. O loo i ai le ‘anovale loto leaga, fete’ena’iga, ma le fa’atautavā. . . .

“A’o ē taumafai finafinau lava ina ia ē muamua, manatua o le a ē mulimuli i le finagalo o le Atua pe afai e te lē teufatuina se uiga agamalu ma le loto maualalo. O le fa’amauualuga o le loto o le a mafua ai ona to’ilalo le to’atele i le tulaga na semanu latou te manuia ai. ‘E muamua le fa’amauualalo i le mamalu,’ ma ‘e sili ona lelei o lē ua onosa’i nai lo lē ua loto fa’amauualuga.’” – *Testimonies for the Church*, vol. 5, p. 50.

Aso Gafua

Aukuso 26

2. O NI ATA FA’AFA’ATUSA MATAGOFIE

a. O le a se mea o loo fa’asino atu i ai Peteru ina ia fafaguina ai i tatou? Fa’ataoto 26:11; 2 Peteru 2:20-22.

“O le lalolagi ua pula mo lona fa’aumatiaga. E itiiti lava si taimi e mafai ona onosa’i ai le Atua. . . . E tatau ona latou inuina toēga o le ipu o Lona to’asa e lē masuia i le alofa tunoa. . . . O le a lē umi ae iloa loa po’o ai o loo i le itu a le Atua, ae po’o ai fo’i o le a lē mā ona o Iesu. O i latou e leai so latou loto tele fa’aleagaga e filifili ai ma le fa’amaoni i le tulaga latou te tutū ai i le lotolotoi o tagata lē talitonu, ma lafoa’i aga ma tifiga a le

lalolagi, ma fa'ata'ita'i i le olaga o Keriso o le fa'afitia e le tagata o ia lava, o loo latou mamā ia te Ia, ma latou te lē fiafia i Lana fa'ata'ita'iga.” – *Testimonies for the Church*, vol. 1, p. 287.

b. O fa'apefea ona lapata'ia fa'apea e Keriso i tatou i lo tatou to'ilalo i lo tatou lē fa'atumauiina o se so'otaga agamalu, fa'alagolago atu ia te Ia? Luka 11:24-26.

“O le fale fa'amatagofieina o loo fa'atusalia mai ai le tagata e ta'uamionu e ia, ia lava. O Satani ua tuliese e Keriso. Peita'i na ia toe fo'i mai, i lona fa'amoemoe na te mafai ona toe ulufale mai. Ua ia maua mai le fale o gaogao, ua uma ona salu fa'amamāina, ma fa'amatagofieina. E na o le ta'uamionuina lava e le tagata o ia lava, o loo nofo ai iina. “Ona alu ai lea o ia, ua na aumaia isi agaga e to'a fitu e sili lo latou leaga i lona, ona latou ulufale atu ai lea, ua nonofo ai; ona sili ai lea o le leaga o le i'uga o lea tagata nai lo lona amataga.’

“O le ta'uamionuina e le tagata o ia lava o se mala lea, o le fa'afefeteina e le tagata o ia lava, lea e fa'aaoga e Satani mo lona vi'iga. O i latou e fa'amatagofieina le loto i upu fa'avi'ivi'i ma vi'iga o le tagata lava ia, ua latou saunia le ala mo isi agaga leaga e fitu e sili atu ona leaga nai lo le muamua. I lo latou taliaina tonu lava o le upu moni, o nei tagata latou te fa'aseseina i latou lava. O loo latou fausia i luga o se fa'avae o le ta'uamionuina e le tagata o ia lava. O tatalo a fa'alapotopotoga atonu e ofoina atu i le Atua ma se fa'asologa o sauniga, peita'i afai o loo ofoina atu i le uiga ta'uamionuina e le tagata o ia lava, e lē o vi'ia ai le Atua e i latou. Ua fetalai mai le Ali'i, ‘O le a Ou fa'ailoa atu lau amionu, ma au galuega; auā o le a lē fa'amanuiaina ai oe.’ E ui lava i a latou fa'aaliga uma lava, o ō latou tino teuteuina, e sau Satani i totonu fa'atasi ma se vaega o agelu leaga ma nofo ai i totonu o le loto, ina ia fesoasoani i le fa'aseseega. Ua tusi mai le aposetolo, ‘Auā afai na latou sosola mai i mea leaga a le lalolagi ina ua iloa lelei o le Alii o le Fa'aola lea o Iesu akeriso, ae ua toe fa'alavelaveina i latou, ma toilalo ai i nā mea, ona tele ai lea o le leaga o lo latou iuga nai lo lo latou amataga. Auā e lelei pe ana latou lē iloa le ala o le amionu, ae leaga ina ua latou iloa, ma toe liliu ese i le poloaiga paia sa tuuina mai ia te i latou.’” — *The SDA Bible Commentary* [E. G. White Comments], vol. 5, p. 1093.

Aso Lua

Aukuso 27

3. FA'AAUAU PEA I LE FA'ATUATUA

a. Aisea o loo fa'atonuina manino ai i tatou ina ia tatou “aga'i pea i luma” i totonu ia Keriso? Kolose 1:21-23.

“E lē fa'apea se'iloga tatou te filifilia ma le loto i ai, le auunaga i le mālō o le pouliuli ina ia tatou o mai ai i lalo o lana pule. E na o lo tatou fa'atalalē lava e fa'atasi atu i le mālō o le malamalama. Afai tatou te lē galulue fa'atasi ma mea faigaluega a le lagi, o le a pulea loa e Satani le loto, ma o le a ia faia ma ona nofoaga tumau. E tasi lava le talita e tete'e atu ai i le ti'apolo, o le afio lea o Keriso i totonu o le loto e ala i le fa'atuatua i

Lana amiotonu. Se'ivagana ua tatou matuā feso'ota'i lava ma le Atua, e lē mafai lava ona tatou te'ena a'afiaga lē fa'apaiaina o le alofa o le tagata ia te ia lava, o le so'ona fa'amalieina o tu'inaanau o le tagata lava ia, ma fa'aosoosoga ina ia agasala. Atonu tatou te lafoa'ia le tele o masaniga leaga, mo sina taimi atonu tatou te lafoa'ia ai Satani; peita'i a aunoa ma se so'otaga ola ma le Atua, e ala i le gaua'iina atu o i tatou ia te Ia i sekone ta'itasi, o le a fa'ato'ilaloina i tatou. A aunoa ma se mafutaga ta'ito'atasi ma Keriso, ma se talanoaga fai fai pea, ua tatou i lalo loa o le malosi o le fili, ma o le a tatou faia ai ana fa'atonuga i le i'uga." *The Desire of Ages*, p. 324.

b. Fa'amatala le paleni matagofie e tatau ona tatou malamalama i ai e ala i le ta'uamiotonuina e ala i le fa'atuatua ia Iesu. Roma 3:24-26; Eperu 6:4-6; 10:26, 27.

“O Lē na fa'amalolo i tagata mama'i ma tuli i fafo temoni ina o Ia savali i le lotolotoi o tagata, o le Fa'aola malosi lava lea e tasi o le taimi lenei. O le fa'atuatua e o'o mai e ala i le upu a le Atua. Taofi mau nei la Lana folafolaga, 'O lē e sau ia te A'u o le a Ou lē tulia lava i fafo.' Ioane 6:37. Ia lafo atu nei oe i Ona aao ma le alaga, 'Le Alii e, ou te talitonu; Ia *Ē* fesoasoani mai i lo'u lē talitonu.' E lē mafai ona *ē* fano a'o *ē* faia lenei alaga – e lē mafai ona *ē* fano.” – *Ibid.*, p. 429.

“A'o va'ava'ai atu le tagata agasala i le tulafono, o lona agasala ua fa'amaninoina mai ia te ia, ma ua mamafa mai i le malamalama'aga o lona mafaufau, ma ua fa'asalaina ai o ia. E tasi lava lona fa'amafanafanaga ma lona fa'amoemoe, e maua lea i lona va'ava'ai atu ia Iesu o maliu i Kalevario. A'o ia manatunatu i folafolaga, ma talia ai le upu a le Atua e fa'apei lava ona Ia fetalai mai, o le mapusaga ma le filemu ua o'o mai i lona loto. Ua ia alaga fa'apea, 'Le Alii e, ua *Ē* folafola mai *Ē* te lavea'i ia i latou uma e o atu ia te Oe i le suafa o Lou Alo. O a'u o se tagata ua lē iloa le ala, leai so'u fesoasoani, leai so'u fa'amoemoe. Le Alii e, lavea'i mai, po'o le a ou fano.' O lona fa'atuatua ua taofi mau atu ia Keriso, ma ua ta'uamiotonuina o ia i luma o le Atua.

“A'o mafai ona amiotonu le Atua, ma Ia ta'uamiotonuina le tagata agasala e ala i le amiotonu o Keriso, e leai se tagata e mafai ona ufiufiina lona agaga i ofu o le amiotonu a Keriso a'o ia fa'atinoina agasala o loo iloa, poo lona fa'atalalē fo'i i tiute o loo iloa. E mana'omia e le Atua le gaua'i atoa lava o le loto, a'o le'i mafai ona o'o mai le ta'uamiotonuina; ma o le auala e mafai ai ona fa'atumauiina e le tagata le ta'uamiotonuina, e tatau ona i ai le usita'i fa'aauau, e ala i le fa'atuatua galue, ola lea e galuea'iina e le alofa ma fa'amamāina ai le agaga.” – *Selected Messages*, bk. 1, pp. 365, 366.

Aso Lulu

Aukuso 28

4. OLA E TUSA AI MA LE MALAMALAMA

a. O le fa'amanuiaina o i tatou e pei ona i ai i le taimi lenei i le tele o le malamalama mai i le Lagi, o le a se mea tatou te mana'omia ia manatua pe afai e moni lo tatou naunauta'iga e fa'atatau i lo tatou fa'aolataga? Iakopo 4:17.

“A talanoa atu i tagata e fa’atatau i le mataupu o le ola maloloina, e masani lava ona latou fai mai: ‘E tele lo matou iloa e sili atu nai lo lo matou iloa moni o loo i ai.’ Latou te lē iloa e fa’amasinoina i latou mo ave ta’itasi uma o le malamalama e fa’atatau i lo latou ola maloloina fa’aletino, ma o a latou masaniga ta’itasi uma o loo mātala atu i le auiliiliga a le Atua. O le olaga fa’aletino e lē tatau ona tausia i se uiga fa’atautala. O tōtōga ta’itasi uma, o vaega ta’itasi uma o le tagata ola, e tatau ona leoleoina fa’apaiaina mai i fa’atinoga e fa’amanu’alia ai.” – *Testimonies for the Church*, vol. 6, p. 372.

b. I le tele o vaega o le upu moni mo le taimi lenei lea e mana’omia ai le toe fuata’iga (o le ola maloloina o le tasi lea o fa’ata’ita’iga), o le a le mamao o o’oo’oga o i’uga o a tatou filifiliga o aso ta’itasi? Roma 14:21; Ieremia 13:20.

“O le mataupu o le toe fuata’iina o le ola maloloina ua fa’aילוaina atu i totonu o ekalesia; peita’i o le malamalama e lē’i taliaina ma le loto atoa. O le tu’inanauga fa’apito e fa’aumatiaina ai le ola maloloina o tane ma fafine, ua latou fa’alēaogaina le a’afiaga o le feau lea e tatau ona saunia ai ni tagata mo le aso tele o le Atua. Afai e mana’o ekalesia i le malosi, e tatau ona latou ola i le upu moni ua tu’uina atu e le Atua ia i latou. Afai e lē amana’ia e tagata o a tatou ekalesia le malamalama i lenei mataupu, o le a latou seleseleina le i’uga mautinoa i le pa’ū maulalo fa’aleagaga ma le fa’aletino. Ma o le a’afiaga o nei tagatā ekalesia sili atu ona matutua, o le a fa’afefeteina ma fa’atumulia ai i latou e fou mai i le fa’atuatuaga. E lē o galue i le taimi lenei le Alii ina ia aumaia ni tagata se to’atele i totonu o le upu moni, talu ai ona o tagata ekalesia e lē’i liua lava, ma i latou sa liua muamua ae ua toe solomuli i tua. O le a le a’afiaga o le a faia e nei tagata lē fa’apaiaina i tagata fou e liua mai? O le a latou lē fa’alēaogaina ea le feau na tu’uina mai e le Atua lea e tatau ona alagaina e Ona tagata?” – *Ibid.*, pp. 370, 371.

c. I lo tatou iloaina o matafaioi mamafa ua i luga nei o i latou uma lava ua tu’uina mai i ai le malamalama na auina mai e le Atua mo le taimi lenei, o le a se olega finafinau ua toe fa’aleoina mai i lalo ia i tatou i le taimi tonu lava lenei? Ieremia 3:12, 13; Salamo 32:5.

Aso Tofi

Aukuso 29

5. AGA’I I LUMA

a. Fa’amatala ni olega mo le ekalesia a le Atua o loo ola i taimi faigata. Eperu 5:13, 14; 6:1; Filipi 2:14, 15.

“I a tatou ekalesia uma lava, e tatau ona i ai se toe liuaga ma le toe tu’u atu fa’apaiaina mo auunaga. O le a tatou lē *loto gatasi* ea, i la tatou galuega i le lumana’i ma fa’apotopotoga tatou te faia? O le a tatou lē tauivi ea ma le Atua i le tatalo, ma ole atu mo le Agaga Paia ina ia afio mai i totonu o loto ta’itasi uma? O le Agaga Paia o Keriso, a fa’aalia i le lotolotoi o i tatou, o le a fa’amaloloina ai le lepela o le lē talitonu lea ua matuā fa’avaivaia ma lē mafai ainona fa’ataunu’uina la tatou auunaga ona o le lē agava’a. Tatou

te mana'omia le mānava o le ola o le Atua ina ia mānāvaina mai i totonu ia i tatou. E tatau ona avea i tatou ma mea faigaluega e auina atu ai e le Ali'i le malamalama ma le alofa tunoa i le lalolagi. O i latou na tu'umuli i tua e tatau ona toe faa'fo'iina mai. E tatau ona tatou tu'ueseina a tatou agasala, e ala i le fa'aalia o a tatou agasala ma le salamo, ma le fa'amaulaloina o ō tatou loto fa'amaualuluga i luma o le Atua. O galu lolo o le mana fa'alēagaga o le a sasa'aina mai i luga o i latou ua saunia ina ia talia lea mana fa'aleagaga." – *Testimonies for the Church*, vol. 8, p. 46. [Author's emphasis.]

“Tusa lava po'o le a lau galuega o le a faia, tuagane pelē ma tuafafine, ia outou faia e peisea'i o loo outou faia mo le Matai, ma ia ē faia le mea sili e te mafaia. Aua e te lē amanaiaina avanoa fa'auro o le taimi lenei ma ē fa'amaonia mai ai o lou olaga o se to'ilalo, a'o ē nofonono fa'afifilemu ma ē moe miti ai i se olaga fa'afifilemu ma le fa'amanuiaina i se galuega lea e lē'i saunia lava oe e le Atua e te faia. Ia ē faia le galuega lena e silisili ona latalata ane ia te oe. Ia ē faia, e ui lava ina atonu o loo i le lotolotoi o fa'afanoga ma faigata i totonu o le laueleele fa'amisionare; peita'i, aua, ou te aioi atu ia te oe, aua e te faitio e fa'atatau i faigata ma lou fa'asatauroina ai e oe o oe lava. Va'ai fo'i i tagata Waldenses. Va'ai po'o a fuafuaga na latou fafauina ina ia mafai ai ona susulu atu le malamalama o le tala lelei i totonu o mafaufau pogisa. E lē tatau ona tatou galulue ma le manatu ina ia maua lo tatou tau i le olaga lenei, ae ia tatou galulue ma o tatou mata o taula'i mausali atu i le tau i le i'uga o le tausinioga. O tane ma tama'ita'i o loo mana'omia i le taimi lenei, o ē e mausali i tiute e fa'apei ona mausali o le nila i le pole, o tane ma fafine o le a galulue e aunoa ma le fa'alamolemoleina o lo latou ala, e aunoa fo'i ma le aveesea o mea o loo fa'alavelaveina ai le tauaveina i luma o le galuega.” – *Colporteur Ministry*, pp. 68, 69.

Aso Faraile

Aukuso 30

FESILI TOE FA'AMANATU

1. **Ou te manatu ea o se mea e sili ona leaga pe a foliga mai e lē fa'atāuaina a'u e se tasi?**
2. **O a auala e fa'aalia ai le ta'uamionu e le tagata o ia lava, i aso mulimuli nei?**
3. **E fa'apefea ona mafai ona maua ma fa'atumauina le ta'uamionuina e ala i le fa'atuatua i le toto o Keriso?**
4. **O a vaega o le olaga e mana'omia ia sili atu ona lafoia atu ai e a'u gaioga, le mea o loo o'u iloa?**
5. **A fa'aosoosoina a'u ina ia ou faitio, o le a se mea e tatau ona ou manatua?**

SAPATI, SETEMA 7, 2024

Taulaga Sapati Muamua mo le Nofoga Autu a le Iuni a Angola

O le matagaluega a le Fa'agaioiga Toe Fuata'i Aso Fitu O Le Toe Afio Mai i Mātū i sasa'e o Angola, na fa'avaeina e le Koneferenisi Aoao i le 2015, e auuna ai i itumalo e tolu – Kwanza i Mātū, Uíge, ma Malanje. O le itumalo mulimuli ei totonu o nofoaga autu

o le Laueleele a Angola i Mātū Totonu. O lea laueleele e 181,110 kilomita fa’atafafa ma o le fuaitauaofa’i o tagata e tusa ma le 3,550, 774. O le Fa’agaioiga Toe Fuata’i Aso Fitu O Le Toe Afio Mai na o’o mai i lenei ogaeleele i le 1978 i se amataga fa’asolosolo. Ae ui i lea, i le 1990, e ala i le alofa tunoa o le Atua, o le galuega ua i’u ina fa’amausaliina moni lava i lenei nofoaga, ma talu mai lea taimi, e lē’i muta lava le feau. O la’asaga tāua lava ua tauaveina i luma ma o le feau o le upu moni mo le taimi lenei ua o’o atu nei i le tele o nofoaga lata mai i lea ogaeleele.

O lo matou mana’oga i le taimi lenei, e mo se fale ofisa ma ni ona potu e galulue ai mo le aufaigaluega a le Iuni a Angola, o se fale tusi, ma se fale tele mo fonotaga.

Ua matou maua le fanua i se vaega eleele e faigofie ona malaga i ai tagata. Matou te fa’amoemoe e mafai ona matou fausia ai le fale o loo mana’omia i lenei nofoaga, ina ia fa’aailoa tonu atu ai le galuega paia a le Atua i lenei itu o le atunu’u.

I le manatunatu i le galuega tele o loo i o matou luma, matou te mana’omia ai se fa’alapotopotoga fa’aletapua’iga o le a fa’atagaina le tu’ufa’atasia ma le fuafuaina o gaioiga i se fa’atulagaga atoatoa ona lelei – ma ia manatua ai “[O le Atua] Na te mana’omia le fa’atulaga lelei ma le fa’asologa lelei ina ia mulimulita’ia i le ta’ita’ia o mataupu fa’ale-ekalesia i le taimi lenei e lē itiiti ifo nai lo aso anamua. Na te finagalo i Lana galuega ina ia tauaveina i luma ma le mae’ae’a ma le ma’oti ina ia mafai ai ona Ia tu’uina mai i ai le fa’aailoga o Lona finagalo fiafia mai. O le kerisiano e tatau ona fa’atasi ma le kerisiano, o le ekalesia ma le ekalesia, o le mea faigaluega fa’aletagata e galulue fa’atasi ma le Atua, o mea faigaluega ta’itasi uma e i lalo ifo o le ta’ita’iga a le Agaga Paia, ma tu’ufa’atasia uma ai i le tu’uina atu i le lalolagi o tala lelei o le alofa tunoa o le Atua.” – *The Acts of the Apostles*, p. 96.

O le feau o le fa’aolataga e tatau ona o’o atu i laueleele uma, ma ua tatou mautinoa “o le a lē to’ilalo le Alii, o le a lē mafai fo’i ona fa’aumatiaina, se’ia o’o ina Ia auina mai le fa’asalaga i luga o le fogaeleele; o atu motu fo’i o le a latou fa’atali mo lana a’oa’oga” (Isaia 42:4).

“I lenei la malamalama’aga matou te ole atu ai i o tatou uso ma tuafafine i le lalolagi atoa ina ia fesoasoani mai ia i matou e ala i lo latou matuā foa’i ma le agalelei i a outou taulaga i lenei galuega e fesoasoani ai i le fa’asalalauina o le tala lelei i tagata i lenei vaega tele o Angola. Tau ina ia fa’amanuia tele le Alii le Atua ia te outou.

O ō outou uso ma tuafafine mai i le Iuni a Angola i Mātū i sasa’e

Lesona 10

Sapati, Setema 7, 2024

Fa’amalosia o ō Tatou Mafaufau

MAU TAULOTO: “Le au pele e, ou te tusi atu ia te outou lenei tusi lona lua, o ia tusi, ou te fa’amafanafana atu ai i o outou loto fa’amaoni i lo’u fa’amanatu atu.” (2 Peteru 3:1).

“E tatau ona tatou toe fa’amatalaina i taimi uma o tatou fa’amanuiaga. E tatau ona tatou fa’aputuina fa’atasi i latou ma tautau i puipui o le mafaufau. O le a le ituaiga ata o le a ē tautauina ai iina i le aso lenei?” – *The Review and Herald*, March 26, 1889.

Faitauga Fautuaina: *Testimonies for the Church*, vol. 5, pp. 671-691.

Ulua’i Aso

Setema 1

1. O SE OLEGA I LE MAFAUFAU

a. E fa’apefea ma aisea ua ole mai ai Peteru i le malosi o ō tatou manatunatuga? 2 Peteru 3:1.

“A mafai loa ona sili atu ona malamalama atoatoa tane ma tama’ita’i i le telē tele o le taulaga silisili na faia e le Tupu o le lagi i Lona maliu e sui a’i le tagata, o le a si’itiaina loa ma fa’amamaluina le fuafuaga o le fa’aolataga, ma o ata toe lafoia mai o Kalevario, o le a fafaguina ai lagona alofa, paia, ma le fiafia i totonu o le loto o le kerisiano. O vi’iga i le Atua ma le Tama’i Mamoe o le a i ai i totonu o ō latou loto ma o latou laugutu. O le fa’alialiavale ma le mautinoaga o le tagata ia te ia lava e lē mafai ona ola lauusi i totonu o loto o loo latou teufouina i o latou manatunatuga va’aiga o Kalevario. O lenei lalolagi o le a foliga mai e itiiti lava lona aoga ia i latou e fa’atāuaina le tau tele o le toe fa’atauina mai o le tagata, o le toto paia lea o le Alo pele o le Atua. O oa uma lava o le lalolagi e lē lava lo latou aogā e toe fa’atau mai ai se tagata e to’atasi o loo fano. O ai e mafai ona ia fuaina le alofa na lagonaina e Keriso mo se lalolagi ua leiloa a’o Ia tautau i luga o le satauro, ma puapuagatia ai mo agasala a tagata agasala? O lenei alofa na lē’i mafai ona fuatiaina, e lē mafuatia.” – *Testimonies for the Church*, vol. 2, p. 212.

“Oka, ma’imau e, pe ana tu’uina atu atoa malosi o loo fa’aaogaseseina, i le sini tele e tasi – o oa tamaoaiga ia o le alofa tunoa o le Atua i lenei olaga – semanu oka ni molimau e mafai ona tatou tautauina i puipui o manatunatuga o ō tatou mafaufau, ma toe fa’amanatuina ai alofa tunoa ma le agalelei o le Atua! . . . O le a tauaveina loa fa’atasi ma i tatou le masaniga e avea o se tapula’a tumau, ina ia matuā fa’apututeleina oa fa’aleagaga i le finafinau ma le vilivilita’i, e fa’apei ona galue o tagata fa’apea mo mea fa’alalolagi ma mea fa’alētumau.” - *Our High Calling*, p. 188.

Aso Gafua

Setema 2

2. O MEA E TATAU ONA TEUINA I TOTONU O Ō TATOU MAFAUFAU

a. O le a se mea e tatau ona avea ma fa’amuamua tele lava mo i tatou ina ia tatou manatua, ma aisea fo’i? 2 Peteru 3:2; Salamo 119:11.

“O fa’aosoosoga e masani lava ona foliga mai e lē mafai ona te’ena, talu ai, ona o le fa’atalale i le tatalo ma le su’esu’eina o le Tusi Paia, o lē ua fa’aosoosoina e lē mafai ona ia manatua vave folafolaga a le Atua ma fa’afetaia’ia ai Satani i a’upega a le Tusi Paia.

Peita'i o agelu o loo si'omiaina i latou o loo naunau ina ia a'oa'oina i latou i mea fa'ale-Atua; ma, i le taimi e matuā mana'omia ai lava le fesoasoani, o le a latou manatua upu moni tonu lava ia e mana'omia. E fa'apena, 'a sau le fili e fa'apei o se lolo, o le Agaga o le Atua o le a Ia si'itiaina i luga se tapula'a e tete'e atu ai ia te ia.' Isaia 59:19.

“Na folafola mai Iesu i Ona so'o: 'O le Fa'amafanafana, o le Agaga Paia lea, lea o le a auina mai e le Tamā i Lo'u Igoa, o le a Ia a'oa'o ia te outou i mea uma lava, ma fa'amanatu mai mea uma i ō outou mafaufau, o mea uma lava ua Ou fai atu ai ia te outou.' Ioane 14:26. Peita'i o a'oa'oga a Keriso e tataua ona uma ona teuina i totonu o le mafaufau ina ia fa'amanatu mai ai e le Agaga o le Atua i o tatou mafaufau i le taimi o fa'afanoga.” - *The Great Controversy*, pp. 599, 600.

b. Ta'u mai fa'ata'ita'iga o loo fa'amamafa mai ai le tāua tele o le teuina i o tatou mafaufau o tala'aga ma a'oa'oga o le Tusi Paia. Luka 1:67-70; Galuega 3:20, 21.

“O le Tusi Paia e sili lona matua, e mai anamuā, ma o le tala'aga lea e sili ona atoatoa ua maua e tagata. Na tu'ufouina mai i le vaipuna o le upu moni e fa'avavau, ma i augatupulaga uma, o le aao o le Atua ua Ia tausi fa'atumauiina lona mamā. Ua ia fa'amalamalamaina le taimi mamao ua tuana'i, lea e sa'ili tagata ma le lē aogā ina ia latou iloa. E na o totonu lava o le Upu a le Atua tatou te va'aia ai le mana na folasia fa'avae o le eleele ma fofolaina le lagi. Na o le pau lava lea o le tusi tatou te maua ai se fa'amatalaga moni o le amataga o mālō. E na o iinei fo'i o loo aumaia ai se tala'aga o lo tatou aigā tagata e lē'o fa'aleagaina e le fa'alialiavale poo le uiga fa'ailoga-tagata o tagata.” - *Education*, p. 173.

“O loo mamafa i lo'u mafaufau le mataupu e fa'atatau i le tusia e fa'atatau i tala'aga o le Feagaiga Tuai. Ua ou matuā atuavale i lo'u va'ai atu i o'u tuagane ma uso o latou aumaia i totonu o le olaga o aso ta'itasi, upu moni itiiti lava fa'ale-Tusi Paia. O le auala mo i tatou e avea ai ma tagata manumalo, e tataua ona tatou iloa o loo i ai le taua e tataua ona tauina. Tatou te olioli i lo tatou iloaina, e ala i le mana fa'amalosi mai o le alofa tunoa o le Atua, tatou te mautinoa lava tatou te manumalo. E sili atu ona malosi le Atua nai lo malosi uma lava o le fili ua pa'ū.” - *The Bible Training School*, June 1, 1903.

Aso Lua

Setema 3

3. O SE FA'AILOGA FA'AVALO'AGA UA FA'ATAUNU'UINA

a. O le a se mea o loo tupu i aso mulimuli ina ia lūlū ai le fa'atuatua o le to'atele? 2 Peteru 3:3.

“O le auala ta'atele lava o loo fa'aaogaina i le a'oa'oina o talavou, na te lē ausia le tapula'a o le a'oa'oga moni. O manatu lē talitonu ua tu'ufa'atasia i mataupu o loo tu'uina i totonu o tusi a'oga, ma o poloa'iga a le Atua, ua tu'uina i se malamalama lē mautonu po'o se malamalama lē taliaina fo'i. Ua fa'apena ona masani mafaufau o talavou i manatu e fa'aosooso mai e Satani, ma o masalosologa ia ua manatunatu i ai, ua avea ma mea moni fa'amautinoaina, ia i latou o loo manatunatu i ai, ma o su'esu'ega fa'asaientisi ua faia ina

ia fa'asese ai le fa'auigaina ma le fa'aleagaina o ana su'esu'ega. O tane ua latou tauaveina i luga ia i latou le avatu fa'amalosia o le upu a le Atua, i luma o fa'amasinoga a tagata e oti, ma ua tu'uina mai ai le fa'asalaga i le Afioga a le Atua e tusa ai ma fua a tagata e oti, ma o le upu moni a le Atua ua faia ina ia foliga mai o se mea lē mautinoa i luga o fa'amaumauga a saienitisi. . . . O le taimi sa tatau ai ona latou fa'aosofia le fa'atuatua i totonu ia i latou sa masalosalo, sa latou ta'utino mai ai lo latou lava lē mautinoa pe moni le upu a le Atua, poo le i'uga fo'i o su'esu'ega fa'asaienisi, lea ua fa'aigoaina sese fa'apea. O i latou na fa'autauta fa'amaoni moni lava, ua faia i latou ina ia fa'avaivaia i lo latou fa'atuatua, ona o le lē mausalī o se filifiliga a i latou na ta'utino mai, o i latou e fa'amatalaina le Tusi Paia ina ua latou fa'amatalaina poloa'iga ola. O Satani ua ia fa'aaogaina le lē mautū o le filifiliga a le mafaufau, ma e ala i mea faigaluega lē va'aia, ua ia saputuina mai ai i totonu ana fa'aseseega, ma fa'anunumiina ai mafaufau o tagata i puao o le masalosalo." – *Fundamentals of Christian Education*, pp 328, 329.

b. O le a le apoapoa'iga a Paulo e fa'atatau i lenei tulaga i le taimi lenei? 1 Timoteo 6:20.

“O le lē suia o le natura ua tele lava ina a'oa'oina, ma o talitonuga masalosalo ua taliaina ma le fiafia e i latou ua filifilia e o latou mafaufau le si'omaga o le masalosalo, ona latou te lē'i loto gatasi ma le tulafono paia a le Atua, o le fa'avae lea o Lona mālō i le lagi ma le lalolagi. O ō latou fa'anaunauga fa'alēnatura i le agasala na fa'afaigofieina ai mo i latou le filifilia o ala sese, ma latou masalomia ai le fa'amaoni o fa'amaumauga ma tala'aga o le Feagaiga Tuai ma le Feagaiga Fou. O le fa'a'onāina o i latou e a'oa'oga sese, ua latou va'ava'ai ai mo avanoa ta'itasi uma lava ina ia lūlū ai fatu o le masalosalo i totonu o isi mafaufau. O le natura ua si'itiaina i luga a'e o le Atua na faia le natura, ma o le faigofie o le fa'atuatua ua fa'aumatiaina, ma o le fa'avae o le fa'atuatua ua faia ina ia foliga mai e lē manino. O le fa'anunumiina i le masalosalo, o mafaufau o i latou e masalosalo, ua tu'ua ina ia fa'ato'ilaloina i luga o papa o le lē fa'amaoni.” – *Ibid.*, pp. 329, 330.

Aso *Lulu*

Setema 4

4. O LE AGAGA O VALOAGA UA OSOFA'IA

a. E ese mai i le fa'alēaogaina o le pule a le Tusi Paia, o le a se isi mea o loo fa'atupula'ia le mata'itū i ai o osofa'iga mata'utia a Satani? Fa'aaliga 12:17; 19:10.

“O le fuafuaga a Satani le fa'avaivaia o le fa'atuatua o tagata o le Atua i *Molimau*. Ona soso'o mai ai lea ma le masalosalo e fa'atatau i vaega sili ona tāua o lo tatou fa'atuatua, o poutu ia o la tatou talitonuga, ona masalosalo ai fo'i lea e fa'atatau i le Tusi Paia, ona soso'o ai lea ma le savaliga aga'i i lalo i le fa'afanoga. A masalomia loa ma lafoa'ia *Molimau* ia sa talitonu muamua i ai, ua iloa loa e Satani o i latou ua fa'aseseina o le a lē fa'amuta ai iinei; ma na te fa'aluaia ai ana taumafaiga se'ia o'o ina ia lafoina atu i

latou i le fouvale fa'aaliali, lea e leai sona fofō ma i'u ai i le fa'aumatiaga.” – *Testimonies for the Church*, vol. 4, p, 211. [Author's emphasis.]

“O le fa'aseseega mulimuli lava a Satani, o le fa'alēaogaina lea o le molimau a le Agaga o le Atua. ‘A leai se fa'aaliga, e fano le nu'u.’ Fa'ataoto 29:18. O Satani o le a galue ma le potu, i auala eseese ma e ala atu fo'i i mea faigaluega eseese, ina ia lē mausalī le fa'atuatuga o tagata totoe o le Atua i le molimau moni. O le a ia aumaia i totonu fa'aaliga sese, ina ia ta'ita'iseeina ma nini fa'atasi ai fa'aaliga sese ma fa'aaliga moni, ma fa'apena ona inoino ai tagata, o lea o le a latou manatu ai i mea uma lava o loo tauaveina le igoa o fa'aaliga, o se ituaiga naunauta'iga lē fautuaina; peita'i o tagata fa'amaoni, o lo latou fa'atusatusaina o fa'aaliga sese ma fa'aaliga moni, o le a mafai ai e i latou ona iloa le eseese i le va o ia vaega.” – *The Faith I Live By*, p. 296.

b. O le a le mea e tupu pe a amata ona masalosalo i *Molimau* i latou o loo ta'utino mai e talitonu i le feau a le agelu lona tolu – ma e masani lava, aisea latou te faia ai lenei tulaga? Ioane 3:19, 20.

“Ou te iloa lou lamatiaga. Afai e te lē toe talitonuina molimau, o le a ē tafea ese mai i upu moni o le Tusi Paia. Ua ou fefe i le manatu lea, e to'atele o le a tu'ufesili ma masalosalo, ma i lo'u mafatiaga mo o outou agaga, ou te mana'o ai e lapata'i atu ia te outou. E to'a fia o le a taliaina le lapata'iga? E fa'apei o le tulaga ua outou talitonu ai nei i molimau, e tatau ea ona uia atu e se tasi lou ala, ma fa'asa'o ou sese, o le a ē lagona ea e te sa'oloto atoatoa ina ia talia pe te'ena fo'i so'o se vaega poo le molimau atoa? O le vaega lena o le a sili ona itiiti lou mana'o e talia, o le vaega tonu lava lena e sili ona mana'omia. O le Atua ma Satani e lē galulue fa'atasi lava. O molimau o loo fa'ailoa mai ai le fa'ailoga a le Atua po'o le fa'ailoga a Satani. O se la'au lelei e lē mafai ona ia fuaina mai fua leaga, e lē mafai fo'i e se la'au leaga ona fuaina mai fua lelei. O ō latou fua tou te iloa ai i latou. Ua fetalai le Atua. O ai ua gatete i Lana upu?” – *Testimonies for the Church*, vol. 5, p. 98.

Aso Tofi

Setema 5

5. TEUFATUINA O FE'AU MO LE ASO LENEI

a. Aisea e tāua tele ai le usita'i i molimau ua auina mai e le Atua i Ona tagata e ala mai i le Agaga o valoaga, aemaise ai lava i aso mulimuli nei? Fa'ata'oto 29:18 ('afa muamua); Hosea 12:13; 2 Nofoa'iga Tupu 20:20 ('afa mulimuli).

“Ua vala'au le Atua mo le fa'afouina o le molimau tu'usa'o sa alagaina i tausaga ua mavae. Ua Ia vala'au mo le fa'afouina o le ola fa'aleagaga. O malosi fa'aleagaga o Ona tagata ua leva ona ma'i vaivai, peita'i e tatau ona i ai se toe fa'atuina mai nai le foliga oti. O le tatalo ma le fa'aalia o agasala e tatau ai ona tatou fa'amamā fa'alaulelei le ala tele o le Tupu. A'o tatou faia lenei tulaga, o le mana o le Agaga o le a afio mai ia i tatou. Tatou te mana'omia le malosi fa'apenetekoso. O lenei malosi o le a o'o mai; auā ua uma ona folafola mai le Ali'i Na te auina mai Lona Agaga o le mana lea e manumalo atoa ai.

“O taimi fa’afanoina o loo i o tatou luma. O tagata ta’itasi uma lava o loo i ai se iloa e fa’atatau i le upu moni e tatau ona ala mai, ma tu’uina o ia, o le tino, loto, ma le agaga, i lalo o le koleniga a le Atua. O le fili o loo i luga o ō tatou ala. E tatau ona tatou matuā feala lava i lo tatou leoleo mataala e tete’e atu ai ia te ia. E tatau ona tatou o’ofu atoa i le talita a le Atua. E tatau ona tatou mulimuli i taula’igā ala ua tu’uina mai e ala i le Agaga o Valoaga. E tatau ona tatou alolofa ma usita’i i le upu moni mo le taimi lenei. O lenei tulaga o le a lavea’iina ai i tatou mai i lo tatou taliaina o fa’asesēega malolosi. Ua fetalai mai le Atua ia i tatou e ala mai i Lana upu. Ua Ia fetalai mai ia i tatou e ala mai i molimau i le ekalesia, ma e ala mai fo’i i tusi ua fesoasoani e fa’amanino ai lo tatou tiute mo le taimi lenei ma le tulaga e tatau ona tatou tula’i ai i le taimi lenei. O lapata’iga ua tu’uina mai, o lea laina i lea laina, o lea poloa’iga i lea poloa’iga, e tatau ona taliaina. Afai tatou te lē amana’iaina, o le a se alofaga e mafai ona tatou tu’uina atu?”

“Ou te aioi atu ia i latou o loo galulue mo le Atua ina ia aua ne’i latou taliaina a’oa’oga sese e fai ma a’oa’oga fa’amaoni. O loo fa’atali Keriso ina ia fa’amumūina le fa’atuatua ma le alofa i totonu o loto o Ona tagata. Aua lava ne’i taliaina talitonuga sese mai i tagata e tatau ona tula’i mausali i luga o le fa’avae o le upu moni e fa’avavau. Ua vala’au le Atua ia i tatou ina ia tatou taofi mausali i tapula’a fa’avae o loo fa’avaeina i luga o le pule mautinoa.” – *Gospel Workers*, pp. 307, 308.

Aso Faraile

Setema 6

FESILI TOE FA’AMANATU

1. **O a manatunatuga o loo o’u manatunatu i ai e tatau ona suitulaga ai manatunatuga sili atu ona lelei?**
2. **E fa’apefea ona mafai ona ou sauni i se tulaga silisili lava mo le tofotofoga tele lava o loo soso’o mai, lea e lē mafai ona ou ‘alo mai ai?**
3. **O a vaega o la’u a’oga o loo faia ae e fete’ena’i ma lo’u fa’atuatuaga?**
4. **Aisea ua finafinau ai le fili o agaga ina ia fa’alēaogāina *Molimau*?**
5. **Aisea e tatau ai ona ou fa’atāuaina ma fa’aaluina taimi e sili atu ona tāua i lo latou su’esu’eina?**

Lesona 11

Sapati, Setema 14, 2024

TAIMI FA’AOPOOPO MO SE SINI

MAU TAULOTO: “E lē fa’atuai mai le Ali’i i le mea na folafolaina mai, e fa’apei o le manatu o isi tagata i le fa’atuai; ae peita’i ua onosa’i mai lava o ia ia i tatou, ona ua lē finagalo ia fano se tasi, a ia o’o uma lava i le salamo”
(2 Peteru 3:9).

“A tatou tūla’i loa, fa’atasi ma le au fa’aolaina uma i luga o le sami tioata, fa’atasi ai ma kitara auro ma paleali’i mamalu, ma ua i o tatou luma le taimi umi lē mafuatia o le

olaga e fa'avavau, o le a tatou iloa ai le pu'upu'u tele o le taimi o le alofa tunoa tatou te fa'atali ai." – *Testimonies for the Church*, vol. 5, p. 485.

Faitauga Fautuaina: *Testimonies for the Church*, vol. 2, pp. 183-199.

Ulua'i Aso

Setema 8

1. O LE A LE MEA O LOO TATOU VA'AIA?

a. O le a se mea e masani ona ta'u mai e tagata a'amu o se 'alofaga lea mo o latou masalosologa – ma e fa'apefea ona a'afia le to'atele o loo fa'atali mo le Ali'i i lenei uiga? 2 Peteru 3:4; Isaia 56:12.

“O le fiafia i le lalolagi ua matuā fa'atumulia ai lava o tatou manatunatuga, o lea ua lē liliuina ai aga'i i luga o tatou olaga, peita'i ua liliuina aga'i i lalo i le lalolagi. O loo tatou fa'ata'alise solo, ma galulue ma le vilivilita'i ma le finafinau i galuega eseese, peita'i ua tatou fa'agaloina le Atua, ma o le oa fa'alelagi ua lē fa'atāuaina. Tatou te lē o i ai i se tulaga fa'atalitali, ma mataāla. O le fiafia i le lalolagi ma le taufa'asese o oa, ua ufitia ai lo tatou fa'atuatua, ma ua tatou lē fa'ananau atu, ma ua tatou lē fiafia, i le fa'aali mai o lo tatou Fa'aola. Ua tatou matuā taumafai lava i se tulaga faigata ina ia tausia i tatou e i tatou lava. Ua tatou popole ma matuā leai lava se fa'atuatuaga mausali i le Atua. O le to'atele o tagata e popole ma galulue, faufau ma fuafua, ma latou matata'u ai ne'i latou puapuagatia i le lē maua o mea e mana'omia. Latou te lē maua se taimi e tatalo ai po o le auai atu ai fo'i i fa'atasiga fa'aletapuaiga ma, i lo latou popole mo i latou lava, latou te lē tu'ua ai se avanoa mo le Atua Na te tausia i latou. Ma e lē tele se mea e faia e le Ali'i mo i latou, auā latou te lē tu'uina atu se avanoa ia te Ia. E tele tele mea latou te faia mo i latou lava, ae matuā itiiti lava lo latou talitonuga ma lo latou fa'atuatuaga i le Atua.

“O le fiafia i le lalolagi ua matuā mata'utia lona a'afiaga i luga o tagata na fa'atonuina e le Ali'i ina ia mataala ma tatalo e lē aunoa, ne'i Ia afio fa'afuase'i mai ma Ia maua mai i latou o momoe.” – *Testimonies for the Church*, vol. 2, pp. 195, 196.

Aso Gafua

Setema 9

2. MULIMULI ANE . . . PO UA MATUĀ VAVE TELE MAI?

a. Fa'amatala pe fa'apefea ona masani lava ona faia uiga fa'atauemu i le tele lava o taimi, i le lotolotoi o tagata talitonu o loo ta'utino mai o loo latou fa'atali mo le afio mai o Iesu. Mataio 24:48-51; Fa'ataoto 26:20-22; Roma 1:29-32.

“Fai mai le auauna leaga i totonu o lona loto, 'E fa'atuai mai lo'u Ali'i.' Na te lē fai mai o le a lē afio mai Keriso. Na te lē a'amu i le manatu e fa'ataatau i Lona afio fa'alua mai. Peita'i i totonu o lona loto ma ana gaioiga ma ana upu, na te fa'ailoa mai ai e fa'apea, ua fa'atuai le afio mai o le Ali'i. Na te tafiese mai i mafaufau o isi tagata le talitonuga ua vave le afio mai o le Ali'i. O lona a'afiaga e ta'ita'ia ai tagata i le fa'atuai fa'afoliga, lē

fa'aeteete. Ua fa'amausaliina i latou i totonu o lo latou fa'alelalolagi ma le oti fa'aleagaga. O tu'inanauga fa'alelalolagi, o manatu agasala, ua fa'atumulia ai le mafaufau. O le auauna leaga ua ia 'ai ma inu fa'atasi ma ē onanā, ma fa'atasi ma le lalolagi i sa'ili'iliga fiafiaga. Ua ia fasi i ona uso a auauna, ma faitioina ma fa'asalaina i latou o loo fa'amaoni i lo latou Matai." – *The Desire of Ages*, p. 635.

b. E fa'aapefea ona tatau ona tatou tula'i i le fa'atusatusa atu ia i latou e manatu o le toe afio mai o Keriso e matuā mamao ese atu i le lumana'i? Kolose 3:1-4.

“A'o liliu atu mafaufau o tagata fa'alelalolagi i galuega eseese, o ō tatou mafaufau e tatau ona liliu atu i le lagi; o lo tatou fa'atuatua e tatau ona o'o mamao atu ma atili mamao atu lava i mea lilo ofoofogia o oa fa'alelagi, ma aumaia ai ave tāua fa'alelagi o le malamalama mai i le malumalu fa'alelagi ina ia susulu i totonu o ō tatou loto, e fa'apei ona susulu i luga o foliga o Iesu. O tagata a'amu na latou fa'atauemu i le au paia fa'atalitali, mataala, ma tu'ufesili fa'apea: 'O fea o i ai le folafolaga o Lona afio mai? Ua outou fa'anoanoa. Ia outou galulue nei fa'atasi ma i matou, ma o le a outou manuia i oa fa'alelalolagi. Ia outou aumaia mea e maua mai, ia outou aumaia tupe, ma ia fa'amamaluina outou e le lalolagi.' O i latou na fa'atalitali na latou va'ava'ai a'e i luga ma latou tali mai fa'apea: 'O loo matou mataala.' Ma o lo latou liliu ese mai i fiafiaga fa'alelalolagi ma le ta'uta'ua fa'alelalolagi, ma le taufa'asese o le oa, o lea ua latou fa'ailoa mai ai o i latou o loo tula'i i lea tulaga. O lo latou mataala ua latou malolosi ai; ua latou fa'ato'ilaloina le paiē ma le alofa fa'apito ma le fiafia i le fa'afifilemu. O afi o puapuaga ua tutuina i luga ia i latou, ma o le taimi o le fa'atalitali e foliga mai e umi. O nisi o taimi latou te mafatia ai, ma ua fa'alotolotolua le fa'atuatua; peita'i na latou toe fa'apopototo, fa'ato'ilalo lo latou mata'u ma o latou masalosologa, ma a'o taula'i atu o latou mata aga'i i le lagi, ua latou fai atu i o latou fili: 'O loo o'u mataala, o loo o'u fa'atali i le toe afio mai o lo'u Ali'i. O le a ou olioli i puapuaga, i tiga, i le mativa" – *Testimonies for the Church*, vol. 2, pp. 194, 195.

Aso Lua

Setema 10

3. FA'ASALAGA E FA'AAOGAINA AI MALOSI FA'ALENATURA

a. O le a se mea tāua lava na tupu i le tala'aga o le lalolagi o loo masani lava ona lē amanaia ma le lē fa'autauta? Kenese 6:5-8; 7:23; 2 Peteru 3:5, 6.

“A'o le'i fa'aumatiaina le lalolagi tuai e le lolo, sa i ai tane talenia, o tane sa i ai le atamai ma le iloa. Peita'i na i'u ina fa'aleagaina i latou i ō latou manatunatuga, auā na latou tu'uese le Atua mai i a latou fuafuaga ma a latou filifiliga. Na latou popoto i le faia o le mea e lē'i fa'atonuina lava i latou e le Atua e faia, popoto i le faia o le agasala. Na silafia e le Atua o lenei fa'ata'ita'iga o le a leaga mo i latou o le a fananau mulimuli mai, ma na Ia faia ai loa le fa'ai'uga. E selau lua sefulu tausaga na Ia auina mai ai ia i latou lapata'iga e ala atu i lana auauna o Noa. Peita'i na latou fa'aaogaina le taimi na tu'uina atu ma le alofa ia i latou, i lo latou fai fai upu ai ia Noa. Na latou fa'atauemu ma faitio ia te ia.

Na latou taliē ia te ia i lona finafinau uiga ese ma ona lagona malosi tele e fa'atatau i fa'asalaga ia sa ia fa'aioa mai o le a fa'ataunu'uina mautinoa lava e le Atua. Na latou tautala e fa'atatau i saienisi ma tulafono na puleaina ai le natura. Ona latou taliē fa'atauemu ai lava lea i upu a Noa, ma fa'aigoaina ai o ia o se tagata valea so'ona finafinau tele. Na i'u ina muta le onosa'i o le Atua.” – *The SDA Bible Commentary* [E. G. White Comments], vol. 1, p. 1090.

b. O le a se mea o loo fa'atali mulimuli mai lava i lenei paneta? 2 Peteru 3:7; Salamo 11:6; 59:13.

“O le manava o le eleele o mea tau ia a le Ali'i, lea sa Ia aumaia ai a'upega na Ia fa'aaogaina i le fa'aumatiaga o le lalolagi tuai. O vai i totonu o le manava o le eleele na puna a'e, ma fa'atasi ma vai mai i le lagi, ina ia fa'ataunu'uina ai le galuega o le fa'aumatiaga. Talu mai lava le lolo, o loo fa'aaoga ai lava e le Atua le vai ma le afi i le lalolagi e avea ma Ana mea faigaluega e fa'aumatia ai aai amio leaga.” – *Spiritual Gifts*, vol. 3, p. 82.

“O le galuega atoa uma lava a le tamā o pepelo o loo fa'amauiina i totonu o tusi tulafono a le lagi, ma o i latou e tu'uina atu i latou i le auaunaga ia Satani, ina ia tu'uina atu ma fa'aioa atu i tagata pepelo a Satani e ala i poloa'iga ma fa'atinoga, o le a latou maua lo latou tau e tusa ai ma a latou galuega. O le a'a ma lālā o le a fa'aumatiaina e afi o aso mulimuli. O Satani, le ta'ita'i sili o le lē fa'amaoni, o ia o le a'a, ma o ana mea faigaluega uma, o ē o loo a'oa'oina ana pepelo e fa'atatau i le tulafono a le Atua, o lālā ia.” – *The SDA Bible Commentary* [E. G. White Comments], vol. 4, p. 1184.

Aso Lulu

Setema 11

4. O LE ATUA MAMANA E FA'AVAVAU

a. O le foa'iina mai i le fanau a le Atua o le talitonuga i Ana folafolaga ma le fa'amoemoe mo le olaga e fa'avavau, e fa'apefea ona fa'amatala fa'apu'upu'uina le mana lē mafuatia o lo tatou Atua-foafoa? Salamo 90:4; 2 Peteru 3:8.

“O le tofi na folafolaina e le Atua i Ona tagata, e lē oi i ai i le lalolagi lenei. O Aperamo e lē'i i ai sana mea totino i le lalolagi, 'e leai, e leai lava se mea e tusa ma se tulaga vae.' Galuega 7:5. Sa ia te ia mea e tele lava, ma na ia fa'aaogaina mo le vi'iga o le Atua ma le lelei o ona uso a tagata; peita'i na te lē'i manatu i lenei lalolagi e fa'apea, o sona aiga lea. Na vala'au le Atua ia te ia ina ia tu'ua lona aiga ifo i tupua, fa'atasi ai ma le folafolaga o le laueleele o Kanana e fai mo ia e fa'avavau; peita'i e lē'i maua e Aperamo, po'o lona atali'i po'o le atali'i o lona atali'i, lenei folafolaga. Ina ua mana'omia e Aperamo se eleele mo tagata maliliu o lona aiga, sa tatau ona ia fa'atauina, ma sa ia fa'atauina mai ai le fasi fanua mai i tagata o Kanana. O le mea e tasi lava sa patino ia te ia i le Laueleele o le Folafolaga, e na o lena loa-na-eliina i le papa (tu'ugamau) i totonu o le ana o Makapela.

“Peita’i o le upu a le Atua e lē’i to’ilalo; e lē’i fetaia’i fo’i ma lona fa’ataunu’uga mulimuli ina ua nofoia Kanana e tagata Iutaia. ‘O Aperamo ma lana fanau na fetalai i ai le folafolaga.’ Kalatia 3:16. O Aperamo lava ia na mana’omia ina ‘ia ia fa’asoaina le folafolaga. O le fa’ataunu’uga o le folafolaga a le Atua atonu e foliga mai ua leva ona fa’atuai lona fa’ataunu’uina – auā ‘o le aso e tasi e tusa lea ma le afe tausaga i le Alii, o le afe tausaga fo’i e tusa ma le aso e tasi’ (2 Peteru 3:8); atonu e foliga mai ua fa’atuai; peita’i i le taimi filifilia ‘o le a o’o mautinoa mai lava, o le a lē fa’atuai.’ Sapakuka 2:3.” – *Patriarchs and Prophets*, pp. 169, 170.

b. O le a se mea e tatau ona tatou iloa e fa’atatau i le toe afio mai o Keriso? 2 Peteru 3:9; Nauma 1:3.

“O le umi-ona-puapuaga o le Atua e matua ofoofogia lava. Ua leva ona fa’atali le fa’amasinoga tonu a’o aioi le alofa tunoa i le tagata agasala. . . .

“Ua matuā lē fefe le lalolagi i le soliga o le tulafono a le Atua. Talu ai ona o le umi o lona onosa’i, o lea ua soli ai e tagata Lana pule. Ua latou fa’amalosia e le tasi le isi i le fa’apologaina ma le sauāina o Lona tofi, ma fai mai fa’apea, ‘E fa’apefea ona iloa e le Atua? ma o i ai ea se iloa i Lē Silisiliese?’ Salamo 73:11. Peita’i o loo i ai le laina e lē mafai ona latou la’asia. Ua lata mai le taimi o le a latou ausia ai le gata’aga fa’atagaina. E o’o lava i le taimi lenei, toetiiti lava a latou sopoia tuaoi o le umi ona puapuaga o le Atua, o le gata’aga o Lona alofa tunoa, ma le gata’aga o Lona alofa mutimutivale. O le a tula’i le Ali’i e ta’uamionuina Lona lava mamalu ma Lona vi’iga, ina ia lavea’i Ona tagata, ma taofia le fa’atuputeleina o le amiolētonu.” – *Christ’s Object Lessons*, pp. 177, 178.

Aso Tofi

Setema 12

5. O SE AVANOA MO LE SALAMŌ E SILI ATU ONA LOLOTO

a. Aisea e mafai ai ona tatou matuā fa’afetai lava mo le umi ona mafatia o le Atua? Salamo 86:12-15.

“O loo naunau le Ali’i e fesoasoani mai ia i tatou, ina ia fa’amalosia ma fa’amanuia mai i tatou; peita’i e tatau ona tatou ui atu i totonu o le auala o le fa’amamāina se’ia o’o ina susunueseina eleelea uma mai i a tatou amio. O tagata ta’ito’atasi uma o le ekalesia o le a tu’uina atu i le ogaumu a’asa, e lē ina ia fa’aumatiaina ai, ae ia fa’amamāina ai.” – *Testimonies for the Church*, vol. 5, p. 485.

“Aua tou te va’ava’ai atu i tane pe tu’u atu fo’i tou fa’amoemoega ia i latou, ma tou manatu ai fa’apea o i latou e lē mafai ona sese; peita’i ia outou va’ava’ai atu ia Iesu i taimi uma lava. Aua lava ne’i tautalagia se upu o le a lafoina mai ai se faitioga i luga o lo tatou fa’atuatuaga. Ia na o lou Atua lava e fa’aali i ai au agasala lilo. Ia ē ioeina atu ia te ia le fealualua’i solo o lou loto, o Ia na te silafia atoatoa le fofōina o lou ma’i. Afai ua ē sese i lou tuaoi, ia ē ioeina ia te ia lou sese ma fa’ailoa atu fua o lau ioega e ala i lou faia o le toe fuata’iga. Ona ē ole atu loa lea mo le fa’amanuiaga. Ia ē sau i le Atua i le tulaga tonu lava lena e te i ai, ma ia ē fa’atagaina o Ia na te fofōina ou vaivaiga uma. Ia fa’ailoa atu ma le

fa'amalosi lou mana'oga i le nofoali'i o le alofa tunoa; ia matuā mae'ae'a le galuega. Ia ē fa'amaoni i au aioiga i le Atua ma lou lava loto. Afai e te sau ia te Ia ma se loto ua salamō moni, o le a Ia foa'i atu ia te oe le manumalo. Ona mafai loa lea ona ē tu'uina atu se molimau matagofie o le sa'olotoga, ma fa'ailoa atu vi'iga o Lē na vala'aueseina mai oe nai le pouliuli i Lona lava malamalama ofoofogia. O le a Ia malamalama ia te oe Na te lē fa'amasinoseseina fo'i oe. O ou uso a tagata e lē mafai ona latou fa'amagaloina oe mai i agasala pe fufuluina fo'i oe mai i amio leaga. O Iesu e na o Ia lava e mafai ona foa'iina atu ia te oe le filemu. Na Ia alofa mai ia te oe ma foa'i mai Ia lava mo oe. O Lona finagalo tele o le alofa ua 'lagonaina lagona o ō tatou vaivaiga' O a agasala e lapopo'a tele e lē mafai ai ona Ia fa'amagaloina? o le a se loto e pogisa tele ma fa'apologaina e le agasala e lē mafai ai e Ia ona lavea'i? E alofa tele o Ia, na te lē o sa'ili mo le amiotonu i totonu ia i tatou, peita'i o Lona lava agalelei lē mafuatia o loo Ia fa'amalolo ai lo tatou solomuli i tua, ma alofa sa'oloto mai ai ia i tatou, a'o avea pea i tatou ma tagata agasala. O Ia e 'telegese Lona to'asa, ae e tele Lona agalelei,' 'e umi ona Ia puapuagatia i Lona onosa'i ia i tatou, Na te lē finagalo ina ia fano se tasi, a ia o'o tagata uma i le salamo.'" – Ibid., p. 649.

Aso Faraile

Setema 13

FESILI TOE FA'AMANATU

1. **O a uiga o le lalolagi atonu o loo liliueseina ai a'u mai i le Atua?**
2. **E fa'apefea ona ou agasala i lo'u fasiina o o'u uso a auauna, i se tulaga fa'aleagaga?**
3. **Aisea e tatau ai ona ou fausiaina a'e se uiga mataala finafinau lava e fa'atatau i le fa'asalaga i le afi o lo o aga'i mai?**
4. **Fa'amatala le tofi o Aperamo ma lana fanau (Kalatia 3:29).**
5. **Aisea e tatau ai ona ou fa'afetai mo lenei tama'i taimi fa'aopoopo – ma o le a fa'aapefea ona ou fa'aaogaina?**

Lesona 12

Sapati, Setema 21, 2024

O A ITUAIGA TAGATA?

MAU TAULOTO: “O lenei, o le a te'a ese nei mea uma, pe fa'aapefea la outou amio e tatau ai i talanoaga paia uma ma le amio Atua” (2 Peteru 3:11).

“O fesuia'iga tatou te faia i le fa'afitia o fa'anaunauga ma mana'oga fa'apito, o se fesuia'iga lea o mea lē aogā o le olaga pu'upu'u lē tumau, mo mea tāua ma tumau. E lē o se taulaga fasia ofofuaina lea, ae o se oa e fa'avavau ua maua mai. . . . So'o se mea lava e ole mai le Atua ia i tatou ia lafoa'iina, na te foa'iina mai fo'i ia i tatou se mea e sili atu ona lelei e suitulaga a'i.” – *Education*, p. 296.

Faitauga Fautuaina: *Early Writings*, pp. 52-54;

1. E LE MAFAI ONA LĒ O'O MAI, E LE MAFAI ONA TAPĒINA

a. O fa'apefea ona fa'ailoa mai le fa'ataunu'uina o le fa'asalaga mulimuli? 2 Peteru 3:10.

“O le lagi fou, ma le lalolagi fou, (Fa'aaliga 21:1. Isaia 65:17. 2 Peteru 3:13.) o le a lē va'aia, se'ivagana ua uma ona toe fa'atutūina mai tagata amio leaga sa feoti, ma fa'aumatiaina, i le i'uga o le 1000 tausaga. Na ou va'aia o Satani na 'tatalaina mai i lona falepuipui,' i le i'uga o le 1000 tausaga, i le taimi tonu lava na toe fa'aolaina mai ai tagata amio leaga; ma na fa'aseseina i latou e Satani e ala i lona fa'atalitonuina o i latou e fa'apea, na mafai ona latou ave fa'amalosia le aai paia mai i le au paia. O tagata amio leaga na latou savavali fa'ata'amilo uma atu i le 'togalauapi a le au paia,' fa'atasi ai ma Satani o loo ta'imua atu ia i latou; ma ina ua latou sauni e faia se taumafaiga ina ia latou avea le aai, na mǎnāva mai le Atua e Ou le malosi uma lava mai i Lona nofoali'i maualuga, i luga o le aai, se mǎnāva o le afi e fa'aumatiaina ai, lea na sau i lalo i luga ia i latou, ma susunuina ai i latou, o'a'a ma lālā.’

“Ma na ou va'aia, e fa'apei ona avea Keriso ma Vine, ma o Ana fanau o lālā ia: e fa'apena fo'i Satani o ia o le 'a'a,' ma o ana fanau o 'lālā' ia, ma i le fa'aumatiaga mulimuli o 'Koku ma Makoku,' o le 'au uma o ē amio leaga o le a susunuina, o le 'a'a ma lālā,' ma e lē toe feola mai lava.” – *A Word to the Little Flock*, pp. 11, 12.

2. O LE ELEEELE UA FA'AMAMĀINA

a. Na fa'apefea ona iloa e perofeta o le Feagaiga Tuai le fa'aumatiaga mulimuli o le agasala ma le fa'amamāina o le eleele? Isaia 34:8-10; Esekielu 28:16-19.

“O le afi ua sau mai i le Atua mai i le lagi. O le eleele ua talepeina a'e. Ua aumaia a'upega sa natia i totonu o ona vaega loloto. O le mumū o le afi e fa'aumatiaina ai, ua pa a'e i luga, mai i vaega mavetevete loloto o le eleele. O papa ua mumū a'e i le afi. Ua o'o mai le aso o le a mū ai e pei o se umu. O le eleele ua liu suavai i le vevela tele, o le eleele fo'i, ma galuega uma o loo i ai ua susunuina uma. Malaki 4;1; 2 Peteru 3:10. O luga o le eleele ua foliga mai o se eleele tele ua liu suavai – o se vai lepa afi tele ua matuā pupuna a'e lava. O le taimi lea o le fa'asalaga ma le fa'afanoga o tagata lē amio Atua – 'o le aso lea o le tauimasui a Ieova.' . . .

“O tagata amio leaga ua latou maua lo latou tau i le lalolagi. Fa'ata'oto 11:31. O i latou 'o le a avea ma tagutugutu o saito: ma o le aso o loo aga'i mai o le a susunuina ai i latou, ua fetalai mai ai Ieova o 'au.' Malaki 4:1. O nisi ua fa'aumatiaina e pei o le emo o le mata, a'o isi e puapuagatia i le tele o aso. O i latou uma e fa'asalaina 'e tusa ai ma a

latou amioga.’ O le uma ona tu’uina atu o agasala a ē amiotonu i luga o Satani, o lea ua faia ai o ia ‘ia puapuagatia e lē gata e mo lana lava fouvale, ae mo agasala uma fo’i na ia osofiaina tagata o le Atua latou te faia. O lona fa’asalaga e tatau ona matuā sili atu ona tele nai lo le fa’asalaga o i latou na ia fa’aseseina. Ina ua uma ona fano i latou uma lava o ē na pa’u’ū i ana fa’aseseega, e tatau ona ia ola pea ma puapuagatia pea lava. O afi mumū e fa’amamāina ai, e fa’aumatiaina mulimuli ai lava tagata amio leaga, o le a’a ma lālā – o Satani o le a’a, a’o i latou e mulimuli ia te ia o lālā ia. O le fa’asalaga atoa lava o le tulafono ua fa’ataunu’uina; o mana’oga o le fa’amasinoga tonu ua fa’amalieina; ma o le lagi ma le lalolagi, i lo latou va’ava’ai mai, ua latou fa’ailoa mai ai le amiotonu o Ieova.” – *The Great Controversy*, pp. 672, 673.

b. Fa’amatala le matagofie o le la’asaga e soso’o ai, a le Atua. Fa’aaliga 20:7-10, 15; 21:1, 2.

“A fa’amamāina mulimuli loa e le Atua le laueleele, o le a foliga mai o se vai lepa afi e leai ni ona tuaoi. E fa’apei ona tausia saogalemu e le Atua le va’a i le lotolotoi o fesoua’iga o le lolo, ona sa i ai i totonu tagata amiotonu e to’a 8, o le a Ia tausia saogalemu fo’i le Ierusalem Fou, o le a i ai i totonu le au fa’amaoni o augatupulaga uma, e amata mai lava ia Apelu amiotonu e o’o mai i le tagata paia mulimuli lava na ola. E ui lava, o le a afifi le eleele atoa i se sami o le afi suavaia, se’ivagana ai lena vaega o le a ta’atia ai le a’ai, ae o le aai o le a malutia saogalemu e fa’apei lava ona puipuia o le va’a, e se vavega o le mana o le Atua e Ona le Malosi uma. O le aai e tula’i e lē fa’aleagaina i le lotolotoi o le afi e fa’aumatiaina ai.” – *Spiritual Gifts*, vol. 3, pp. 87, 88.

Aso Lua

Setema 17

3. MEA MONI MATA’UTIA

a. O le a se manatunatuga e tatau ona tatou manatunatu i ai, ona o le mea moni mulimuli lava o le a o’o mai i luga o tagata o loo nonofo i luga o le fogaeleele? Salamo 139:23, 24; 2 Peteru 3:11.

“A i ai loa se a’afiaga e fa’apaiaina ai o le upu moni i loto ma olaga, e mafai loa ona tatou tu’uina atu i le Atua auaunaga e taliaina e Ia ma mafai loa ona tatou vi’ia o Ia i luga o le fogaeleele, ina ua tatou tofusua i le natura fa’alelagi ma ua tatou sosola ese mai i le amio leaga o loo i le lalolagi e ala i le tu’inanau.

“Oka, le to’atele o le a maua e lē o sauni pe a afio mai le Matai e fa’amasino i Ana auauna! E to’atele e lē lava o latou manatu e fa’atatau i le aveva ma kerisiano. O le amiotonu a le tagata lava ia o le a lē aoga i le taimi lena. E na o i latou lava o le a maua mai o o’ofu i le amiotonu a Keriso, o loo fa’atumuina i Lona agaga, ma savavali e fa’apei ona Ia savali, i le mamā o le loto ma le olaga, o le a mafai ona latou tula’i i le tofotofoga. O talanoaga e tatau ona paia, ma o upu o le a fa’amāina loa i le alofa tunoa.” – *Testimonies for the Church*, vol. 2, pp. 317, 318.

b. Fa'amatala le sili ona loloto o le tu'uina atu atoatoa o i tatou lea tatou te mana'omia vave lava. 1 Ioane 2:6.

“O tagata ta'itasi uma lava e talitonu moni lava i le upu moni o le a fa'apena fo'i ana galuega. O tagata uma o le a finafinau ma vilivilita'i, ma lē vaivai i a latou taumafaiga ina ia manumaloina mai tagata ia Keriso. Afai e totō maualoina muamua le upu moni i totonu o ō latou lava loto, o le a latou saili loa ina ia totōina le upu moni lava lea i totonu o loto o isi. O le upu moni o loo tele lava ina taofia i fafo i le lotoā aupito i fafo. Ia aumai le upu moni i totonu o le malumalu aupito i totonu o le loto, ia faia le loto mona nofoali'i, ma ia puleaina ai le olaga. O le upu a le Atua e tatau ona su'esu'eina ma usita'ia, o le a maua loa e le loto le malologa ma le filemu ma le olioli, ma o fa'anaunauga o le a aga'i i le lagi; peita'i a vavaeeseina le upu moni mai i le olaga, i totonu o le lotoā aupito i fafo, o le loto e lē o fa'amafanafanaina e le afi pupula o le agalelei o le Atua.

“O le tapua'iga a Iesu, o loo taofia e le to'atele mo ni aso fa'apitoa, poo ni mea fa'apitoa fo'i e tutupu, a'o isi taimi e tu'uese ma fa'atalale i ai. O le tapula'a tumau o le upu moni e lē mo na o ni nai itula itiiti i le Sapati, pe mo ni nai gaoiga iti fo'i o le alofa, peita'i e tatau ona aumaia i totonu o le loto, fa'aleleia ma fa'apaiaina ai le amio. Afai e i ai se taimi e saogalemu ai le tagata e aunoa ma lenei malamalama ma le malosi fa'apitoa mai i le lagi, e mafai la ona ia lafoa'ia le upu moni a le Atua. O le Tusi Paia, le upu paia mamā a le Atua, e tatau ona avea ma ona fautua ma ona ta'iala, o le mana lea e pulea lona olaga. Na te aumaia ona lesona ia i tatou pe afai o le a tatou taliaina ona lesona i o tatou loto.” – Ibid., vol. 5, p. 547.

Aso Lulu

Setema 18

4. AUA NE'I LILIUESEINA

a. Fa'amatala le fuafuaga a le Atua mo Ona tagata – ae po'o le a fo'i le manatu o tagata fa'alotolotolua o loo taula'i i lenei lalolagi, i lena fuafuaga ma i latou o loo sa'ili ina ia ola ai i le fuafuaga lea. Tito 2:11-14; Teuteronomie 26:18.

“Ua o'o mai le taimi, o se vaega tele lava o i latou na olioli ma alalaga leo tetele muamua mo le olioli ona o lo latou iloaina o le afio vave mai o le Alii, ua latou tula'i nei i le itu a ekalesia ma le lalolagi, o ē na fa'aa'mu'amu muamua ia i latou ona o lo latou talitonu o le a afio mai Iesu, ma latou fa'asalalauina ai fa'amatalaga sese eseese uma ina ia fa'aosofia ai le fa'ailoga tagata e tete'e ai ia i latou ma fa'aumatia ai lo latou a'afiaga. O le taimi lenei, afai e fa'anaunau atu se tasi i le Atua soifua, ma fia 'ai ma fia inu mo le amiotonu, ma foa'i atu ai e le Atua ia te ia ina 'ia ia lagona Lona mana, ma fa'amalie ai fa'anaunauga o lona agaga e ala i Lona fa'asusuluina mai o Lona alofa i totonu o lona loto, ma afai na te fa'amamaluina le Atua e ala i lona vi'ia o Ia, e masani lava ona manatu nei tagata talitonu i ta'utinoga, i le afio vave mai o le Alii, o ia o se tagata fa'aseseina, ma tu'ua'iina i le fa'atosinaina poo lo o i ai fo'i ia i latou se agaga leaga.

“O le to'atele o nei kerisiano i a latou ta'utinoga, latou te oofu, tautala, ma gaioi e fa'apei lava o le lalolagi, ma e tasi lava le mea atonu o loo iloa ai i latou, o la latou

ta'utinoga lea. E ui lava ina latou ta'utino mai o loo latou va'ava'ai atu mo Keriso, ae o a latou talanoaga e lē oi le lagi lea, ae o loo i mea fa'alelalolagi. 'O a ituaiga amioga' e tatau ona i ai i latou 'i talanoaga paia uma ma le amio atua,' o ē o loo ta'utino mai o loo 'vaavaai ma fa'ata'alise atu i le o'o mai o le aso o le Atua.' 2 Peteru 3:11, 12. 'O tagata ta'itasi uma lava o loo i ai lenei fa'amoemoe i totonu ia te ia, na te fa'amamāina o ia lava, e fa'apei o mamā o Ia.' 1 Ioane 3:3. Peita'i o loo fa'amaonia o le to'atele o loo tauaveina le igoa Aso Fitu O Le Toe Afio Mai, e sili atu lo latou su'esu'e ina ia fa'amatagofieina o latou tino ma ia va'aia i latou i foliga ma teuga lelei i mata o le lalolagi, nai lo lo latou su'esu'e ina ia a'oa'o mai i le Upu a le Atua pe fa'apefea ona taliaina i latou e Ia." – *Early Writings*, p. 108.

b. I le eseeseega, o le a la tatou sini e tatau ona i ai? 2 Korinito 4:18.

“Ia fa'amuta e fa'avavau au muimuiga e fa'atatau i lenei olaga, a ia fai ma avega o lou agaga le sini lea, pe fa'apefea ona ē fa'amausaliina le olaga e sili atu nai lo lenei olaga, o se igoa i maota ua saunia mo i latou e fa'amaoni ma tumu i le fa'atuatua e o'o i le i'uga. Afai e te faia se mea sese iinei, ua leiloa mea uma lava. Afai e te fa'aaluina le taimi o lou olaga atoa i le fa'amausaliina o oa fa'alelalolagi, ma ē lē maua ai oa fa'alelagi, o le a ē iloa ua ē faia se mea sese mata'utia lava. E lē mafai ona ē maua lalolagi uma e lua.” – *Testimonies for the Church*, vol. 1, p. 706.

Aso Tofi

Setema 19

5. VA'AVA'AI A'E IA SILI ATU ONA MAUALUGA

a. O fa'apefea ona lapata'iina i tatou i lo tatou talitonu tauaso i le vaivai o ta'ita'i fa'aletagata, ma isi uso a auauna vavalalata e mafai ona sese? Isaia 3:11, 12; Amosa 2:4; 4:12.

“O loo i ai i latou, o ē e ui lava ina manatu i ai fa'apea o loo latou auauna i le Atua, ae o loo latou fa'ata'alise ona fusia i latou i le lē fa'amaoni. Ia i latou, o ala pi'opi'o e foliga mai e sasa'o; o loo latou ola i le soliga fa'aauau pea o le upu moni a le Atua; o tapula'a amio leaga ua lalagaina fa'atasi i totonu o fa'atinoga o ō latou olaga, ma so'o se mea lava latou te ō i ai, latou te lūlūina ai lava fatu leaga. E aunoa ma lo latou ta'ita'iina o isi ia Keriso, o lo latou a'afiaga e mafua ai ona latou tu'ufesili ma masalosalo.” – *Testimonies to Ministers*, p. 281.

“Ia outou fa'autauta ia i latou e laugaina atu i isi le upu o le ola, ae latou te lē teufatuina le agaga o le loto maulalo ma le fa'afitia o i latou e i latou lava, lea na te a'oa'oina. O tane fa'apena e lē mafai ona fa'alagolago i ai i taimi o se fa'afitauli. Latou te lē amanaiaina vave lava le si'ufofoga o le Atua e fa'apei lava ona faia e Saulo, ma e fa'apei o Saulo, e to'atele latou te sauni e ta'uamionuina a latou filifiliga. Ina ua a'oa'iina Saulo e le Atua e ala atu i Lana perofeta, na fa'ailoa mai e Saulo ma le lē fefe sa ia usita'i i le si'ufofoga o le Atua; peita'i o le mamoe ma povi fetagisi mai na molimau mai na te lē'i usita'i. O le uiga lava lea e tasi o loo fa'ailoa mai ai e le to'atele i le taimi

lenei lo latou fa'amaoni i le Atua, peita'i o a latou konoseti ma isi a latou fa'apotopotoga o fiafiaga, o a latou faigā uo fa'alalolagi, o lo latou vi'ia e le tagata o ia lava, ma lo latou naunauta'iga finafinau lava mo lo latou ta'uta'ua, e molimau uma mai latou te lē'i usita'i i Lona si'ufofoga. 'O Lo'u nu'u fo'i, o tamaiti o loo fa'apologaina i latou, e pule fo'i fafine ia te'i latou.'

“O se tapula'a maualuga lena ua tu'uina mai e le tala lelei i o tatou luma. O le kerisiano e usita'i i taimi uma, e lē gata o ia o se tagata fou, ae o ia fo'i o se tagata amio tonu i totonu ia Keriso Iesu. O ia o se malamalama e lē mate ina ia fa'ailoa atu i isi le ala aga'i atu i le lagi ma le Atua. O lē o loo ia aumaia lona ola mai ia Keriso, o le a leai sona fa'anaunauga mo fiafiaga valea a le lalolagi e lē fa'amalieina ai,” – *Testimonies for the Church*, vol. 5, p. 88.

Aso Faraile

Setema 20

FESILI TOE FA'AMANATU

1. Fa'amatala le upu moni fa'aleTusi Paia o le manatu lea e masani ona fa'aigoaina o le afi o seoli.
2. O le a le vavega e faia e le Atua i le lotolotoi o nā afi mumū e lē mafai ona fa'aumatiaina?
3. E fa'apefea ona mafai ona fa'atuputeleina lo'u iloa fa'akerisiano, ma aisea e tāua ai lenei tulaga?
4. Fa'amatala fa'afanoga o le fa'alagolago i le malosi fa'aletagata e fa'atatau i le fa'aolataga.
5. O a la'asaga e tatau ona ou faia ina ia sili atu lo'u va'ava'ai toto'a i le ola e fa'avavau?

Lesona 13

Sapati, Setema 28, 2024

Finafinau e O'o i Le I'uga

MAU TAULOTO: “O lenei, le au pelē, auā ua mua'i iloa e outou, ia outou fa'aeteete ne'i outou pa'u'ū fo'i mai i lo outou tutumau, i le ta'ita'ieseina o outou i le sese o ē amio leaga, A ia tutupu outou i le alofa tunoa, ma le iloa e fa'atatau i lo tatou Alii lo tatou Fa'aola o Iesu Keriso. Ia iā te Ia le vi'iga nei e o'o i le fa'avavau lava, Amene” (2 Peteru 3:17, 18).

“E leai se fa'apaiaina fa'ale-Tusi Paia mo i latou e lafoa'iina i o latou tua se vaega o le upu moni.” – *The SDA Bible Commentary* [E. G. White Comments], vol. 7, p. 947.

Faitauga Fautuaina: *The Acts of the Apostles*, pp. 557-567.

1. GALUE MATAALIA I LE FA'ATA'ALISEINA O LE GALUEGA

a. I lo tatou iloaina o le afi sili ona mata'utia, o le a se mea ua vala'auina i tatou ia tatou faia?

“O le taimi lenei, a’o le’i toe afio mai le Atalii o le tagata, o le tala lelei e tatau ona tala’iina atu ‘i mālō uma, ituaiga, ma gagana, ma tagata.’ Fa’aaliga 14:6, 14. O le Atua ‘ua Ia filifilia se aso, o le a Ia fa’asalaina ai le lalolagi.’ Galuega 17:31. Ua ta’u mai e Keriso ia i tatou le taimi o le a o’o mai ai lena taimi. Na te lē o fai mai o le a liua uma le lalolagi, ae peita’i ‘o lenei tala lelei o le malo o le a tala’iina atu i le lalolagi atoa e fai ma molimau i malo uma; ona o’o mai ai lea o le lalolagi.’ O le tu’uina atu o le tala lelei i le lalolagi, ua i lo tatou malosi le fa’avaveina o le toe afio mai o lo tatou Alii. E lē gata e tatau ona tatou va’ava’ai atu, peita’i e tatau fo’i ona tatou fa’avaveina le o’o mai o le aso o le Atua. 2 Peteru 3:12.. Ana fa’apea na faia e le ekalesia a Keriso lana galuega filifilia na tu’uina atu i ai e le Alii, semanu ua uma ona lapata’iina le lalolagi atoa a’o le’i o’o i lenei taimi, ma semanu ua afio mai le Alii o Iesu i lo tatou lalolagi i le mana ma le mamalu tele. . . .

“O i latou o loo va’ava’ai atu mo le Alii o loo latou fa’amamāina o latou agaga e ala i le usita’i i le upu moni. O le mataala vilivilita’i latou te tu’ufa’atasia ai le galue finafinau. Talu ai ona ua latou iloa ua i faitoto’a le Alii, o lea ua fafaguina ai lo latou naunauta’i ina ia fa’atasi ma mea faigaluega fa’alelagi i le galulue mo le fa’aolataga o tagata.” – *The Desire of Ages*, pp. 633, 634.

2. OKA SE AVANOA SILI ONA TĀUA!

a. E fa’apefea ona tatau ona fa’avaveina e i tatou ta’ito’atasi le toe afio mai o Keriso? Failauga 11:1, 2, 6.

“Ua tu’uina mai e Keriso i le ekalesia se tiute paia. O tagatā ekalesia ta’itasi uma e tatau ona avea ma auala e mafai ona foa’i atu ai e le Atua i le lalolagi oa o Lona alofa tunoa, o oa lē masu’esu’eina a Keriso. E leai se mea e sili ona fa’anaunau tele i ai le Fa’aola nai lo le avea ma mea faigaluega o le a fa’aילוaina atu i le lalolagi Lona Agaga ma Lana amio. E leai se mea e sili atu ona mana’omia e le lalolagi nai lo le fa’aaliga o le alofa o le Fa’aola e ala atu i le aiga tagata. O le lagi uma lava o loo fa’atali mo tane ma tama’ita’i e mafai ona ala atu ai le fa’aaliaina e le Atua o le mana o le fa’akerisiano.

“O le ekalesia o le mea faigaluega lea a le Atua mo le tala’iina o le upu moni, fa’amalosia e Ia ina ia faia se galuega fa’apitoa; ma afai e fa’amaoni le ekalesia ia te Ia, ma usita’i i Ana poloa’iga uma, o le a nofo i totonu ia te ia le silisiliese atoatoa o le alofa tunoa. Afai o le a ia fa’amaoni i lona usita’i fa’amaoni, afai o le a ia vi’ia le Alii le Atua o Isaraelu, e leai se malosi e mafai ona tete’e mai ia te ia.

O le vilivilita'i mo le Atua ma Lona finagalo na osofia ai le au so'o ina ia latou molimau i le tala lelei ma le mana mata'utia lava. E lē tataua ea ona musaesae se afi i o tatou loto i se finafinauga ina ia ta'u atu le tala o le alofa e toe fa'atauina mai ai, le tala e fa'atatau ia Keriso ma Ia na fa'asatauroina? O le avanoa sili ona taua o kerisiano ta'itasi uma lava, e lē gata ina ia va'ava'ai atu, ae 'ia ia fa'avaveina fo'i le afio mai o le Fa'aola." – *The Acts of the Apostles*, p. 600.

b. E fa'aapefea ona fa'amatala e le Atua Lana sini mo i tatou? Pese a Solomona 6:10; Salamo 60:4.

"O le upu moni ma le mea sese, ua la lata atu lava i le la finauga mulimuli. Ia tatou savavali i lalo o le fu'a-pisia i le toto a Perenise Emanuelu, . . . auā o le upu moni o le a manumalo." – *Christian Service*, p. 77.

"Afai o le a ofuina e le ekalesia le ofu talaloga o le amiotonu a Keriso, ma vavae ese mai i le usita'i uma i le lalolagi, o loo i ai i ona luma le malama o se aso pupula ma le matagofie. O le folafolaga a le Atua ia te ia o le a tumau mausali e fa'avavau. O le a Ia faia o ia o se fa'asilisiliga e fa'avavau, o se olioliga o augatupulaga e tele. O le upu moni, o lona lē amanaiaina o i latou e inoino ia te ia ma te'ena o ia, o le a manumalo. E ui lava ina foliga mai i nisi o taimi ua fa'avaivaia, peita'i o lona aga'i i luma e lē'i taofia lava. A fetaia'i loa le feau a le Atua ma itu tete'e mai, Na te tu'uina atu i ai le malosi fa'aopoopoina, ina ia mafai ai ona ia tu'uina atu le a'afiaga sili atu ona tele. O le fa'amalosia o le feau i le malosi mai i le Atua, o lea o le a ia tipiina atu ai lona ala i totonu o pa puipui sili ona malolosi ma manumalo ai i faigata uma lava." – *The Acts of the Apostles*, p. 601.

Aso Lua

Setema 24

3. MALOSI MA LE FA'AMOEMOE

a. O le a se mea na te aumaia le malosi i tagata talitonu ta'itasi uma o loo fa'anaunau e fa'ataunu'uina le tiute o le lavea'iina o agaga? Isaia 53:11; 2 Korinito 5:14, 15; 12:9.

"O loo i ai galuega faigata ma fete'ena'iga, o le fa'afitia e le tagata o ia lava ma tofotofoga lilo o le loto mo i tatou uma ia fetaia'i ma tauaveina. O le a i ai le fa'anoanoa ma loimata mo a tatou agasala; o le a i ai tauiviga ma le matāala i taimi uma, e tu'ufa'atasia ma le salamo ma le mā ona o ō tatou vaivaiga. . . .

"Ia fa'atauanauina i tatou e le alofa o Keriso ina ia tatou matuā mutimutivale ma agalelei, ina ia mafai ona tatou fetagisi ona o tagata sese ma i latou ua solomuli i tua mai i le Atua. O le tagata e lē mafaitaulia lona tau. O lona tāua e na o le tau lava na totogiina e toe fa'atauina mai ai le tagata, e mafai ona fuaina ai. O Kalevario! Kalevario! Kalevario! o le a fa'amatalaina le tau moni o le tagata. . . .

"A aunoa ma le mana o le alofa tunoa i le loto, ma fesoasoani ai i a tatou taumafaiga ma fa'apaiaina ai a tatou galuega, o le a lē mafai ona tatou lavea'iina o tatou lava agaga

ma agaga o isi. O so’otaga o vaega eseese ma fa’atulagaga e matuā aoga lava, ae aua ne’i manatu se tasi e fa’apea, o nei mea o le a latou faia le galuega e aunoa ma le alofa tunoa ma le mana o le Atua o loo galue i le mafaufau ma le loto. O le loto ma le tino a’ano o le a to’ilalo i le fa’asologa o sauniga, ma le fa’ataunu’uina o a tatou fuafuaga, e aunoa ma le mana o le Atua e osofiaina ma foa’iina mai le loto tele e fa’atino ai.” – *Testimonies for the Church*, vol. 3, pp. 187, 188.

b. Aisea e matuā fa’amalosiā ai le loto i le fa’amoemoe i le olaga e fa’avavau? 2 Peteru 3:13; Salamo 149:4.

“O ē agamalu ‘o le a fai mo i latou le laueleele.’ O le fa’anaunauga mo le si’itiaina e le tagata o ia lava, lea na mafua ai ona ulufale mai le agasala i le lalolagi, ma lē maua ai e o tatou ulua’i matua le pule i lenei lalolagi matagofie, lo latou mālō. O le fa’afitia e le tagata o ia lava, lea na toe fa’atauina mai ai e Keriso le tagata na leiloa. Ma ua Ia fetalai mai e tatau ona tatou manumalo e fa’apei ona Ia manumalo. Fa’aaliga 3:21. E ala i le fa’amaulalo ma le gaua’iina atu e le tagata o ia lava, e mafai ai ona avea i tatou ma suli fa’atasi ma ia, pe a ‘fai mo ē agamalu le laueleele.’ Salamo 37:11.

“O le laueleele ua folafolaina mai i ē agamalu, o le a lē fa’apei o lenei laueleele, fa’apogisaina i le pogisa lafoia mai o le oti ma le mala. ‘O i tatou, e tusa ma Lana folafolaga, e va’ava’ai atu mo lagi fou ma se laueleele fou, e nofo ai lē amiotonu.’ . . .

“E leai se fa’ato’ilaloina, leai se fa’anoanoa, leai se agasala, leai se isi o le a fai mai fa’apea, Ua ou ma’i; e lē o i ai ni solo o tagata mo falelauasiga, leai se auē, leai se oti, e lē toe fa’amavae ai, leai ni loto momomo; peita’i o Iesu o loo i ai iina, o loo i ai fo’i le filemu.” – *Thoughts From the Mount of Blessing*, p. 17.

Aso Lulu

Setema 25

4. O SE VALA’AU TĀUA TELE

a. O le a se mea o loo fa’amamafa mai e Peteru i lana tusi – ma aisea? 2 Peteru 3:14.

“Tatou te lē iloa i le aso e tasi le malosī o le a i ai la tatou tauiviga i le aso e soso’o ai. O loo ola Satani, ma o loo ia galue, ma o aso ta’itasi tatou te mana’omia ai tatou te alalaga a’e i le Atua ma le finafināu tele mo le fesoasoani ma le malosī e tete’e ai ia Satani. O le umi lava e pule ai Satani, o le a tatou mana’omia fo’i ina ia tatou fa’ato’ilaloina i tatou lava, o osofa’iga e tatau ona tatou manumalo mai ai, ma e leai se nofoaga e malolo ai, e leai se taunu’uga e mafai ona tatou o’o i ai ma tatou fa’apea ifo, ua tatou maua atoatoa.

“Filipi 3:12: ‘E lē peisea’i ua ou maua nei, po ua ou atoatoa ona lelei nei: ae ou te tausisi atu pea, pe mafai ona ou maua o le mea na maua ai a’u e Keriso Iesu.’

“O le olaga kerisiano o se savaliga lea aga’i i luma i taimi uma lava. O Iesu o loo Ia afio o Ia o Lē o loo fufuluina ma fa’amamāina Ona tagata; ma a atoatoa loa ona lafoia atu lona fa’atusa i totonu ia i latou, ua atoatoa fo’i i latou ma paia, ma ua saunia mo le aveina

a'e i le lagi. O se galuega tele lava o loo mana'omia mai i kerisiano. Ua apoapoa'iina i tatou ina ia fufuluina i tatou mai i mea leaga uma o le tino ma le agaga, ma fa'aatoatoaina ai ma fa'apaiaina i le mata'u i le Atua.” – *Testimonies for the Church*, vol. 1, p. 340.

b. Aisea e matuā tāua tele ai le onosa'i i lo tatou fa'apaiaina? 2 Peteru 3:15, 16; Luka 21:19.

“O loo i ai i totonu o le Tusi Paia ni mea e faigata ona malamalama i ai, ma, e tusa ai ma le gagana a Peteru, o ē e lē'i a'oa'oina ma lē mausalī, ua latou fa'auigaseseina e o'o ai lo latou lava malaia. Atonu tatou te lē mafai, i lenei olaga, ona fa'amatalaina le uiga o fuaiupu ta'itasi o le Tusi Paia; peita'i e lē o i ai ni vaega sili ona tāua o le upu moni fa'atinoina o le a fa'anefuina i mea lilo. Pe a o'o mai le taimi, i le ta'ita'iga a le Atua, o le a tofotofoina ai le lalolagi i le upu moni mo lena taimi, o le a osofia mafaufau e Lona Agaga ina ia su'esu'e le Tusi Paia, ma le anapogi ma le tatalo, se'ia o'o ina maua lea so'otaga ma lea so'otaga, ma tu'ufa'atasia ai i se filifili atoatoa ona lelei. O mea moni uma e mo le fa'aolataga o tagata o le a fa'amanoina, o lea, o le a leai se isi e mana'omia e sese pe savali i le pogisa.

“A'o tatou mulimuli i lalo i le filifili o le valoaga, o le upu moni ua fa'aalia mo lo tatou taimi ua va'aia manino lava ma fa'amatalaina. E fa'amasinoina i tatou i avanoa sili ona taua o loo tatou olioli ai ma le malamalama fo'i o loo susulu mai i luga o lo tatou ala.” – *Ibid.*, vol. 2, p. 692.

“ ‘O le finagalo lenei o le Atua' e fa'atatau ia te outou, 'o lo outou fa'apaiaina.' 1 Tesalonia 4:3. Po'o lou loto ea fo'i lea?’” – *The Acts of the Apostles*, p. 566.

Aso Tofi

Setema 26

5. MAUSALI I LE FA'AMOEMOE

a. O fa'apefea ona apoapoa'i mai Peteru ia i tatou i le finafinau mataala? 2 Peteru 3:17.

“O fa'atonuga ua tu'uina mai i totonu o le upu a le Atua, e lē o tu'ua ai se avanoa mo le maliēga ina ia fa'atagaina ai le agasala. O le Alo o le Atua na fa'aalia ina ia Ia tosina uma atu tagata ia te Ia lava. Na te lē'i afio mai ina ia fa'amoeina le lalolagi, ae ia fa'asino mai le ala vāiti e tatau ona faimalaga ai tagata uma o ē o le a taunu'u mulimuli atu lava i faitoto'a o le Aai a le Atua. O Lana fanau e tatau ona mulimuli i le taula'iga ua Ia ta'ita'iina atu i ai le ala; i so'o se taulaga fasia lava e fa'aumatia ai le fa'afifilemu poo le fa'amalieina o tu'inaanau fa'apito, i so'o se tau lava o galuega poo puapuaga, e tatau lava ona latou fa'atumauina se tauiviga i taimi uma lava ma le tagata lava ia.” – *The Acts of the Apostles*, p. 565.

b. I le fa'ai'uga o le tusi, o le a le olega mulimuli a le aposetolo? 2 Peteru 3:18.

“O au agasala atonu e fa’apei o mauga i ou luma; peita’i afai e fa’amaulalo lou loto ma fa’aali au agasala, ma talitonu fa’atuatua i le amiotonu a le Fa’aola na fa’asatauroina ma ua toe soifua mai, o le a Ia fa’amagaloina ma fa’amamāina oe mai i amiolētonu uma lava. E mana’omia e le Atua mai ia te oe lou gaua’i atoatoa i Lana tulafono. O lenei tulafono o le ata lea o Lona si’ufofoga o loo fetalai atu ia te oe, Ia sili atu ona paia, ioe, ia sili atu pea ona paia. Ia ē fa’anaunau i le atoaga o le alofa tunoa o Keriso. Ia fa’atumulia lou loto i se fa’anaunauga malosi lava mo Lana amiotonu, o le galuega a Lana amiotonu, ua fa’aailoa mai e Lana afioga, o le filemu lea, ma o lona a’afiaga o le to’a filemu lea ma le mautinoaga e fa’avavau.

“A’o fa’ananau atu lou loto mo le Atua, o le a ē maua le sili atu ma sili atu pea o le tele o oa lē masu’esu’eina o Lona alofa tunoa. A’o ē manatunatu i nei oa, o le a ē maua i latou ma o le a ē fa’aalia le amiotonu o le maliu o le Fa’aola, o le puipuiga a Lana amiotonu, o le atoaga o Lona poto, ma Lona mana e tu’uina atu ai oe i luma o le Tamā ‘e aunoa ma se ila, ma lē mata’uleagaina.’” – Ibid., pp. 566, 567.

Aso Faraile

Setema 27

FESILI TOE FA’AMANATU

- 1. O le a se mea na te aumaia se fa’amaoniga e iloa ai, o lo tatou vilivilita’i ua toe fanaufouina?**
- 2. O a la’asaga fa’atinoina e mafai ona ou faia ina ia fa’avaveina ai le toe afio mai o le Ali’i?**
- 3. E ui lava i sauāga uma ma le fa’amata’u mai, o ai o le a fai mo i latou lenei paneta?**
- 4. Aisea ou te mana’omia ai ina ia ou matuā manatu loloto lava e fa’atatau i le fa’asologa o le fa’apaiaina?**
- 5. A’o o’u va’aia le loloto o lo’u agasala tele, o le a se mea e tatau ona ou faia?**